

萬 有 文 庫

第 二 集 七 百 種


王 雲 五 主 編

道 園 學 古 錄

(四)

虞 集 撰

商 務 印 書 館 發 行



道園學古錄

(四)

虞集撰

國學基本叢書

道園學古錄卷之二十三

應制錄三

碑

武衛新建先聖廟學碑

國家初建大都。廼分侍衛親軍爲列衛。布諸畿內。武衛其一也。至元廿六年。始置營在涿州南。去京師二百里。凡衛必有營。營有城郭樓堞。門障關禁。官治行伍。廬舍庫庾。衢巷市井。而特立先聖孔子之廟。儒學在焉。衛之官。有都副指揮使以下。將帥偏裨什伯之長。委積營作之署。幕府文書之史。而特設儒學教授。以教士大夫子弟焉。衛士以萬計。自非征行。則有內府修繕之役。歲巡幸。則以精銳從。其留屯於營者。三之一。共使之長。率以近臣領之。其官治京師中。而分任屯事於營者。使或副若貳。皆三歲一更。將吏亦各以番上。獨教授常在衛治教事。此衛有學官之大概也。天曆二年。武衛都指揮使洪灝。分衛事治營中。廼曰。今聖天子聰明睿知。文治橐輿。天下莫不嚮風而興起。灝也。世慎忠孝。得備戎行。少游上庠。得受教於君子矣。而吾衛廟學未立。師弟子數學無所於在。非闕典歟。此誠灝之責也。時亞安方爲衛使之長。深然其言。卽以建學之事。上聞。上可之。廼以軍務之暇。度地於營東南。廣袤八十畝。迺基迺堂。于其燥剛。觀泉審方。作新文明。經營材用。石木陶冶。工作程度。心畫指授。具有成法。明年。知樞密院闕闕台。來代亞安。見儲備之備。欣然相成之。卽日復以興役聞。於是經始於至順辛未之三月。作禮殿。以奉先聖像。顏子曾子。

子思孟子配從祀十哲分位殿中東西鄉七十二弟子繪廡下作講堂齋廡庖廩垣墉門術皆如常制凡
費用一出公帑不以煩人及冬而告成是年中書平章政事阿禮海牙公以宰相兼長衛帥隆然舊臣敦
詩書禮樂以佐天子之治教尤樂其有成爲度營勞地得二千畝俾耕以食學者乃以廟學告成入請于
上命臣集記之臣集受詔謹具其事迺再拜稽首而言曰昔我太祖皇帝奮揚天威爰啓帝祚世祖皇帝
神武不殺遂一海內列聖相承功成治定至於今上皇帝天下晏然兵楛不用爪牙之士迺得優游弦歌
於其間豈非千載之盛乎臣嘗學於孟軻氏矣其言以爲未有仁而遺其親未有義而後其君者也又以
爲壯者暇日修其孝悌忠信則雖制挺可以勝敵蓋言人心天理之足恃也如此今學校之設其教則仁
義之道也其事則孝弟忠信之行也誠使剛強武勇之士身衽金革而知學焉則仁義素明於胸中忠信
不遺於平日緩急有所用焉知義利之辨得達順之決識定志堅見危致命以親上死長則立功國家名
顯後世復何疑焉然則學校之設豈小補哉敢作詩以頌之其辭曰

皇命建學制自都邑通祀先聖中外惟則周廬列藩環拱中極率是有作以造成德維時武衛載度新宮
其帥有文以爲己功衆勸其來有敏其功相臣冠軍曰宜有崇旣崇旣完入告天子天子曰咨我旅多士
戢爾干戈妥爾鞭弭俎豆游歌庶其在此侃侃將帥而父而兄勉爾孝友勗爾忠貞出奮于征歸力于耕
輯睦靖恭勿怠勿爭有牲有醴歲時用享觀德于射我祀爾相端爾威儀節爾飲讓神之格思錫爾多慶
崇墉言言過者式之有仇其門來者則之麗牲之石史有刻辭永忘勿忘君子之思

秦定二年歲次乙丑正月之吉始和皇帝燕居穆清撫時康寧中心無爲以守至正踐丕承之位著若有見於羹墻廼召集賢院臣而告之曰惟天惟祖宗委社錫虜式克至于今日海嶽寧謐波塵不驚詩曰於乎皇王繼序思不忘予曷敢弗顧謏乎宗廟烝嘗之事有司具矣然而雲蒸霧滃予何以見其降升天回日旋予何以識其往來有能爲予專志意以通神明者乎昔在成廟受遺世皇睠惟儷極之賢克相內理然而蒼梧弗從降靈小水遺恨徒結歲月云邁且夫本支繁茂豈無蘖芽之傷雲漢昭回慳有氛祲之掩觸念豪髮疾心丘山有能爲予釋隱憂而滌靈爽者乎夫有天下也一體民物一視宇宙君蒿悽愴予猶有慨於神明幽沈抑塞詎謂可忘於臣庶有能爲予發晶耀而溥惠渥者乎皆頓首言曰聖慮淵微非臣愚所敢與知天人之間其事甚重非臣所得專任請與丞相議之制曰可明日入奏曰道家有黃籙齋科者上可以導列聖之宸游下可以達羣生於屯昧請以是昭塞旨意之萬一皇帝若曰俞哉庶其在茲乎時則有若三十九代天師太玄輔化體仁應道大真人臣張嗣成親揚祖教妙幹道樞神仙演道大宗師秦定虛白文逸明德真人臣孫履道以老成敦厚之資深符真契特進上卿玄教大宗師崇文弘道玄德廣化真人臣吳全節以聰明特達之器參贊化機並領玄宗共承明詔以二月一日各真人率南北道士千衆卽大長春宮陳大科法者七日出黃籙白簡萬通啓長夜之幽扃暢好生之至德於是祠曹總禮神之儀物詞臣具册祝之文章宣徽陳禮饌以惟共內府發金縢而弗吝揖拜跪起皆西清禁近之英奉若對揚必黃閣臣鄰之重有司咸在百辟駿奔不休哉在天之靈莫不顧歆於上溥天之澤莫不均被於下赫赫洋洋洞洞煌煌一時盛典蔑有加焉於是陳玄功於翰墨留芳迹於庭除禮也謹按故事昔憲宗皇

帝甲寅之歲。以建國之初。方事金革。鋒鏑之下。或致天傷。迺紆皇心。常有斯舉。於今七十有一年矣。時和歲豐。民安物阜。曾無昔日之虞。而舉今茲之祀者。何哉。蓋嘗思之。聖人之心。常兢兢於方盛之時。不逸豫於未央之日。用能保鴻圖於永固。御景福於方來者。此其故與。嗚呼。盛矣。乃頌之以詩曰。於穆聖皇。宅心至神。何幽不燭。何枯不春。百度具張。羣公在位。曰此人事。未究玄懿。至人通神。出陽入陰。以成天工。實契我心。長春之宮。密邇帝所。極爾禘儀。勿制常數。飛章列符。萬神並來。奔走後先。昭假匪私。吁嗟典祀。國有常制。犧牲粢盛。既充既旨。陟降在庭。孰是孔昭。風馬雲車。於焉會朝。德音布宣。洪恩斯沛。惟爾有生。是錫是賚。下沈九泉。誰復念之。今振而興。俾承生基。茫茫八埏。同戴咸喜。向陽就明。萬億及秭。域中四大。匪異伊同。聽我詠歌。以贊皇風。

東嶽仁聖宮碑

延祐中。故開府儀同三司上卿玄教大宗師張留孫。買地於大都齊化門外。規以爲宮。奉祠東嶽天齊仁聖帝。仁宗皇帝聞之。給以大農之財。辭不拜。第降詔書護作。方鳩工而留孫歿。後□年。今特進上卿玄教大宗師吳全節。大發累朝賜金。以成其先師之志。至治壬戌。作大殿。作大門。殿以祀大生帝。前作露臺。以設樂門。有衛神。明年。作東西廡。東西廡之間。特起如殿者四。以奉其佐神之尊貴者。列廡如官舍。各有職掌。皆肖人而位之。築館于東。以居奉祠之士。總名之曰東嶽仁聖宮。泰定乙丑。魯國大長公主。自京師歸。其食邑之全寧道。出東門。有禱於大生帝。出私錢鉅萬。俾作神寢。象帝與其妃夫人媿寺之容。天曆建元。今上皇帝卽大位。遣使迎大長公主于全寧。還及國門。皇后迎母于郊。主禮神拜。貺而後卽其邸。天子乃

賜神寢名曰昭德殿。云宮廣深若干畝。爲屋若干楹。高大弘麗。足以久遠。歲時內廷。出香幣致祭。都人有禱祈。咸得至焉。有勅命臣集撰文。勒諸麗牲之碑。其辭曰。

帝奠九土。辨方秩祀。封嶽維五。咸在天子。有岩岱崇。望之東郊。雨雲來敷。曾不崇朝。有壇有宮。神師攸作。蒼龍青旂。百祇祇若。天子神聖。惠于民人。晷言度思。昭德維新。丹楹朱戶。納陛登陟。青青五組。兼幣加璧。禮有舉之。祇益以因。卽祠不違。天子之仁。徂徠有原。新甫有隰。樂具在廷。遠于來輯。庖盈大享。寢陳燕詩。神具康樂。以惠我私。春日載陽。帝藉于耜。以先農人。祈我穡事。我觀我稼。視邇知遠。爾煦爾澤。自我畿甸。相彼柔桑。被于沃饒。相彼玄鳥。亦集其條。濺濺流水。駕言來被。受弓載韞。思皇朱芾。出其闔閣。士女車徒。來尸來宗。壽夭在予。佑我民庶。克修孝弟。以養以賦。以受多祉。兵禋弗驚。菑癘弗嬰。熙熙有生。以樂治平。天子萬年。成功則告。刻文登封。則有貞玉。

大都城隍廟碑

世祖聖德神功文武皇帝。至元四年。歲在丁卯。以正月丁未之吉。始成大都。立朝廷宗廟社稷官府庫庾。以居兆民。辨方正位。井井有序。以爲孫子萬世帝王之業。七年。太保臣劉秉忠。大都留守臣段貞。侍儀奉御臣忽都于思。禮部侍郎臣趙秉溫。言大都城旣成。宜有明神主之。請立城隍神廟。上然之。命擇地建廟。如其言。得吉兆于城西南隅。建城隍之廟。設象而祠之。封曰祐聖王。以道士段志祥築宮其旁。世守護之。自內廷至於百官庶人。水旱疾疫之禱。莫不宗禮之。爾來六十有餘年。國家治平。民物繁阜。日盛一日。而神之所依亦厚矣。祀典之載。所謂有其舉之。而莫之敢廢者歟。迺天曆二年二月庚子。皇后遣內侍傳旨。

中政院臣使言于上曰。城隍神廟。世祖皇帝時所建。有禱必應。烜赫彰著。而廟久弊弗葺。無以答神明之
貺。以繼世祖之意。請出內帑寶鈔五萬緡以修制。曰。可。命京尹臣賈某董之。太史以諏日弗協。請俟其言。
九月。中書參知政事臣趙世安等奉勅封神。曰。護國保寧佑聖王。其配曰。護國保寧佑聖王妃。至順二年。
二月癸亥以前。所賜爲未足用。增賜寶鈔十萬緡。大修治之。平章政事臣阿禮海牙。工部尙書臣岩穆忽。
爾實奉詔領其事。且命之曰。庀工而有餘資。則以賜諸廟中。給恒用。於是工部率其屬以卽役。土木瓦石。
金碧丹堊。旣善旣足。百工並作。無敢不虔。未幾而告功。於是。有勅史臣集製文刻石。以垂示無窮。臣集拜。
手稽首而言曰。聖上受命自天。纂承大統。師武臣力。著功盟府。百靈相協。固其宜哉。聖后輔佐聖明之成。
功。而一神之報。亦不敢忘。可以觀德。可以致福。可以示勸於臣矣。於戲盛哉。請系以詩曰。

維皇建國。宅中圖大。臨制萬方。式表無外。列雉四周。壯於天垣。爰立明神。以保固完。司空奉詔。慎擇吉土。
作廟坤維。以祝休嘏。相維典則。有社有方。羣黎萬姓。罔敢禴禋。維神孔邇。有堂有寢。曰。豫則康。威怒斯凜。
歲時牲牢。旨酒明粢。無有小大。士女畢來。列聖清明。歲行六十。風氣宣通。民物豐殖。相爾檐楹。丹堊弗新。
何以妥之。俾佑我人。皇上至仁。思保赤子。聖后念之。命禱靈時。天高日明。風塵不驚。大開明堂。治功告成。
有祈有報。伊古之道。出財宮府。撤弊改橈。山藻孔文。旣閒旣安。度其王封。載加彌尊。神來燕喜。百和萃止。
導天之貺。爲國之祉。室家祚胤。福祿萬年。貽及于民。生養弗愆。崇墉巖巖。太止之固。神永有依。斯皇多祐。

句容郡王世績碑

國家治平之業。所以尊安而久固者。禮樂刑政。一本於朝廷。而執干戈以衛社稷於四境之外者。則亦必

有桓毅過人之勇。直亮不回之節。以兼爪牙腹心之任。而又世世祖父子孫相承一志。然後可以內爲天子之所信倚。外爲疆敵之所懾服。故處常則有不可犯之勢。遭變則建非常之功。嗚呼。其所關係豈輕也哉。天曆元年。皇帝撥亂反正。以太平王右丞相燕帖木兒。有建謀力戰之功。思其祖父之績。乃敕史臣製文紀事。勒諸貞石。以示不朽焉。謹按欽察之先。武平北折連川。按答罕山部族也。後遷西北。卽玉黎北里之山居焉。土風剛悍。其人勇而善戰。有曲年者。乃號其國曰欽察。爲之主而統之。曲年生峻。末納。峻末納生亦納思。太祖皇帝征乞思火都。火都奔亦納思。遣使諭取之。弗從。及我師西征。亦納思老不能理其國。歲丁酉。亦納思之子孫忽魯速蠻。自歸於太宗。而憲宗受命帥師。已及其國。忽魯速蠻之子班都察。舉族來歸。從討蔑乞思有功。世祖皇帝西征大理。南取宋。其種人以強勇見信用。掌芻牧之事。奉馬湏以供。玉食。馬湏尙黑者。國人謂黑爲哈刺。故別號其人哈刺赤。日見親近。妻以哈納郡王之女弟。納論。中統初。兀討阿里卜哥之亂。班都察與其子土土哈皆有功。班都察卒。土土哈領其父事。是爲句容郡武毅王。海都之叛。皇子北平王。帥諸王之師。鎮祖宗龍興之故地。至元十四年。叛王脫脫木失列吉入寇。諸部曲見掠。先朝大武帳亡焉。土土哈王憤之。誓請決戰。三月。敗其將朵兒赤。延於納蘭。不刺。以所掠諸部還。四月。只兒瓦。鯁搆亂。應昌。脫脫木以兵應之。與我軍遇。將決戰。先得其斥候數十。脫脫木懼而引去。遂滅只兒瓦。解。六月。遂大兵於禿刺河。八月。又敗之。斡歡河。得所亡大帳。還諸部之衆於北平。我師北伐。詔欽察驍騎千人以從。十五年正月。追失列吉。踰金山。擒札忽台以獻。又敗寬赤哥等軍。俘獲甚衆。冬入朝。召至榻前。親慰勞之。賜以白金百兩。金壺盤盃各一。白金甕一。椀十。金織衣段九。海東白鶻一。國家侍內宴者。每宴

必各有衣冠。其制如一。謂之只孫。悉以賜之。且有詔曰。祖宗武帳。非人臣所得御。卿能歸之。故以與卿。軍中宴諸帥。則設之。欽察人爲民戶。及隸諸王者。別籍之。戶給鈔二千貫。歲給粟帛。擇其材者備禁衛。十九年。拜昭勇大將軍。同知太僕院事。明年。改同知衛尉院事。領羣牧司事。給霸州文安縣田四百頃。命哈刺赤屯田。益以亡宋新附軍八百二十一年。賜金虎符。以河南等路蒙古軍子弟四千六百隸之。又賜尙方金貂裘帽玉帶青鶴。近郊田二千畝。水磴一區。二十二年。拜鎮國上將軍。樞密副使。二十三年。置欽察衛。遂兼其親軍都指揮使。聽以族人將吏備官屬。六月。海都兵入寇。奉詔與大將朵兒朶懷禦之。二十四年。諸王乃顏叛於東藩。陰遣使來結也。不干勝刺哈。王獲諜者得其情。密以聞諸朝。請召勝刺哈以離之。他日。勝刺哈爲宴會。邀二大將。朵兒朶懷將往。王曰。事不可測。遂不往。勝刺哈計不得行。未幾。有詔召勝刺哈。王曰。此東藩之人。由東道是其欲也。將不可制。言於北安王。命之西行。或言也不干將反者。軍吏請奏而圖之。王曰。不可緩也。身爲先驅。引大兵以前。窮晝夜之力。渡禿刺河。與也不干戰。大敗之。世祖方親征。聞詔。王沿河而行。盡收其餘黨以還。道遇也鐵哥。其軍萬騎。擊走之。大獲乃顏畜牧。俘叛王哈兒魯等獻之。康里欽察之人。先隸諸叛王者。悉來歸。置哈刺魯萬戶府。是歲。王子劄兀兒奉詔從太師月兒律在軍。戰於百塔山。有功。拜昭勇大將軍。左衛親軍都指揮使。武金虎符。出則被堅執銳。以率虎熊之士。入則操刀匕以事割烹。執嬰杓以進。湏飲。親幸委任。已見於當時。成宗方撫軍。詔以王從。十一月。征乃顏餘黨於哈刺。誅兀達海。盡降其衆。二十五年也。只里王爲叛王火魯哈孫所攻。甚急。五月。王從成宗移師援之。敗諸兀魯灰。還至哈刺溫山。夜渡貴列河。敗叛王哈丹之軍。盡得遼左諸部。置東路萬戶府以鎮之也。只里

有女弟塔倫。遂以妻王。二十六年。海都犯金山。抵抗海嶺。皇孫晉王。帥兵禦之。敵先據險。我師不利。王獨其以軍陷陣入戰。翼晉王出。明日。追騎大至。王伏兵。面殿之。七月。世祖親巡北邊。召見王。而慰之曰。昔太祖與其臣之同患難者。飲班朮河之水。以記功。今日之事。何愧昔人。卿其勉之。海都等戰既數敗。又知上親征。遂引兵去。車駕還都。大宴。上謂王曰。朔方人來。聞海都言。戰者人人如土。土哈。吾屬何所容身哉。論功行賞。先欽察之士。以建康廬饒舊籍。租戶爲哈刺赤戶。又以俘獲之戶千七百賜之。官一子以督賦。而創兀兒在宿衛。亦帥其軍扈從。至於和林兀卑思之山。拜昭武大將軍。欽察親軍都指揮使。左衛親軍都指揮使。兼太僕少卿。二十八年。王奏哈刺赤之軍。數已盈萬。足以備用。詔賜珠帽珠衣。玉帶金帶。名鶻細毳。纁素萬匹。帥其人北獵漢塔海。邊寇聞之。不敢動。二十九年。掠地金山。虜海都之戶三千。有詔進取。乞思吉思。明年春。次欠河。冰行數日。盡收其衆。留兵鎮之。奏功拜龍虎衛上將軍。賜行樞密院印。海都聞之。領兵至欠河。又敗之。擒其將孛羅察。成宗皇帝卽位。詔之曰。邊事重。其免會朝。賜白金五百兩。七寶金酒器。白毳帳。鈔萬緡。獨峯駝五。冬。召入朝。有加賜。則賜其軍士鈔一千二百萬。元貞元年春。還守北邊。二年秋。諸王從海都者皆來降。邊民驚動。王帥兵金山之玉龍海備之。資饋畢給。民用不擾。親導岳木忽等主以朝。上解御衣以賜。又賜黃金百兩。白金千五百兩。鈔五萬。轎輿各一。大德元年。拜銀青榮祿大夫。上柱國。同知樞密院事。欽察親軍都指揮使如故。還邊。二月。至宣德府薨。年六十一。是年有詔。創兀兒世其父官。領北征諸軍。後亦封句容郡王。王帥師踰金山。攻八隣之地。八隣之南有大河。曰答魯忽。其將帖良臺阻水而軍。伐木柵岸。以自庇。士皆下馬跪坐。以待我軍。矢不能及。馬不可進。王卽命吹銅角。舉軍大呼。聲

振林野。坐士不知所爲。爭起就馬。王麾軍畢渡。湧水泊岸。木柵漂散。因奮師馳擊五十里而後止。盡得其人馬廬帳。還次阿雷河。與李伯拔都之軍相遇。李伯拔都者。海都所遣援八隣者也。阿雷之上有山甚高。李伯陣焉。山高駿馬不利於下馳。急麾軍渡河蹙之。李伯馬下坂。多顛躓。急擊敗之。追奔三十餘里。李伯僅以身免。二年。北邊諸王都哇徹禿等。潛師急至。襲我火兒哈禿之地。火兒哈禿亦有山甚高。其師來據之。王選勇而能步者。持挺刃四面上奮擊。盡覆其軍。斂遁者無幾。三年。入朝。上解衣賜之。慰勞優渥。拜鎮國上將軍。僉樞密院事。欽察親軍都指揮使。左衛親軍都指揮使。太僕少卿。還邊。是時武宗在潛邸。領軍朔方。軍事必諮於王。及戰。王常爲先。付托甚重。四年秋。叛王禿麥幹魯思等犯邊。王迎敵於闊客之地。及其未陣。王以其軍直搏之。敵不能支。遂之踰金山。乃還。五年。海都之兵。又越金山而南。止於鐵堅古山。因高以自保。王以其軍馳當之。旣得平原。地便於戰。乃并力攻之。敵又敗績。都哇之兵西至。與大軍相撓。於兀兒禿之地。王又獨以其精銳。馳入其陣。戈甲憂擊。塵血飛濺。轉旋三周。所殺不可勝計。而都哇之兵幾盡。武皇親見之。曰。力戰未有如此者。事聞。上使御史大夫禿只知樞密院事塔刺海也。可札魯火赤禿忽魯。卽赤納思之地。聚諸王軍。將問戰勝功狀。於是親王以下。至於諸軍。咸以爲王功第一。無異辭。於是安西王與王衣一鵝一騾二十。晉王與王衣一金椀二。獨峯駝四。而武皇命王尙雅忽禿楚王公主察吉兒。賞以尙衣貂裘。使者以功簿奏。上出御衣。遣使臨賜之。詔曰。邊圉事重。少留鎮之。七年秋。入朝。上親諭之。曰。自卿在邊。累建大功。事績昭著。周飾卿身。以兼金。猶不足以盡朕意。遂賜御衣一帽一玉頂笠一盤珠金衣一履。雙珠三囊。黃金百兩。白金五百兩。鈔十萬貫。鵝一。拜驃騎衛上將軍。樞密副使。欽察親軍都

指揮使。左衛親軍都指揮使。太僕少卿。賜其親軍萬人。鈔四千萬貫。九年。都哇察八兒明里帖木兒等諸王相聚而謀曰。昔太祖艱難。以成帝業。奄有天下。我子孫乃弗克靖。以安享其成。連年動兵。以相殘殺。是自傷祖宗之業也。今撫軍鎮邊者。吾世祖之嫡孫也。吾與誰家爭哉。且前與土土哈戰。旣累不勝。今與其子創兀兒戰。又無一功。惟天惟祖宗意可見矣。不若遣使請命罷兵。通一家之好。使吾士民老者得其善。少者得其長。傷殘疲憊者。得其休息焉。則亦無負太祖之所望於子孫者矣。使至上深然之。於是明里帖木兒等罷兵入朝。特爲置驛。以通往來。十年。拜榮祿大夫。同知樞密院事。尋拜光祿大夫。知樞密院事。欽察左衛指揮太僕少卿。皆如故。從武皇於渾麻。出之海上。成宗崩。訃至。入告武皇曰。殿下親世祖之嫡孫。以先帝之命。居祖宗之故地。以鎮撫朔方者。且十餘年矣。海都納木忽見明里帖木兒。自世祖時。各爲叛亂。今皆來歸。前後叛亡。俘虜悉復其舊。皆殿下之威靈也。臣先父土土哈。受知世祖。恩深義重。臣之種人。強勇精銳。臣父子用之。無戰不克。殿下急宜歸定大業。以副天下之望。臣請率其衆。備驂乘之士。武皇納其說。卽日南邁。以裕宗皇帝舊服。玉花衣。賜之。副以玉帶一。寶珠一。海東白鶻一。常御幄殿一。服用之具。咸備。行至和林。又賜鈔五萬貫。衣段百。五月。達上都。武宗皇帝卽位。賜王尙服七寶笠一。大寶珠衣一。盤珠衣一。黃金五百兩。白金五千兩。鈔二十五萬貫。先帝所御大武帳一。豹一。加賜公主珍寶尤厚。秋拜平章政事。仍兼樞密。欽察左衛太僕。還邊。冬。加封榮國公。授銀印。出制辭以命之。復有尙服衣段。虎豹之賜。中宮加賚於公主者。亦俱至焉。至大元年。遣使賜金衣三十。對衣千。二年入朝。封句容郡王。賜金印。玉手印一。七寶笠一。珠帽一。七寶帶一。玉帶一。七寶束帶一。黃金二百五十兩。白金一千五百兩。鈔一萬貫。鶻

四。豹二。上曰。世祖征大理時。所御武帳。及所服珠寶之衣。今以賜卿。其勿辭。翌日。又以世祖所乘安輿。賜王。上曰。以卿有足疾。故賜此。王叩頭泣涕固辭。而言曰。世祖所御之帳。所服之衣。固亦非臣所敢當。而乘輿尤非所宜蒙也。貪寵過當。臣實不敢。上顧左右曰。他人不知辭此。別命有司置馬。轎賜之。俾得乘至殿門下。仁宗在東宮。有衣帽金寶之賜。太后又有加賜。還邊。仁宗皇帝卽位。入朝。賜尙服衣一襲。金束帶一。黃金百兩。白金千兩。鈔五十萬。金對衣三十。金玉馬鞍一。太后加賜夏衣二十。鈔一十萬。氈帳一。穹廬十。特受光祿大夫。平章政事。知樞密院事。欽察親軍都指揮使。左衛親軍都指揮使。太僕少卿。延祐元年也。先不花等諸王。復叛。亦忒海迷失之地。王方接戰。有敵將一人。以戟入陣。刺王者。王擲其戟。揮大斧碎其首。血髓淋漓。殞於馬首。乘勢奮擊。大破之。遣使入報。有尙服之賜。二年。與也先不花之將。也不干。忽都帖木兒。戰赤麥干之地。轉殺周匝。追出其境。鐵門關。秋。又敗其大軍於札亦兒之地。上聞之。遣使賜勞。有加四年。上念王之功。而憫其老也。召之。命商議中書省事。知樞密院事。大理國進象牙金飾轎。卽以賜王。每見必賜坐。上食必賜食。待之以宗室親王之禮。王常曰。老臣受朝廷之賜厚矣。吾子孫不以死報國可乎。至治二年薨。年六十三。臣聞古之言將者。曰。謀與勇。惟王父子。沈機大略。固不可測。而其軍堅悍。標疾。有所攻戰。應聲而起。神變倏忽。奮無迴顧。智者不暇慮。勇者不及舉。而已敗衄無餘矣。此其所以致勝也。而又數世之傳。一軍之士。同稟忠義而不變。同赴患難而不辭。此其成大功。享大名。而膺國家之深信。異寵者歟。謹按王世家。忽魯速蠻。贈推忠効順功臣。金紫光祿大夫。大司徒。柱國。句容郡王。諡剛毅。妻帖古該。句容郡王夫人。班都察。贈推誠宣力保義功臣。太尉。開府儀同三司。上柱國。句容郡王。諡忠定。妻秃倫察。

句容郡王夫人。土土哈。贈宣忠定遠佐運功臣。太尉。開府儀同三司。句容郡王。諡武毅。妻曰太塔你札只刺真也。曰兀買八里真也。曰囊加真。益吉刺真也。曰阿八倫。益吉刺真也。曰塔倫也。也只里王女弟也。皆封句容郡王夫人。子八人。長曰塔察兒。定遠大將軍。北庭元帥。次曰太不花。御位下博兒赤。三曰劄兀兒。四曰別里不花。武略將軍。欽察親軍千戶。五曰帖木兒不花。武德將軍。管領建康廬饒等處土土哈并哈刺赤戶計達魯花赤。六曰歡差。武略將軍。欽察親軍千戶。七曰岳里帖木兒。武德將軍。僉武衛親軍都指揮使。兼大都屯田事。八曰斷古魯班。昭勇大將軍。欽察親軍都指揮使。女五人。曰曲出伯。曰完者台。曰朵兒只。曰訥倫。曰某。劄兀兒之妻。察吉公主。楚王女也。曰也先帖你塔塔兒真也。曰也先忽都魯宗室也。只里女弟。曰哈刺真塔塔兒真也。子七人。長曰小雲失不花。武略將軍。欽察親軍千戶。蚤卒。次曰燕赤不花。資德大夫。大司農卿。三曰燕帖木兒。太平王。荅刺罕右丞相。四曰撒敦。榮祿大夫。宣徽院使。五曰燕禿哈兒。闌遺少監。蚤卒。六曰答里。曰國公。七曰潑皮罕。幼卒。女四人。長曰忙哥台。適失禿兒駙馬弟太忽禿魯。次曰完澤台。適相哥八刺王。三曰納只罕。適沙藍朵兒只王。四曰月魯帖你。適阿魯灰帖木兒王。臣拜手稽首而作銘曰。

維皇太祖。受天明命。龍旗建旂。神旅用振。雲雷險屯。盤桓奮興。邇伐遠攻。羣方畏懲。既定大業。以遺孫子。分地有疆。維絡森峙。維支之疆。宗于本根。孰披則離。孰固以存。赫赫世祖。大集厥成。天覆日臨。無往不庭。顧茲臣庶。嚮屬無外。天未悔禍。屬近而悖。挺爲強暴。弄兵嬉狂。弗念弗懷。勞我父兄。我無藏怒。往正迷德。維時虎臣。無禦不克。虎臣維何。欽察世家。克長克君。爲國爪牙。相厥種人。均勇同悍。爾鬼爾師。累百盈萬。

牧則善芻。飲漙孔腴。衽金以居。鳴箭以趨。鳴箭咽咽。壯士心折。卷甲齊驅。千憤一快。孰爲叛夫。子旅于廬。王先伐謀。隨以勦屠。勿敢寧止。不虞奄至。潰不暇奔。況及鬥死。父子百戰。從于宗藩。或拔或援。我圉永完。天不與畔。思禍知悔。力困于外。心服于內。來言來歸。矢辭大同。洒濯拜稽。以朝成宗。王護其來。徒御不驚。肅肅邊人。同我太平。桓桓武皇。實善將將。定策驂乘。王猷用壯。紀功則隆。論賞則豐。帝胄作嬪。五世王封。世忠世勇。列聖所使。千載之傳。國有信史。句容之墟。接于太平。今王之疆。天子所營。其功非常。報亦殊特。勒勳北郊。昭示萬國。

道園學古錄卷之二十四

應制錄四

碑銘

曹南王勳德碑

中書右丞相臣燕帖木兒等言。陛下入正大統。道汴梁。命山東河北蒙古軍都萬戶府都萬戶野速迭兒。以其兵從至京師。以功拜河南等處行中書省平章政事。於法官一品當贈三代官封也。速迭兒曾大父撥徹。大父也。柳干。父阿剌罕。嘗爲大將。戰功多。又皆死王事。軍中宜追封以第一等爵。制曰。可。有司以詔書議贈所當得官。按地定封。於是故贈定威佐運功臣榮祿大夫司徒上柱國曹國公。諡忠定。撥徹。加贈定威佐運功臣光祿大夫司徒上柱國。追封曹南王。諡如故。故蒙古漢軍都元帥贈宣忠靖遠功臣光祿大夫中書右丞相上柱國曹國公也。柳干。加贈宣忠靖遠佐運功臣金紫光祿大夫中書右丞相上柱國。追封曹南王。仍諡桓毅。故光祿大夫中書左丞相贈協謀佐理功臣太師開府儀同三司上柱國曹國公。諡武定。阿剌罕。加贈竭誠宣力定遠佐運功臣太師開府儀同三司上柱國。追封曹南王。改諡忠宣。曾祖母塔拜。祖母滅烈。母脫端。闕闕倫。皆先封曹國夫人。改封曹南王夫人。制下有勅國史臣集。其以曹南王世家行事歲月著文于其神道之碑。臣集受詔。謹按撥徹蒙古札刺兒台氏。太祖皇帝初起朔方。豪傑之士雲起響應而從之。爲之腹心爪牙者。必皆有深智遠識。有勇而善謀。是以東征西伐。無不如志。以成萬

世之業者。天爲之生材。而聖神善用之故也。撥徹自其幼年。已在宿衛。爲火而赤。火而赤者。服御弓矢。常侍左右者也。又爲博而赤。博而赤者。親烹飪以奉上飲食者也。蓋非篤慎強敏見知而親信任使者。不得預。是以屬車所回。無不在行數。以徇戰掠地著功受賞。太宗皇帝卽位。仍以其職從征行。隴北陝西之役。攻城壁。取郡縣。率先戰士。竟死之也。柳干繼爲火兒赤博兒赤。膺其父之職也。以太宗之命。事岳里吉太子。爲番衛之長。歲乙未。闕出忽都禿太子。出師伐金。遂侵宋。有旨出從戰。戰有功。拜萬戶。方是時。察罕以太祖所拔重臣爲大將。位望崇甚。而也柳干以天下馬步禁軍都元帥。爲察罕之副。總領諸翼蒙古漢軍。馬統領屯戍大軍。南面之征。最爲重兵矣。於是取陝西。掠河東。踐河南。歲乙卯。擣光壽。大帥察罕歿。憲宗皇帝命也柳干代之。拜諸翼軍馬都元帥。統大軍攻淮東西諸城。歲戊午。帥師至揚州。數出戰。遂以戰死。阿刺罕以諸翼蒙古軍馬都元帥。統其父之軍。從世祖皇帝南伐宋。憲宗崩。世祖北還。卽皇帝位。從至末。黎伯顏孛刺之地。阿里不哥阿益歹兒渾都海。興兵爲亂。不受詔命。討之。阿刺罕以其所部蒙古軍擊之。北至昔門禿之地。遂追之至河西。功成而還。中統建元之歲。賞功。賜黃金五十兩。且耳答衣九襲。且耳答者。西域織文之最貴者也。二年。濟南帥李璫以山東反。大發兵討之。阿刺罕總其衆。次老倉口。以進戰。明年。濟南破。璫誅。山東平。師還。又明年。賞功。賜黃金虎符一。銀印一。弓一。矢百。弓矢之服。黃金飾其具。馬鞍轡一。黃金塗銀飾其具。以舊官將其軍。至元初。大軍伐宋。五年。師圍襄樊。力戰數有功。論賞。賜白金五十兩。金織文衣九襲。十一年。取宋。大軍渡江。阿刺罕以其師取鄂州。泝江陵。下至荊口。所至郡縣降其軍。慰撫其民。明年。拜昭毅大將軍。統其師發建康。道溧水。溧陽。指獨松關。抵杭州。上方道與宋將吳某等戰。

斬之。斬首七千級。又與宋將祝亮戰。擒亮。并其裨校七十二人。斬首三千餘級。又與宋兵戰。斬首七千餘級。又斬逐其援兵。退走數十里。宋將奉使吳某。都統丁某。總制趙某。來逆戰。敗之。斬首三千級。擒總制谷某。又擒宋將張八。其裨校。斬首二千級。六月。卽軍中拜中奉大夫。行中書省參知政事。是年。宋亡。明年。伯顏丞相以宋主入覲。九月。阿剌罕帥師東渡浙。取越。明。溫。台。衢。婺。處。及閩中諸郡。追宋宗室秀王某。道數戰。皆敗之。降其運使趙某。提刑趙某。五百餘人。至福州。與宋軍轉戰四十餘里。斬步帥觀察使李世達等。於陣。殲其軍。獲秀王。及其家屬將吏百八十餘人。降其部曲淮卒三千人。於是江南悉平。十二月。有詔以中奉大夫。中書參知政事。授金虎符。行江東宣慰使。郡縣新附。民心未安。威信未孚。莫不悅服。十四年。入覲。上嘉其功。懋勞甚厚。進拜資善大夫。中書左丞。仍還宣慰江東。十六年。六月。進拜資德大夫。中書右丞。仍留宣慰江東。十八年。入覲。方是時。海內悉已平定。舟車所至。莫不服從。而日本叢爾海島之間。彌固自保。有司以致討爲言。天子從之。廼賜玉帶一。金鞍一。弓一。矢百。弓矢之服具。命爲中書左丞相。行省事。統蒙古諸翼軍馬四十餘萬。往征之。師次明州。且渡海矣。歿焉。旣歿。而子也速迭兒幼。拜降也。速迭兒之兄也。襲世職。爲萬戶總其軍。後以功。僉書江淮行樞密院事。進拜江浙行省右丞。福建行省右丞。河南行省平章政事。仍領其先世萬戶軍馬。旣歿也。速迭兒以元貞元年。世其職。授昭勇大將軍。左手蒙古軍萬戶。佩金虎符。武宗皇帝在位。思勳舊將帥之家。求其子孫之有功有能者。故於也速迭兒有加。賚焉。命玉工刻白玉爲也速迭兒所署字。使以畫文書。發號令於所部。使其爲上所尊信者。皇慶改元。賜白銀五十兩。金織文衣二襲。延祐三年。覃恩加昭毅大將軍。至治改元。賜白金五十兩。金織文衣二襲。泰定三年。進

昭武大將軍。皆以萬戶總其軍。如故。後二年。今上皇帝南還京師。將有大正於天下。道過汴梁。今太保伯顏公方鎮汴省。八月庚子。召也速迭兒帥其兵以行。乙巳。兵大集。士卒感激赴義。車馬器械精備。勇氣自倍。丁未。命爲本省參知政事。賜黃金五十兩。玉帶一。鑲鐵鑲刀一。師行。庚戌。進爲本省平章政事。仍兼山東河北蒙古軍都萬戶府都萬戶。賜銀印一金。三珠虎符一。黃金五十兩。白金倍之。玉帶一。海東青鶻一。至真定。賜名馬二。至新樂驛。賜黃金五十兩。甲一襲。至慶都。賜碼碯盤杆一。綉青絨袍一。九月庚申。爲同知樞密院事。仍兼都萬戶。賜寶飾鑲鐵槌一。鑲鐵寶刀一。壬申。皇帝卽位大明殿。建元天曆。明日拜知樞密院事。授以樞密院印。仍領其萬戶事。甲戌。禿滿達兒自遼東引兵寇通州。賜寶劍弓矢鞍轡。令也速迭兒帥諸翼軍馬出禦之。丙子。王禪等之兵軍於北皇后店。也速迭兒移兵合擊敗之。己卯。哈刺赤渾都帖木兒阿刺帖木兒之兵軍於昌平縣東。白浮材帥師合擊敗之。壬午。昔寶赤大都之兵軍於昌平縣東北。又帥師合擊敗之。凡來寇之兵。悉已敗。總兵者。或執或敗走。北面悉平。癸未。太師右丞相會諸將於龍虎臺下。奏凱於朝。有勅命也速迭兒守居庸之北。闕壘石以爲固。十月己亥。拜榮祿大夫。知樞密院事。依前兼管都府事。統領諸翼蒙古軍馬。使出師禦寇兵之西入者。師次廣平磁州之武安縣。敗獲總兵者也先帖木兒等。而西南諸郡。以次告平。庚子。召還。辛丑。賜白金五十兩。中統鈔五千貫。金織文衣二襲。十一月丁亥。樞密院奉勅。散諸軍行院官還京師。明年二月。以舊官復拜山東河北蒙古軍都萬戶府都萬戶。三月。賜以只孫宴服。只孫者。貴臣見饗於天子。則服之。今所賜絳衣也。貫大珠以飾其肩背。膺間首服亦如之。副以納赤思衣等七襲。納赤思者。縷皮傅金爲織文者也。海東青鶻二。五月上之上都也。也速迭兒仍

帥其所統兵從。八月賜白金五十兩。金織文衣一襲。十月癸卯。皇帝若曰。也。速迭兒。屬囊鞬以備干城。恪恭職事。朕用嘉之。其以爲河南行中書省平章政事。代乞住。移乞住他鎮。十一月丙寅。以所統兵置大都督府。命兼山東河北蒙古軍大都督。秩從二品。刻銀印賜之。己巳。有封贈之命。嗚呼。上之所以待功臣將帥。寵錫榮耀。不亦盛乎。臣嘗聞之。自昔國家所貴。有勳舊之臣者。以其君臣之契深。宗社之事諗。逆順向背之道。素定於見聞。而愛敬之誠。自有不能已者。故其得備戎行。氣決志憤。以能成功也。世祖皇帝。既定海內。以蒙古一軍。留鎮河上。與民雜耕。橫互中原。故將委忠信於國人。備非常於他日。其所以爲子孫計者。深且遠矣。今上皇帝。以天縱之資。歷造昧之久。奮名義以致討。夙逆應天人而歸履大位。固歷數之所在也。若曹南王家。自開基以來。已入備禁衛。出死行陣者。三世矣。今平章以其世守之舊兵。奉中興之大業。以致真王之封。食所居之邑。聲振大藩。受軍民之寄。福祿方未艾也。嗚呼。偉哉。敢再拜稽首而爲之銘詩曰。

昔在太祖。受命自天。聖子神孫。師武用宣。世祖赫赫。一是萬國。帝臣孔多。貴有世績。忠定之興。承國肇基。廼執干戈。廼奉鼎彝。不寧方來。先後奔走。盡瘁殞身。以昌厥後。有竭桓毅。益信以崇。帝討王誅。無往不從。金氣旣衰。宋亦就蹙。兼弱攻昧。我帥我督。截彼淮浦。其流湯湯。蹀血以終。厲我國殤。克繼父祖。忠宣之武。天錫之功。世皇是輔。肅肅南征。絕江擣城。左纛振旅。馳追不庭。世皇御天。於鑠如日。式園不遺。聲教廼訖。于時出師。有專有分。江漢之間。忠宣所軍。蒙衝載兵。遡江薄海。列郡風靡。有順無悔。旋指江東。進師合攻。關柵兒嬉。孰常吾鋒。斬將連營。覆卒盈野。廼會元戎。于城之下。變變屏聲。解壘入朝。掠其餘疆。曾不崇朝。

既定甌越。成功來告。命以相臣。持節東道。治以歲成。位以序升。入覲天子。龍光是承。天子曰嘻。蠢彼海裔。爾相于佐。帥士以濟。臨涯揚舩。海若弭靈。天不愆遺。亟殞將星。忠宣所統。國人之勇。留戍羅絡。齊魯梁宋。鼓旗閒閒。武帳在中。既世其官。又世其功。今我聖皇。中興以正。錫鑾在塗。萬騎前乘。誰其將之。不二之臣。彼壘于郊。摧之爲塵。聖皇賞功。寶玉鷹馬。還長其鎮。爲國名虎。額額爾軍。何以表之。爾建大府。都督之旗。爾家于曹。有桑有土。昔公今王。三世之祐。豐碑烈功。備書三王。咨爾多士。勸忠勿忘。

高昌王世勳之碑

至順二年九月某日某甲子。皇帝若曰。予有世臣。帖睦兒補化。自其先。舉全國以歸我太祖皇帝。定贊與運動。在盟府。名著屬籍。世績令德。以勵相我國家。至帖睦兒補化。佐朕理天下。爲丞相。爲御史大夫。文武忠孝。厥績懋焉。昔其父葬永昌。大夫往上塚。其伐石樹碑。而命國史著文而刻焉。臣某頓首受詔。退而考諸高昌王世家。蓋畏吾而之地。有和林山。二水出焉。曰禿忽刺。曰薛靈哥。一夕有天光降于樹。在兩河之間。國人卽而候之。樹生瘦若人。姪身。然自是光恒見者。越九月。又十日。而瘦裂得嬰兒五。收養之。其最穉者。曰卜古可罕。既壯。遂能有其民。人土田。而爲之君。長傳三十餘君。是爲玉倫的斤。數與唐人相攻戰。久之。乃議和親。以息民而罷兵。於是唐以金蓮公主。妻的斤之子。葛勵的斤。居和林。別力跋力荅。言婦所居山也。又有山口。曰天哥里干荅哈。言天靈山也。南有石山。曰胡力荅哈。言福山也。唐使與相地者。至其國。曰和林之盛強。以有此山。蓋壞其山以弱之。乃告諸的斤。曰。既爲婚媾。將有求於爾。其與之乎。福山之石。於上國無所用。而唐人願見。遂與之。石大不能動。唐人使烈而焚之。沃以醇酢。碎石而輦去。國中鳥獸。爲之

悲號。後七日，玉倫的斤薨。自是國多災異，民弗安居。傳位者數亡，乃遷居交州。今火州也。統別失八里之地。北至阿木河南，接酒泉。東至兀敦田石哈西，臨西蕃。凡居是者，百七十餘載。而我太祖皇帝龍飛於朔漠。當是時，巴而朮阿而忒的斤亦都護在位，亦都護者，其國土號也。知天命之有歸，舉國入朝。太祖嘉之，妻以公主，曰也立安敦。待以子道，列諸第五。與者必那顏征罕，勉力鎖潭，回回等國將部曲萬人，以先啓行紀律嚴明，所向克捷。又從太祖征你沙卜里，征河西，皆有大功。薨，次子玉古倫赤的斤嗣爲亦都護。玉古倫赤的斤薨，子馬木刺的斤嗣爲亦都護。將探馬赤軍萬人，從憲宗皇帝伐宋合州，攻釣魚山，有功。還軍火州薨。至元三年，世祖皇帝命其子火赤哈兒的斤嗣爲亦都護。海都帖木迭兒之亂，畏吾而之民遭難解散，於是有旨，命亦都護收而撫之。其民人在宗王近戚之境者，悉遣還其部。始克安輯。十二年，都哇卜思巴等率兵十二萬圍火州。揚言曰：「阿只吉與魯只諸王以三十萬之衆，猶不能抗我，而自潰。爾敢以孤城嬰吾鋒乎？」亦都護曰：「吾聞忠臣不事二王，且吾生以此城爲家，死以此城爲墓，終不能爾從。」城受圍六月不解。都哇系矢以書射城中曰：「我亦太祖皇帝諸孫，何以不歸我？且爾祖尙主矣，爾能以女歸我，我則休兵，不能則亟攻爾。」其民相與言曰：「城中食且盡，力已困，都哇攻不止，則淪胥而亡。」亦都護曰：「吾豈惜一女而不以救民命乎？然吾終不能與之相面也。」以其女也立亦黑迷失別吉，厚載以茵，引繩墜諸城下，而與之都哇解去。其後入朝，上嘉其功，錫以重賞。妻以公主，曰巴巴哈兒。定宗皇帝之女也。又賜寶鈔十萬，定以賑其民。還鎮火州，屯於南哈密力之地。兵力尙寡，北方軍猝至，大戰力盡，遂死之。子紐林的斤方幼，詣闕請兵北伐，以復父讎。上壯其志，賜金幣鉅萬。妻以公主，曰不魯罕。太宗皇帝之孫女也。主薨，又

尙其妹。曰八卜叉公主。有旨師出河西。俟與北征大軍齊發。遂留永昌焉。會吐蕃脫思麻作亂。詔以榮祿大夫平章政事領本部探馬赤等軍萬人鎮吐蕃宣慰司。威德明信。賊用斂迹。其民以安。武宗皇帝召還。嗣爲亦都護。賜之金印。復署其部押西護司之官。仁宗皇帝始稽故實。封爲高昌王。別以金印賜之。設王傅之官。其玉印行諸內郡。亦都護之印。則行諸畏吾而之境。八卜叉公主薨。尙主曰兀刺真阿難答。安西王之女也。領兵火州。復立畏吾而城池。延祐五年十一月廿一日薨。子二人。長曰帖睦而補化。次曰錢吉。皆八卜叉公主出也。帖睦而補化。大德中尙公主曰朵兒只思蠻。闊端太子孫女也。至大中從父入備宿衛。又事皇太后於東朝。拜中奉大夫大都護。陞資善大夫。又以資善出爲鞏昌等處都總帥。達魯花赤。奔父喪於永昌。請以王爵讓其叔父欽察台。不允。嗣爲亦都護。高昌王。至治中與喃荅失王同領甘肅諸軍。且治其部。泰定中召還。與寬徹不花威順王買奴宣靖王闊不花靖安王分鎮襄陽。尋拜開府儀同三司。湖廣行省平章政事。今上皇帝歸正大統。召之至汴。以左丞相留鎮湖廣。時左轄相媚而害政。人所弗堪。至是有旨執而僇之。乃更爲申救於上曰。是誠有罪。然不至死。再三言之。得釋。其不念舊惡。以德量贊襄。類如此。天曆元年十月拜開府儀同三司。上柱國。錄軍國重事。知樞密院事。明年正月以舊官勳封拜中書左丞相。三月加太子詹事。十月拜御史大夫。大夫之拜左相也。追念先王之遺意。讓其弟錢吉。嗣爲亦都護。高昌王。臣惟高昌祖之所自出。事甚神異。其子孫相傳數十代。至于今。克治其上。豈偶然哉。火赤哈兒的斤百戰以從王事。捐骨肉以救其民。後卒死之。其節義卓然如此。至其子與孫再世三王。盛德之報也。大大世胄貴王。清慎自持。戶庭之間。動中禮法。平易以近民。正己以肅物。仁義之功。沛如也。及其臨大

政。扶大議。變深思。遠而聲容。凝重若太山。然用能彌綸大經。以佐成雍熙之盛。所謂社稷之臣也哉。表其碑曰。世勳爲宜。敢再拜系以詩曰。

維皇太祖。建極定邦。知幾先徠。偉茲高昌。列國卒賦。寶玉重器。稽首受命。以表誠至。太祖曰。嘻。天啓爾衷。有附匪疏。以究爾功。鑿鞬介冑。十千維旅。以從四征。斥廣疆宇。從我王事。靡鮮朝夕。邦之世臣。食其舊邑。舊邑高敞。介乎強藩。爲暴突來。虔劉以殘。保障扞城。我禦我備。敵爲弗順。我死無貳。崇墉言言。寇來完繁。力殫守堅。責我師昏。有齊季女。出女紆難。義有絕愛。皇用咨嘆。寇退民完。天子慨之。輦帛載金。恸斯漑之。城郭室家。旣還旣復。庶其寧我。皇錫之福。于廬于處。狂譎倚之。矢盡衆殲。執節死之。維時賢嗣。泣血入告。請揚天威。以報無道。天子壯之。俾軍于西。撫爾民人。授之鼓鼙。有譟西羌。弗靖以撓。移節征治。旋就馴擾。武皇纘武。瞻爾舊服。節旄印綬。仍護其屬。乃稽王封。在時仁宗。旂纛舒舒。刻章以庸。廼卽永昌。幕府斯建。將星宵隕。亦旣卽遠。宰木陰陰。閱歷歲時。顧瞻徘徊。邦人之思。大夫嗣德。克敬以讓。三命彌恭。世爵用享。珮玉瓊琚。靖共以居。躬行孝嚴。服御不渝。肅肅雖誰。有察有容。親親尊尊。允德允功。天子還歸。大義攸正。大夫在行。民信以定。旣安旣寧。治久告成。大夫司憲。百度孔明。袞裳赤舄。進見退思。敬于無虞。匪泰伊怵。大夫中。明哲以孚。嘯歙有懷。永昌之虛。天子有詔。大夫省慕。勒文載碑。世勳是祚。維王孫子。永言思之。豈惟子孫。百辟其儀之。

大崇禱寺碑

昔在我世祖皇帝。膺上天之景命。承太祖之丕基。混一海宇。建立制度。條理綱紀。一出睿思。以爲子孫萬

世之成法者。昭乎若天旋而日行也。乃若崇尚佛教。營治塔寺。亦必弘偉殊勝。足以聳神明之瞻者。曆數在躬。天之所命。孰能違之。若夫大雄妙覺之尊。以其慈威定慧。默相潛佑者。必有其徵矣。是以累聖相承。率是而行之也。今上皇帝。潛邸在金陵時。於其暇日。登鍾山而觀之。見其江山之縈迴。樹藝之廣茂。民庶之熙洽。慨然興嘆。以爲我祖宗德澤之涵煦。以至于斯也。問諸邦人父老。則又以爲昔有聖僧曰寶公者。自梁以來。委靈茲山。能祖我國家之神化。以覆護吾民也。水旱疾疫。凡有禱焉。隨願輒應。於是皇上感焉。鍾山之陰。有石岩中。虛下出流泉。注入功德水。乃卽岩中。作觀音大士象。岩前構木棧。虛容瞻禮者。旣而又以爲未足。卽翫珠峯之北。得高爽之福地。規置大刹。宮殿樓閣。如自天降。寶公之塔在峯上。正當其前。來茲山者。仰而望之。如見天宮於林壑之表。然後聖上仁民愛物之心。所以屬諸寶公者。衆庶莫不知之。相與踴躍而贊歎矣。鍾山之舊寺。聚銅數萬斤。鑄大鐘。金旣在鎔。皇上以碧珠投之。及鐘成。珠不壞。完好堅固。宛在鑿銑。萬目驚覩。以爲寶公之報貺焉。天曆元年九月□日。臣某入見內殿。親詔之曰。宜加寶公號。曰道林真覺。慈應普濟。寺曰大崇禧寺。汝某其勒文以記之。臣某旣具述其事。而竊思之曰。帝王之興也。天與之。天保之。百靈受職。符瑞交現。此其常也。金陵據東南之會。山川鬼神。翼扶翕張於吾君者。蓋凡五年。而後歸正大統。皇心之注於斯乎。嗚呼。累朝佛宇之盛。皆臨御時。爲民禱禱。資用功力。有可具焉。今崇禧之成。實在試難之日。出私財以具事。而雄麗若此。此固生民之所以深感乎淵衷。而寶公之所。以顯著於禎符者也。嗚呼。休哉。敢再拜稽首而獻銘曰。

大江之南。鍾山龍盤。王氣潛鬱。神所保完。於皇聖明。遵養時晦。靈示奉天。竦立以待。春殷秋高。來遊來遨。

旂有交龍。載雲在郊。顧瞻原隰。有稼有穡。元元之生。聖聖之澤。民亦望之。帝子寔來。不鄙我邦。庶無苦哉。維梁寶公。去之千歲。善福其民。有引弗替。皇運勃興。寶有慧知。奔走先後。克相厥時。奕奕祠宮。我營我作。我報無私。爾感無作。吉金之良。燥濕不移。萬石在簾。投以碧珠。寶乃發祥。以肅羣眚。明珠不灼。彰上之賜。飛龍在天。臨制九圍。皇心徘徊。眷茲崇禱。崇禱之宇。永殿南服。天子萬年。錫我民福。

集慶路重建太平興國禪寺碑

昔金陵有神僧曰寶誌。宋元嘉中居道林寺。歷齊至梁。數著靈異。天監十三年示寂。武帝感其遺言。瘞諸鍾山。獨龍之阜。帝女永安公主。表以浮屠。因建寺曰開善。至宋太平興國中。太宗得誌公秘識石中符其國運。有神降其宮。親與之語。蓋誌公云。太宗異之。號寶公曰道林真覺菩薩。更名寺曰太平興國。賜田以食其人。熙寧中。王丞相安石守金陵。合諸小刹以附益之。寺始大。建炎燬於兵。紹興中更作。淳熙中又燬。隨更作之。每更作輒加宏廣。日葺月累。至於我國朝。而規制之盛極矣。至治辛酉。匡廬僧守忠應請來主之。禪學之士來者日滿其室。今上皇帝以泰定乙丑之歲正月來。至於是邦。而寺適災。天意若曰。其撤舊而作新之乎。皇上感焉。出金幣以爲民先。於是行御史臺與郡縣之吏。皆祇若上意。始忠之治寺也。時有蒲蘆之澤。前見奪於豪家。寺隸訟之。累年弗決。忠至讓而弗辨。奪者愧而歸之。人固以是信道之矣。皇上一風動之。遠邇雲集。富者効其財。貧者輸其力。工則致其巧。農則獻其食。一歲垣廡成。再歲堂室具。其可。以名書者。曰方丈。曰北山閣。曰經樓。曰香積。曰水陸堂。曰白蓮堂。曰伽藍堂。曰大僧堂。曰道林堂。曰新倉院。曰耆宿之舍。而大佛殿鍾樓三門未成。蓋有待也。歲在戊辰。鑄大鐘。爲金數萬斤。方在冶。上施寶珠投。

液中鐘成。其款有曰：皇帝萬歲珠。宛然在其上。若故識之。而光彩明發。不以灼毀。萬目共覩。歡歎如一。時上方別建佛祠於寺北。今賜名曰大崇禧萬壽寺者也。是年秋。皇帝歸膺大寶。是爲天曆元年。出詔書。布德澤於天下。卽命廷臣製寶公號。曰道林真覺惠感慈應普濟聖師。封名曰以禮祠之。出黃金白金重幣。以賜忠俾成寺之役。蠲寺田之賦。賜守忠爲佛海普印曇芳禪師。住持大崇禧萬壽寺。兼領茲寺。未幾。加授太中大夫。以大禪寺領兩寺如故。至順元年秋。御史中丞趙世安。傳勅召忠入朝。九月九日。上御奎章閣。三藏國師吏部尙書王某。以守忠入見。奏對稱旨。命大禧宗禪院。日給糜餼。賜金欄伽黎衣。與青鼠之裘。其弟子以教紹基等凡九人。賜各有差。十二月一日。賜設於聖恩寺。乃詔學士臣某。至榻前。製文以記之。俾忠歸刻諸石。國師以其事示臣某。如此。臣謹具載而言曰。上於金陵新作之事。二曰龍翔集慶。因潛龍之舊邸也。曰崇禧萬壽。廣親構之新祠也。獨太平興國。雖曰宋齊梁陳唐宋之遺。然盡燬而復興。實在今上龍飛之日。景運之玄契。蓋有徵焉。茲三寺者。鼎立乎一郡之間。以同贊乎聖天子億萬斯年之壽。豈不盛哉。然臣嘗竊聞陛下之意。每不欲專福于躬。而欲溥濟均惠於天下。故敢述萬一而銘之。銘曰。維帝受命。厥有禎符。天人合機。不占以孚。於赫聖皇。聖武之系。贊于克艱。神作司契。皇有萬方。山川幅員。釐厥下土。徒御告勤。顧瞻道林。在江之汨。翠蓋孔旒。來狩來止。道林有宮。百靈攸宗。中有神師。民所敬恭。士良泉甘。風雨時若。發祥效珍。以待聖作。聖作孔時。動而天隨。龍躍以飛。神師啓之。神師不言。而示以兆。有命方新。去故以燎。作而新之。自我聖皇。乃祓乃除。乃基乃堂。日月重明。天光旁燭。皇心載欣。萬佛降福。凡我臣民。息養以生。飽歌煖嬉。稚壯耄寧。裹兵以革。牛馬在野。至於永久。樂其休暇。輓動孳殖。亦遂以成。

幽塞苦窶。各鬱而亨。聖皇之心。斯佛之力。銘以著之。以示無極。

道園學古錄卷之二十五

應制錄五

碑

大龍翔集慶寺碑

欽天統聖至德誠功大文孝皇帝。自金陵入正大統。建元天曆。以金陵爲集慶寺。使傳旨行御史臺大夫阿思蘭海牙。命以潛龍之舊。作龍翔集慶寺云。明年。召中天竺住持禪師大訶於杭州。授太中大夫。主寺事。設官隸之。畫宮爲圖。授吏部尙書王僧家奴住董其役。斥廣其地。爲民居者。悉出金購之。土木瓦石丹堊金碧之需。財自內出。不涉經費。工以備給。役弗違農。有司率職庀工。景從響應。御史中丞趙世安承稟於內行。御史中丞亦釋董阿忽都海牙。相繼率其屬以莅之。吏敏於事。民若不知。材旣具。期以明年正月甲子之吉。迺建立焉。其大殿曰大覺之殿。後殿曰無量壽佛之殿。居僧以致道者。曰禪宗海會。居其師以尊道者。曰傳法正宗之堂。師弟子之警發辨證者。曰雷音之堂。法寶之儲。曰龍藏。治食之處。曰香積。鼓鐘之宣。金穀之委。各有其所。繚以垣廡。闢以三門。而佛菩薩天人之象。設纓床蓋座嚴飾之具。華燈香樂之奉。與凡所宜有者。精備以稱上意焉。賜姑蘇腴田。以飯其衆。上在奎章閣。親詔臣某製文勒石以誌之。臣聞金陵之虛。自秦時望氣者。嘗言有天子氣。至藏金土中以填之。其後若吳晉宋齊梁陳南唐之君。長據以爲都會。然皆瓜裂之餘。僅克自保。下足以當王氣之盛。夫孰知江山盤踞之固。天地藏闔之久。積千餘

年而有待於我聖天子之興也。不然何淵潛之來處。遂飛躍之自茲。見諸禎祥行事。昭著之若此者乎。夫太陽之升麗於天。光耀熙赫。高深廣袤之區。生成動植之類。孰不受其煦燠。而其次舍之所經。知天者必仰推而志之。天子以四海爲家。莫非聖明之所臨鑒。惟帝運之所由起。天人應合之機。實在於此。其可忽諸。今天子建極于中。撫制萬國。顧懷昔居。勢隆望重。非我佛世尊無量之福。孰足以處乎此也。茲寺之成。上以承祖宗之洪庥。下以廣民庶之嘉惠。聖天子之至仁大慈。垂示乎億萬斯年者。於此可見矣。嗚呼。盛哉。敢拜手稽首而述讚曰。

明明上天。祚我皇國。聖祖神宗。立我民極。於昭武皇。懋建丕績。憲章脩明。民用齊飭。天下爲公。仁廟受策。治極而圯。或敦彝則。乃瞻明哲。是保是翼。俾久而安。弗遐以逝。祝融效靈。海若率職。更相吉士。此維與宅。吉士維何。建業舊邑。龍依崇丘。虎立磐石。昔有居者。不稱厥德。惟我聖皇。天命攸迪。川寧於波。田宜於穡。民用孝敬。神介景福。帝命不遲。帥武臣力。遂開明堂。受天之曆。廟而祖饗。郊而神格。治功告成。庶物蕃息。江流湯湯。經我南服。中城有宮。皇所肇迹。惟時父老。載慕疇昔。雲來日臨。庶我心懌。皇帝曰嘻。予豈汝釋。維大覺尊。寶相金色。常以惠慈。拯汝迷溺。我卽我宮。作祠奕奕。照汝淨月。沐汝甘澤。汝見大雄。如我來卽。馬寶象寶。貝金珠璧。凡爲汝故。我施毋惜。無菑無害。居佛之域。民庶稽首。我不知識。我願天子。聖壽萬億。與佛同體。住世有赫。一誠報恩。有永無斁。

大承天護聖寺碑

惟皇上帝。監觀萬方。爰啓聖神。俾一遐邇。時惟太祖皇帝。神武維揚。作興帝業。世有濬哲。秉鉞誓征。粵世

祖皇帝建茲民極。用輯大成。既有九有。戡兵包甲。禮脩樂宣。神祇咸若。敦一本以端統。樹羣支以定分。秩序有經。萬世永賴。成宗顯承。法令較一。我武考受命撫軍。歸纘歷服。保育民物。既庶既富。豐亨豫大。如日方中。迨至延祐。至治之間。重熙累洽。物大而盛。弗虞愴壬。間敷彝憲。於是欽天統聖。至德誠功。大文孝皇帝。德合天人之助。躬脩揖遜之節。武以勘定。文以宣昭。忠孝率職。姦慝擿伏。雨暘以時。年穀順成。寶輿於山海波。不揚嘉靖寧一。利澤長久。頌聲交作。度越古今。列聖之仁恩。神靈之景貺。布瀆旁達。淇漬駢臻。於斯時也。有斂福錫民之志焉。固皇極之道也。乃託諸制作之宏。祠享之盛。予以表奉先之孝。予以廣濟物之慈。同仁之化。不亦與天地合德矣乎。天曆二年。歲在己巳。春□月。皇帝若曰。予承宗廟之重。君臨天下。夙夜兢懼。思所以繼祖宗下安民庶者。不敢少置也。矧予昔在沖幼。太皇太后躬保持而導迪之。欲報之德。亦不敢少忘也。稽諸佛氏之書。孝莫重於報親。慈莫廣於及物。而吾佛之所以陰相我國家者。豈可量哉。汝太禧宗禋使月魯不花。中書平章明理董阿大都留守張金界奴。其爲朕度地以作梵刹。稱朕心焉。四月。上幸近郊。觀於玉泉之陽。謂侍臣曰。扈岡復巘。隱隆西北。太湖之浸。汪洋溇涵。峙而東。高甕山在焉。旁薄扶輿。固祇園之地也。使太史眎之曰。吉。秋八月晦。立隆祥總管府以領之。鑄銀爲印。秩正三品。以臣月魯不花領府事。將作臣阿麻疎爲達魯花赤。國語達魯花赤。官屬之長也。臣金界奴爲總管。上曰。建寺而不先正其名。民將因其地而稱之。其署題曰大承天護聖寺。又曰。寺所以嚴奉祀事。而塵氓雜居。則幾乎瀆矣。買旁近地得十頃有奇。皆厚直以予之。分賜從臣。俾爲休沐之邸侍祠。而至則處焉。且命其總管府臣相大田以買之。度其歲入以爲僧食。明年。上受尊號。改元至順。十月。上命太師臣燕帖木兒。率百

官詣寺所告諸后土之神始命大匠治木。□月。命中書右丞臣撒迪爲隆祥總管府達魯花赤。蓋以省臣重其事也。二年四月十六日始作土功。治佛殿基。得古金銅之器於地中。多事佛之儀物。實有密契者云。寺之前殿。寘釋迦然燈彌勒文殊金剛手二大士之像。後殿。寘五智如來之像。西殿。度金書大藏經。皇后之所施也。東殿。度墨書大藏經。歲庚午。上所施也。又像護法神王於西室。護世天王於東室。二閣在水中。坻東曰圓通。有觀音大士像。西曰壽仁。上所御也。曰神御殿。奉太皇太后。辟容於中。日有獻。月有薦。時有享。器用金寶。曰壽禧殿。上齋宮也。諸宿衛之舍畢具。九月。上諭臣金界奴曰。朕之建寺。非徼福以私朕躬也。昔者國家有佛祠之建。金帛穀粟。一出於國之經費。受役庖徒。則民與兵。官府供億。並緣爲奸。非朕意也。今茲役也。工備其直。物償其價。勿使有司。因得以重困吾民。臣金界奴頓首受詔而退。鳩工以集事。材木甃瓦。丹漆設色。必精必良。其土宜交易得所。稱事出備。藝各奏能。施無遺巧。人樂效力。若子趨父。屬樞密儲政兩院臣。請以所領軍就役。而給錢如民。則軍上亦被惠矣。從之。凡役軍四千三百人。留守臣言寺有行宮。天子之所齋也。嚴重不敢褻。請以所領匠將作。而給錢如兩院之兵。亦從之。十月十五日上覽而悅之。陞隆祥總管府爲隆祥使司。秩從二品。命太禧宗禮使臣晃火兒不花。臣撒迪。臣阿麻疎。大司農臣金界奴爲之使。他官與次俱升。又作東別殿。柵木別殿。丈室講堂。衆沙門之居。會食之所。碑亭并亭。庖福庫廩。門垣橋梁。咸稱觀美。凡規制皆圖以獻。而上親臨定焉。皇后出大慶禮。賜白金。從戶部易鈔四萬錠。及割田賦之在荆襄者以資之。三年。寺大成。於是召五臺山萬聖寺釋師惠印。特賜榮祿大夫司徒。主教於寺。有勅命臣祖常。臣集。臣法洪。臣惠印。製文以刻諸碑。臣等既同奉詔。乃相與言曰。惟昔有國家者。秘

祝不私其身。而思錫諸民。史臣書之。後世誦之。今聖皇之心。一出仁孝。瑣瑣之秘祝。詎可擬倫哉。且其爲役。可謂大矣。財出內帑。而不傷於外府。役以傭錢。而不勞於兵農。官有專任。而不煩於有司。欽惟聖上。怡神穆清。對時育物。量準天地。而一日萬幾。睿知明達。而慮周天下。至若斯寺之落成也。營度經始之勤。治辨董正之任。考圖攻位之審。其簡在帝心。又有如此者。豈非億萬世宗社生靈之福哉。敢再拜稽首而獻文曰。

於赫皇祖。聖神立極。歷世繼承。照臨維繹。維我聖皇。孝思如在。視民如傷。博施廣愛。具曰大雄。等慈能仁。導善闔惡。以球我人。乃作大利。于國西郊。檐屋翬翼。霧雨之交。金玉寶物。等同河沙。曰予有所。世不謂多。飛蓋樹幢。香鬘珠網。聖靈與俱。來卽來享。福我惠我。遂我煦養。子孫黎民。均視同仰。思我太母。爲世遠思。願復之勤。孫謀是貽。肅肅徽音。邈邈令儀。眷予晤懷。庶其來茲。相彼流泉。閣于水涘。人神翊扶。天子至止。鼓鍾鼎彝。嘉樂宴喜。多壽多福。又多男子。羣臣百工。侃侃獻功。民無勤勞。府乃羨充。樂石刻辭。頌言雖雖。億萬斯年。贊于皇風。

河圖仙壇之碑

今上皇帝。以特進上卿吳公全節。年七十。用其師故開府儀同三司神德張真君故事。命肖其像。使宰執贊之。識以明仁殿寶而寵之。賜宴於所居崇真萬壽宮。近臣百官咸與。大合樂以饗。盡日迺已。旣拜。賜公坐于承慶之堂。召門人弟子而告之曰。吾在髫髻。志翔寥廓。稍長學道。弱冠從先師謁世祖皇帝。遂留不歸。五十年間。以天子之命。祀名山大川。東南西北。轍迹咸至。一遇泉石之勝。輒旁皇而不可得。而我父母

被寵光。封鄉國。高年偕老。時優詔使歸爲壽。而我曾不能晨夕在側。吾終身之不安者也。今老矣。爲我圖地。必吾父母之塋。是近。庶體魄有所依焉。則我之志也。小子識之。於是命弟子歸饒而求之。明年得地於安仁縣。去饒國公之墓左數百步。其山曰河圖之山。書以圖來。公嘆曰。吾昔聞諸異人云。河圖八卦也。今人所傳河圖。蓋五位相得。而各有合之圖也。儒家頗駭其說。然卽卦以指視先天位數。吾得金吾之旨焉。故宋江東謝公枋得。得其說而隱去。世祖力致之。在道不食數十日。而神氣益完。迫授以官。迺化去。吾受其書而藏之。今得山曰河圖。告我之兆久矣。迺命作石壇。據風氣之會。將以栖神焉。則又歎曰。予平生以泯然無聞爲深恥。每於國家政令之得失。人才之當否。生民之利害。吉凶之先徵。苟有可言者。未嘗敢以外臣自詭。而不盡心焉。而恩賚之厚。際遇之久。則有非人力所能至者矣。其從子集賢待制善。竊知公之意。錄其平生之事。略已成編。會善卒。公得其書而感焉。乃遺書江南。以告集曰。吾蚤歲猶得見國朝諸大臣。及宋之遺老。逮其中年。公卿之重。士大夫之賢。且仁者無一人吾不見焉。覽觀四方。逝者如水。知心之文。其文可以傳者。莫若清河元復初氏。而云亡亦已久矣。區區之迹。他日將何所托乎。人生不可期。相望數千里。子必爲我著仙壇之記。使千載之下。猶或於此乎知之。則亦故人之情也。夫迺爲次第善之所錄。以遺之云。吳氏系出太伯。爲吳子之國。子孫散處吳楚間。多以國爲氏。其在番者爲番君。番之吳皆宗番君矣。其居安仁。有龍坡。居士諱岳者。墓在桂溪前倉之會源。其高大父也。世居壽櫟山。屋於礪石之上。故宋咸淳己巳。有泉出東楹之礎。潤液之脉理。直如貫繩。上升梁間。達乎西楹。迺生靈芝。光彩映日久而不壞。是歲十一月七日。公生。丹光盈室。生七月而能言。其父抱膝上。因坐假寐。夢神人告之曰。高仙托體君

家。塵中不能留也。四歲能誦詩。七歲其叔父教之。日記千言。十歲從其兄遊乎仙巖之下。慨然有遺世之意。十三學道信州路桂溪縣龍虎山。太上清正一宮之達觀堂。堂之尊師李君宗老。嘗有異徵。得公而應焉。臨川有雷空山先生者。隱居種湖之上。深明易老。以其所學著爲成書。公往師焉。他從學者莫之能及也。李君避舍。延至雷先生。而公得以專受其業。雖休沐不出。每得新瓜果之屬。必卽以歸獻其親。無有曠闕。十六度爲道士。於其傳系。則居何君恩榮之次。國朝初得江南。嗣漢三十六代張天師宗演入朝。張公留孫在行。奉勅留禁近。始賜名。上賜其後位特進。開府儀同三司。玄教大宗師者也。至元十四年。作崇真宮以居之。二十四年。開府徵公至京師。公辭其親。別龍坡君之墓。新墓田之舍以行。是年得入見。二十六年。奉詔祠南嶽。二十八年。奉詔從開府徧祠嶽瀆諸山川。二十九年。賜崇真宮於浙西。公奉詔宣諭江浙行省。三十一年。成宗皇帝自朔方還。纂大統。公從開府率其屬北迎。召見。賜公古璫玉蟠螭之環一。有旨設醮于上都壽寧宮。五晝夜。公專主章奏。特勅命公每歲侍從行幸。所司給廬帳車馬衣服廩餼。著爲令。元貞元年。制授公沖素崇道法師。南嶽提點。二年。奉詔祠中嶽淮瀆南嶽南海。大德元年。奉詔祠后土西嶽河瀆江瀆。二年。制授沖素崇道玄德法師。大都崇真萬壽宮提點。三年。大上清正一宮災。公奉旨與近侍馳驛命江浙省臣更作之。公請與官之人各以私財佐有司之不及。四年。命有司作三清殿。及觀門廊廡于崇真宮。設醮慶成。上齋而臨幸。賜開府及公黃金白金重幣有差。五年。公奉旨召嗣漢三十八代張天師與材。過揚州。爲十臣禱旱。雨至京師。爲蒼刺罕丞相哈刺孫王禱旱。又雨。八年。公父母年皆七十。奉旨降御香于江南諸名山。賜對衣尙尊。爲其親壽于齊老之堂。九年。作崇真觀于安仁縣。賜名曰萬壽。

崇真觀十年。制授公江淮荆襄等處道教都提點。十一年。武宗皇帝自朔方歸纂大統。制授公玄教嗣師。總攝江淮荆襄等處道教都提點。崇文弘道玄德真人。鑄銀爲印。曰玄教嗣師之印。視二品。封其父克己。翰林學士。中順大夫。至大元年。以歲歉禁民間酒。特勅光祿寺。日有賜尊。上賜公七寶金冠。織金文之衣。爲朝真之服。仁宗皇帝在東宮。所賜冠與衣。貴重華異。如上所賜。公從駕至中都。中秋錫宴。上顧其貂裘。弊。改賜黑貂三百以爲衣。纓金文之錦以爲祿。二年。制授公弟子夏文泳。元成文正中和真人。江淮荆襄等處道教都提點。賜銀印。視二品。三年。公奉聖旨。設醮于龍虎閣。皂句曲三山。制贈公大父鑑。昭文館大學士。資善大夫。追封饒國公。諡文靖。祖妣陳氏。封饒國夫人。父翰林學士克己。加授榮祿大夫。大司徒。饒國公。母舒氏。饒國太夫人。仍賜對衣。上尊。六月。旨命公奉贊書歸鄉。榮其親。因命設醮于安仁縣之崇真觀。以慶成。皇慶元年。仁宗皇帝命設大醮于大都南城長春宮。公奉旨投金龍玉簡于嵩山濟瀆。是年。勅翰林學士元明善。脩龍虎山志者序。進入。改賜崇真觀額。爲崇文宮。延祐元年。公奉旨設醮于龍虎閣。皂句曲三山。因請歸慶其父母八十之壽。對衣尙尊之賜如初。是年。傳旨江浙行省。促公還朝。制授公弟子毛穎達。正德弘仁靜一真人。嗣掌遁甲之祠事。賜銀印。視二品。四年。有旨名其鄉曰榮祿鄉。里曰具慶里。降璽書護其家。六年。饒國公之訃。至上京。集賢以聞。勅翰林侍讀學士元明善著碑文。翰林學士承旨趙孟頫書字。太子詹事郭貫篆額。給傳奔喪。十一月。太夫人歿。十二月。葬父母于其縣崇德鄉之山田。作明成觀以奉祀。明年。召還京師。英宗皇帝至治元年十二月。開府張公觀化于大都崇真宮。上聞。有旨歸其喪於龍虎山。百官送諸上東門外。所過。有司治辦舟車祭遣。公請歸執喪。不許。命弟子崇玄冲道明復真。

人陳日新薛玄義奉喪還。二年制授公特進上卿。玄教大宗師。崇文弘道玄德廣化真人。總攝江淮荆襄等處道教。知集賢院道教事。玄教大宗師。玉章一一品銀印一。總攝道教事。二品銀印一。并授之。勅省臺百司。諭以傳宗之事。而大護其教。用開府之志。作東嶽仁聖宮於齊化門外。重脩太一延福宮。三年。太上清宮又災。公率其屬更作之。泰定元年春。長春掌教真人闕。上用公薦。以汴梁朝元宮孫公履道主之。二年。公奉旨設大醮于長春宮。又設大醮于崇真宮。護教之詔如故事。制贈饒國公。光祿大夫。大司徒。諡文康。三年。奉旨設醮于龍虎閣。皂句曲三山。奉勅葬開府張公于南山之月嶠。作仁靖觀以奉祀。四年。改造開府所建溪山眞慶宮。天曆改元。冬。公還自上京。明年。北迎明宗皇帝。謁見之次。賜對衣上尊。及歸。天曆護教之詔如故事。追封故開府張公曰神德眞君。勅改仁靖觀爲神德宮。至順二年。公進宋儒陸文安公九淵語錄。世罕知陸氏之學。是以進之。有旨設醮于長春宮。公告老。請以弟子夏文泳嗣玄教。詔留公三年。有旨設普天大醮于長春宮。又設大醮于崇真宮。元統元年。今上皇帝卽位。護教之詔如故事。仍改至元之元年。京師旱。公奉勅禱之。雨。冬。無雪。公奉勂禱之。雪。三年。公重建饒州芝山文惠觀於永平門外。遷番君之神以居之。四年。與神德宮明成觀。皆被聖書之賜。五年。畿內田有蟲蠶。執政請公禱之。三日。盡除。而仙壇之成。則在六年矣。皇元初。有中。原五嶽之四。在天子封內。旣得宋。而後南嶽之神得而禮焉。是以世祖特命開府張公領其祠。至是。屬諸公矣。長沙有故宋相趙信公葵之子淇。博學多識。尤好神仙金丹之事。有宜春李先生簡易者。故玉溪李觀諸孫。遇異人。得丹道。蓋以爲遇劉海蟾而得之。淇每師問焉。未盡其旨。而李先生化去。後遇之玉山道中。始得其說。旣內附。命爲湖南宣慰使。輒欲棄官行其道。憂患多。

故不能如其志。公爲天子使南嶽。道過長沙。趙公見而敬焉。曰：神氣沖爽，而有福德，可以受吾道。迺焚香密室，出其書以授之。則皆海蟾玉溪之秘云。世祖嘗曰：天子當禮五嶽，而朕年高不能往。每遣近臣忠信而識察者，分道祠嶽。嶽后土戒之曰：神明之使，馬不至喘汗，則善矣。蓋歸而問其所聞見，人物道里，風俗美惡，歲事豐凶，州縣得失，莫不參伍以周知。踈遠之迹焉。公之連歲被命而出，每辭以爲臣不足以當大事之重。上曰：敬慎通敏，誰如卿者？遂行。他日，成宗遣祠嶽。嶽使還，顧問如世祖故事，曰：卿過郡縣，有善治民者乎？對曰：臣過洛陽，太守盧摯，平易無爲，而民以安靖。上曰：吾憶其人。即日召拜集賢學士。公使過浙西時，故翰林學士閣公復爲按察使。老成文學，譽望甚重。公時才踰弱冠，議論明正。閣公客之，不敢忽也。後閣公居翰林，益加重焉。成宗既崩，仁宗皇帝在懷孟未至，而閣公典詔令，有狂士危言以訐閣公事。罔測。公力言諸李韓公孟仁宗意解，及武皇卽位，遂以平章政事歸老高唐。如世祖待王鹿菴，磐故事，朝廷得敬大臣之體，不以口語傷賢者，則公深有以維持之也。故翰林學士吳公澄始用董忠宣公士選薦於朝，自布衣拜翰林應奉，召至不拜去。後又召爲國子監丞，升司業，與時宰論不合，又去。公啓於集賢貴人曰：吳先生大儒，天下士聽其去，非朝廷美事。集賢貴人聽公言，超奏吳公爲直學士。吳公雖不赴，而天下避之。至元大德之間，重熙累洽，大臣故老心腹之臣，莫不與開府有深契焉。至於學問典故，從容裨補，有人所不能知，而外庭之君子，巍冠褒衣，以論唐虞之治，無南北皆主於公矣。若何公榮祖，張公思立，王公毅，高公昉，賈公鈞，郝公景文，李公孟，趙公世延，曹公鼎新，敬公儼，王公約，王公士熙，韓公從益，諸執政多所諮訪。閣公復，姚公燧，盧公摯，王公構，陳公儼，劉公敏中，高公克恭，程公鉅夫，趙公孟頫，張公伯純，郭公

貫元公明善。袁公桷。鄧公文原。張公養浩。李公道源。商公琦。曹公元彬。王公都中。諸君子雅相友善。交游之賢。蓋不得盡紀也。薦引善良。惟恐不及。憂患零落。惟恐不盡。其推轂之力。至於死生患難。經理喪具。不以恩怨異心。則尤公之所長也。公博覽羣書。徧察羣藝。而於道德性命之要。粹如也。嘗作環樞之堂。晝先天諸圖于壁。以玩心神明。有詩曰。要知顏子如愚處。正是羲皇未畫前。其所造蓋如此。故其述作光明痛快。足以見太平之盛。而深存忠厚於人倫。有所感發。自幼至老。尤好吟詠。皆出其天性之自然。而非有所勉強。尤識爲政大體。是以開府每與廷臣議論。及奏對上前。及於儒者之事。必曰。臣留孫之弟子吳全節。深知儒學。可備顧問。是以武宗仁宗之世。嘗欲使返初服。而置諸輔弼焉。道家醮設之事。是其職掌。故於科教之方。無所遺闕。香火之費。無所簡吝。然而朝廷耗費過重。則每曰。事天以實。不以文。弭災在於脩德。而禱祈特其一事爾。全真之教。敍其祖傳。有所謂玄風慶會錄者。大德中。嘗使人譯之。而莫達其意。有旨命公論定。公曰。丘真人之所以告太祖皇帝者。其大概不過以取天下之要在乎不殺。治天下之要在乎任賢。脩身之要在乎清心寡欲。煉神致虛。則與天地相爲長久矣。譯者如其言奏之。上大感悅。不惟丘公之心事明白。而太祖皇帝聖學之淵微。亦從可窺其萬一。是以君子深有慨於公之言也。公之執親喪也。自奔喪至家。水漿籩粥。僅足以延息。涕泗滂沱。繼以血衄。喪葬之後。力之所得爲者。無不盡其力焉。山田之域。伐石江濱。山爲洞穴。掘泉下錮。深廣高厚。葬之日。郡守王公都中。親助喪事。送葬者連數郡。車馬畢至。時方寒雨。濼淖載途。一夕北風結凍。堅冰在地。行者無苦。人以爲孝思所感也。明成觀有著存閣者。以致其嚴祀之意。方外之士。感其孝思。知慎其親之存歿。自此始矣。其事開府也。先意承志。周思廣慮。所以

事朝廷。尙道教。無絲毫有所違拂。開府泰然委之而不疑。確然信之而不惑。所以能有立於聖世者。非惟運數則然。而其誠心相孚。亦有以致之也。其葬開府於南山也。饒信撫三郡守將。以其官屬會葬。江南諸名山之主者皆來。竣事。伐石題名而退。擇卜之慎。營繕之勞。工力之博。賓客之盛。東南數千年間。未有能彷彿其萬一者。公之盡力於其師。與所以奉其親。無二矣。久之。作南山諸詩。沉鬱哀慕。識者讀而感焉。東南道教之事。大體已定於開府之世。而艱難險阻。不無時見於所遭。裨補扶持。彌縫其闕。使夫羽衣黃冠之士。得安其食飲於山林之間。而不知公之心力之罄多矣。公之宗系。別居於達觀堂者。尊顯獨隆於他支。封真人者。凡數十人。奉被璽書主宮觀者。尤不可勝紀。其姓名別有述。公平生畫像之贊。及大父母父母。與其身之所奉被贊書。及諸堂室記頌。皆一時名筆。別類爲書。曰天爵堂類編。并其所爲詩文。曰看雲錄者。通若干卷。集賢直學士揭傒斯奉旨作序。以傳于世。皇上卽位之初。親御翰墨。書閑閑看雲四大字。題曰賜吳上卿。識以明仁殿寶。勅御史中丞馬祖常。太常歐陽玄。爲之贊。至元六年九月初一日。大駕自上京。還次懷來。燕坐幄殿。集賢大學士不答失利等。以上卿之言入奏。曰。御書四大字。臣全節旣刻諸樂石。又模勒于文梓。爲四鉅勝。塗以黃金。周以雲龍之飾。以其二賜崇文宮閣而庀之。請錫名曰龍章寶閣。又以其賜達觀堂。先朝嘗賜玉璞。命攻玉之工。擬太上說經之像。刻數年而後成。請以歸之達觀閣而祠之。請錫名曰玉像之閣。而御書二勝。揭諸其上矣。有勅命臣某爲之記。而文惠觀河圖仙壇。并命臣某銘之。臣某先已記仙壇之記如右。謹再拜稽首奉詔而爲之著銘曰。

巖乎茲山。厥名河圖。地闢天開。孰究始初。則圖示卦。庶聖歷述。山藏無聞。傳者周易。易老之通。同原殊宗。

或隱或彰。闕在道宮。有崇丹丘。僊壇是作。玄契夙符。龜筮從若。門人弟子。作之三年。天子致問。有賁其國。清靜佐理。啓自神德。維帝外臣。歷世無斁。在今宗師。有爲有文。孝親敬師。致忠於君。寵光道家。冠代邁古。白髮蒼顏。長侍帝所。遺老故臣。沛然從游。紀德論交。金石不渝。量弘智周。用世何有。却而不居。有相其道。天子聖明。昭惠老成。龍章鳳畫。玉質金聲。有懷故鄉。有棟有宇。神明攸居。山木翬舉。盛德孔容。象其粹沖。聿嚴敬共。以報顯融。有嘉豐草。啣啣鳴鹿。天降甘露。灌濯神穀。維昔廣成。宅乎空同。千歲不衰。穆其清風。肅肅吾壇。圓方平直。奇耦參兩。俯仰有則。脩名度方。天子命之。刻詞孔貞。來者敬之。

靈惠沖虛通妙眞君王侍宸碑

至順三年夏。樂安縣尹蒲君汝霖。以書來告曰。在延祐庚申。汝霖同知南豐州事。六月。州境大旱。禱諸山川。弗應。州人言有侍宸王君祠。在神龜岡。所謂妙靈觀。去州數里。侍宸宋徽宗時。歸而沒於其鄉。其神至今有靈異。盍禱諸汝霖。以雨於己任。親往禱焉。旣得卜。乞靈水於缶。登舟以還。有蜿蜒浮水而來者。紅光赫然。雲氣隨之。州吏以器迎之。卽就器。蟠不動。及州門。雨垂降。至公署而大作。是歲稔。明年又旱。吏民以汝霖前禱之應也。諉汝霖仍往。其應如去歲。歲又稔。於是歲州之父老來告曰。侍宸之恩。不可不報。生有道術著於時。歿又惠澤及其民。宜白朝廷。有以表異之。南豐下州也。而不統于郡。得專達行省。乃以侍宸事爲文書上之。旣聞於朝。事下太常。博士議曰。君故宋時。已封沖虛通妙眞人。宜加賜靈惠。易眞人曰眞君。是時有臨川道士唐樂眞。以法術承應內廷。是年。以侍宸教法禱雨。京師有應。集賢院亦上其事。故朝廷知之。而得封甚速也。命旣下。而汝霖學製錦於樂安。去南豐三百里而近。增封之命至斯。所以侈上賜。

而係民心。猶汝霖之貴也。公在太史。幸爲書其事於石。汝霖以鄉人請私焉。按臨川盱江志。宣和間。有南豐人王文卿。字予道。號冲和子。生有異質。嘗爲詩告其父。有方外之志。父歿。辭母遠遊。渡楊子江。旣濟。行野澤中。雨暝迷路。見若有燈火者。就之。有老嫗爲逆旅者。得文書數卷。篝火讀之。雨霽火絕。天且明。乃在大樹下。無逆旅也。其書蓋致雷電役鬼神之說云。以是濟人甚衆。名聞江湖間。當是時。徽宗崇尚道教。嘗夢得神人。以形求之。得侍宸焉。賜見。大稱旨。拜太素大夫。凝神殿校籍。其官道君別置道教官也。大夫校籍位已尊矣。賜其父承事郎。封其母曰宜人。京城有狐爲妖。人爲立狐王廟。瑤津池又有妖。蓋黑鯉也。奉詔劾之。狐鯉皆雷擊死。將有事於明堂。而雨不止。君禱之。立霽。有詔獎諭。拜金門羽客。自校籍升侍宸。賜號冲虛通妙先生。淮南北以無雪告。上憂麥。以告侍宸。遂大雪。麥熟。賜金帛不受。盜起山東。徒黨號巨萬。郡縣不能制。聲勢張甚。召見便殿。上以爲言。對曰。當以神力助討。他日獻捷者言。天大雷雹。賊乃潰。而道君遂歸功於侍宸矣。而侍宸實預知天數。數數以脩政練兵爲請。不暇聽其說。乞身歸田里。求去不得。一日拂袖徑還南豐。未幾。宋南渡。紹興二十三年八月二十三日。爲酒食召鄉里飲別。書頌脩然而逝。旣殮。舉棺而葬之。甚輕。蓋尸解云。神龜岡其墓也。其靈異之事。相傳不絕。侍宸歿而能福其鄉之民。蒲君去他官。不忘其舊民。嘗受侍宸之賜。其仁惠皆可錄。故書之。使邦人有所考焉。予旣爲前南豐倅。蜀人蒲汝霖著侍宸王真君碑。後六年爲至元庚辰十月。上清外史薛玄卿以書來告曰。有番禺胡道玄先生。人間所謂神霄野客者也。得侍宸之真傳。年二十餘。道行關陝荆襄江漢淮海閩浙之間。當己巳庚午之旱。旬日之中。郡縣爭致之。所歷或一日。或二日。嘻笑怒罵。雷雨隨至。官吏畏而民愛之。環四五千里之間。所至無

不應者。至於妖怪之作。効治如法。人以爲神。遇異人於武當大頂天柱峯。得修仙之道。徧游名山洞府。而歸江東西之間。從蓬頭金公遊。甚相契許。他人莫之測也。於是收斂神異之迹。將求名地以歸隱。是以謁浮丘君於華蓋之上。道過黃茅之岡。故使子得見焉。既見。則爲余言曰。神龜岡碑所載事有未備者。請述之云。若侍宸自南豐辭親而至揚子也。所遇而得書者。火師也。火師者。蓋上古神人。而世傳爲汪氏子華者。蓋其化現爾。其囑侍宸之言有曰。吾身一天地。天地一陰陽。握其機者。在我而已。子當以是應玄微。佐明主。吾待子於神霄之上矣。侍宸退而修諸其鄉軍峯之陽。所坐磐石猶在。及事道君皇帝。位至侍宸。道官之尊貴。與文官侍從等。其後又遷沖虛大夫。賜金方符。使叩以入禁衛。加贈其父曰承議郎。母曰令人。宮中人多病者。上以問侍宸。侍宸曰。此有物怪爾。當効之。坐未退。天忽晦冥。雷電交作。頃之霽。一白龜甚大。震死矣。病者皆起。揚州守臣以旱告。禱雨不應。道君以問侍宸。對曰。下民多罪。上帝震怒。水不可得。道君強之。侍宸曰。無已。惟黃河水可借三尺耳。數日。揚州使至。奏得雨。皆泥潦。計其時。乃奏對之日也。侍宸既以國亡妖孽爲奏。不見聽而還。上思之。畫其像而親爲之贊。既居鄉。鄉里無水旱疫癘妖怪之事。千百里間。雖亂離而帖然。高宗定都江南。將二十餘年。聞侍宸猶在。命守臣物色之。有詔曰。勅王文卿先朝高士。退隱林泉。枕石漱流。多歷年載。兵戈之後。杳不聞音。朕甚思之。其出山一來。以副虛佇。又敕守臣以禮津發。辭以老病。不復至闕。使人畫其像以進。亦親題贊。世人多傳之。歿既久。侍宸之從孫。以貧從商人入蜀。親見侍宸於道中。弗識也。執手江澚。多所傳授。曰。明日渡江。某觀中可相尋也。明日。至其觀。悄然無人。一高堂中有畫像。則侍宸之祠也。始知其所遇傳授者。乃其大父也。又明日。又遇之。以幅紙與之。曰。此孫

至家。上官甥以吾書盡授之。妙濟歸告上官。上官弗信。出其書視之。上官識其手蹟。號慟作地。盡以教之。際遇寧宗朝。法亦大顯。賜號妙濟先生。名嗣文。蓋妙濟初年不甚識字。嗣文亦侍宸。江澚所命也。又有薩守堅者。亦酷好道。見侍宸於青城山。而盡得神秘。游東南。禱祈効治。其神怪有過於侍宸者。游江西。入閩。過神龜岡。乃知侍宸爲數十年前人云。昔侍宸在汴京。居宮觀。見爲黃冠者。多諂事權貴。以自衛。惡之。故多不得其說。其在鄉旣老。而得其傳者。則新城高子羽。授之臨江。徐次舉。以次至金溪。聶天錫。其後得其傳。而最顯者。曰臨川譚悟真云。人不敢稱其名。但謂之譚五雷。內附後。譚君猶在。浮沉人間。隱顯莫測。廬陵有羅虛舟者。故宋時名士。澗谷先生之諸孫也。得五雷之傳。甚有符契。然譚君誦侍宸之戒曰。每傳不過一二人。若廣泄之。則速死。是以羅之弟子雖多。而自以爲得之者。惟蕭主簿雨軒。其後則有周司令立。禮兩人而已。周與予有姻聯。然終日言之。未嘗及此。蕭君清文雅學。中罹憂患。然甚通至理。泊然無所累。其心予敬愛之。而亦未嘗言及之也。周之說。惟授之其子。游其門者。或得或不得。予不知也。蕭君儒者。擇人至謹。而人亦不知其有此道。獨傳之道。玄胡君一人而已。神異之事。已見於前。其客於予者。頂分三髻。一劍自隨。練衣短裙。危坐終日。風雪極寒之夜。燈火不繼。而溫煦滿室。目神炯然。神觀洞徹。縱橫自在。物外無拘。而剛介不可犯也。此亦真修仙者乎。有侍宸手書詩一首。蓋譚羅相傳之符契也。且曰。吾將隱矣。當求人而付之。必也戒行若冰霜。立志如鐵石。胷次如水月。氣象如陽春。又雖生尊貴之家。而世有陰德。學乎清靜之門。而身有福力者。則以授之。果爾。其亦難得也哉。雍虞集記。

道園學古錄卷之二十六

應制錄六

供醮文

水陸會功德山

我國家聖聖相承。深仁厚澤。泱於人心。累洽重熙。多歷年所。今上皇帝。濬哲文明。纂承大業。好生之德。已洋溢於萬方。恭己之誠。思貫通乎上下。海涵春育。無間幽明。雨順風調。大同遠邇。聖恩盛大。蔑以加矣。而萬幾之密。猶垂念於隱微。九有之師。或未該乎冥邈。勝脩法會。式究淵衷。乃脩水陸冥陽大齋。于萬壽寺。自三月一日。啓建七日。滿散乘法寶之威光。成金心之願力。旛蓋香華。種種妙饌。齋儀梵唄。一一圓成。凡我佛子。昔自多生。歷酬定業。或以刀兵水火。或以疾難飢荒。沉迷五濁之惡塗。未返一真之本性。遇良因於今日。得勝妙之現前。渴饑並獲於清源。苦惱悉超於極樂。來生佛土。祇奉明時。回向善提。增崇聖壽。臣等迺稽首而作偈曰。

聖上運大慈。憫諸有情等。作此大勝會。供養佛法僧。勇識妙蓮華。諸大阿羅漢。畢支迦五明。金剛大威德。護法諸龍天。凡在虛空界。敬禮等無二。開闢諸方隅。光明悉照耀。迺至諸明哲。往昔善持世。四生及六道。凡在苦趣者。悉皆承佛力。來赴於道場。心花得發明。諸識轉爲智。一切現苦業。消滅無復續。魏魏大功德。皆由聖心起。我聞昔有人。積寶如須彌。持施得福多。恒河沙難喻。我皇勝妙因。福報不思議。視彼施寶者。

千萬不及一。我等佛子衆。各生慚愧感。稽首贊吾皇。聖壽千萬歲。與佛共悠久。

水陸會緣起文

原夫一靈圓妙。本不昧於昏迷。歷劫無明。遂有淪於流轉。我佛興大憫念。開方便門。譬彼宵征。遠道冥行。荆棘之林。我以慧炬照之。則前進無殊於白晝。又如往濟大川。忽遇風濤之險。我以慈航渡之。則安行無異於陸途。施平等於無方。悉蒙揀度。嗟幽沉之有苦。尤切哀矜。於是目連感定業而生悲。觀音化面燃而啓教。十方諸佛。共弘應供之名。六道四生。亦攝菩提之海。大士仰承於佛勅。道場肇建於當年。孤峯接雲海之空明。白日映江潭之澄澈。神靈交會。凡聖混融。分八位上下之殊。作萬劫圓通之施。傳流既久。證驗尤多。我今上皇帝。與佛同心。如天之覆。念生成之類。已在於鈞陶。而冥邈之蹤。尙迷於出沒。迺鑒人天之意。大脩水陸之儀。爰命國師。俾提法要。迺以三月一日。於大都萬壽寺。脩建水陸無遮法會。七晝夜。上資善逝之恩光。下拯孤魂之陰昧。香積普熏於世界。盡斷惡緣。妙蓮應現於池中。悉離苦網。咸來佛會。共沐帝恩。逍遙極樂之鄉。不墜輪迴之境。共報聖明君。乃說偈以贊曰。

一切衆生。皆具佛性。如摩尼珠。五色隨映。如何累劫。業識相因。無明展轉。生死根塵。我佛慈悲。施方便力。如大醫王。救彼痼疾。餓者令飽。渴者與漿。幽闇與明。熱惱與涼。況爾六道。諸苦隨業。不藉佛恩。何由自潔。聖皇在上。連大仁心。樹旛慧幢。立功德林。作此道場。期七晝夜。平等無礙。均一高下。光明圓滿。如佛現前。孤幽沉魂。懽喜慶筵。如是勝因。增崇聖壽。億千萬年。堅固悠久。

荷天洪休。膺國大統。肇惟元祀。奉若明禮。殊庭修秘。祝之嚴肅。拜候景光之集。伏願瓊紫壇之納陛。闢黃道於叢霄。天極旋樞。日星晒曜。后祇薦祉。川岳闡珍。用期泰定之民。均被豐成之賜。

朝詞

聖祚在躬。肇啓乾元之歲。道宮修禮。丕昭答貺之誠。禱以再三。鑒茲精一。伏願乾元統御。坤道順承。時對春陽。導本支之鬯達。紀增神策。保宗社之奠安。遂以生成。均陶動植。

三清

荷天地之洪休。管承繼序。奉祖宗之成憲。思究彌綸。期敬達於丹誠。惟謹資於玄教。肅將蠲潔。用極依歸。伏願慶衍中朝。仁儲大本。休明佑啓。百神受職。以安寧。福祚延洪。萬世奉天而長久。

昊天

入膺丕緒。有命自天。載省眇躬。無疆惟恤。啓淵衷之至實。感眞貺於太虛。伏念比屬盛時。俄慨堅冰之辯。永懷讓德。不忘曦日之初心。迺正誼以廓清。期與民而寧一。用發憂兢之慮。悉紓對越之恭。伏願乾御陽剛。坤成地道。祖宗陟降。同保佑於高明。家國治平。不顯承寧於悠久。

后土

集基命於眇冲。始建初元之紀。覽幅員之廣袤。益思大業之興。祇若寶圖。誕敷金籙。伏願玄功有造。至德無爲。道致謹於順承。協成泰定。物資生於厚載。保合乾剛。

醮星祝文

太陽

赫赫太陽秉陽之精。照臨天下。達我皇明。克循克軌。永底隆平。

太歲

翼翼倉龍集于巽維。紀綱百神。連行四時。相我君道。壽我邦祺。

歲后

於赫歲陽。配于陰宮。承于大君。內治之宗。以生以成。登我歲功。

金星

奕奕長庚。煌煌啓明。主我兵事。宜順其經。弗僭弗忒。邦家以寧。

太陰

明明太陰。配陽麗天。主國之刑。勿忒其躔。以順以寧。于以永年。

室宿

惟乾之維。是爲營室。炳耀定中。景命有翊。廣開天門。相我無極。

天剛

龍角在田。帝車所持。聖人之生。次舍在斯。攝提衆星。萬壽是基。

病符

歲德所紀。主病有符。視其綬祥。傍射在隅。於赫景命。靈其祆除。

大耗

歲有癘神耗之大者。集于乾隅。衝照辰舍。乃謹祓除。勿害純嘏。

土星

煌煌鎮星。位于中宮。行地無疆。承天之功。用集嘉福。懿範是崇。

小吉

彗

鶉首之舍。月后所臨。東井洋洋。景耀昭森。扶我元懿。萬福來歆。

喪門

左挾丁符。右接坤隅。孰敢啓門。當我吉居。祈祆不祥。以寧皇輿。

金星

太白之精。其神孔武。憶我南西。孰祆孰禦。宜斂其芒。勿間多祐。

九月十四日高昌王大夫傳旨作醮星文

元辰天罡

於惟聖皇。受命于天。斗車提綱。龍見天田。萬物振羨。威信是宣。以介景福。樂只萬年。

羅喉

赫赫有威。惟天之首。日月之行。交道豐蔀。烜兮照臨。景命先復。克相有道。天子萬壽。

室宿

熒熒營室。天之玄宮。以藏以息。肅肅離離。乃瞻元台。惟茲是從。錫福未央。如定方中。

小吉元辰

位南以西。爰卽于坤。東井洋洋。有漑其源。肅肅中宮。景命在垣。元吉之福。旣昌以蕃。

太陽

赫赫太陽。曰躋于乾。順德維坤。承暉弗愆。昭光播和。若春在暄。萬福來臨。與天齊年。

參宿

載瞻參墟。明星煌煌。乃占其書。孝謹忠良。肅肅中宮。景命溥將。儷于聖明。旣壽永昌。

太充元辰

有嚴太衝。維震之宮。青陽載熙。木德乃通。時維聖子。景命是逢。導之太和。被之仁風。

太陽

日之行天。至尊以光。誰其承之。維青之陽。輝輝煌煌。繼照四方。星輝月輪。永保無疆。

斗宿

斗爲天機。日月耀芒。酌量政事。褒進賢良。於維聖子。元台是當。錫福自天。欣欣樂康。

太陽

東望扶桑。赫乎九芒。下被萬物。麗天爲章。東賓西餞。靡朝敢忘。錫我景福。於昭輝煌。

太白

肅將金行司天之刑。順軌出入。厥有常經。掠於軒轅。占者以告。敬恭用榮。景福來報。

軒轅
粲粲軒轅。黃龍之體。屬于內廷。占者所紀。長庚來干。非順之軌。載榮載禳。轉作多祉。

太陰

占象于坎。受陽以光。配於大明。流輝四方。天清地寧。軌道有常。介我景福。萬壽無疆。

太歲

歲維昭陽。辰在協治。神君所臨。萬靈來合。皇皇景祚。奉德秉法。我將我享。嘉佑斯答。

白虎

於菟耽耽。爲兌之神。爲素爲刑。莫之敢嬰。迎祭于西。爲禮孔殷。神其食之。介福來臻。

大耗

滿庭之過。神則害兮。從而虛之。孰可賴兮。占歲之行。厥有恒所。尙易其嗇。豐我多嘏。

迎神

肅肅靈臺。三光下臨。旨酒牲牢。嘉幣吉金。肅將祀事。罔敢不欽。赫赫洋洋。神其來歆。

送神

靈臺有享。神具來格。其祥如雲。其近如日。嘉禮告成。景貺秩秩。相我寶祚。於萬十億。

醮星祝文

迎神

肅肅清臺。曆象是司。維天有神。維土有祇。爰潔牲幣。以禱以祈。藏祀奉迎。靈其鑒之。

太陽

出乎陽谷。升乎扶桑。麗于中天。照臨下方。愛而燠煦。畏而蒼涼。威肫有禱。降福穰穰。

太歲

煌煌明堂。歲君攸居。位于鶉首。殿乎坤闈。東井洋洋。土德之基。錫我嘉福。順我禱祈。

歲后

歲德至尊。歲后配之。黃裳元吉。象服是宜。理其內教。以佐無爲。沁園有禱。卻除病菑。

勝光

陰之始生。實自於午。於卦爲姤。柔順斯主。皇有懿戚。元辰麗焉。是用禱祠。惠我安痊。

土星

中黃正炁。維土之神。神氣上騰。煌煌向晨。元辰有宮。其光來燭。鑒于戚邸。悉茲多福。

婁宿

維主之生。誕彌其月。遡其元胎。在魁之揭。其宿維婁。光耀燁燁。除我疾疢。安康毋越。

病符

六氣不齊。庶疾乃生。維其司之。有神孔明。執其靈符。以佐歲行。禱以嘉薦。惠我安寧。

金神

五行之中。金主肅殺。有神孔威。司是嚴伐。歲行遇之。伊怒孰遏。享我忱禱。毋敢凌越。

災殺

沴氣所生。曰能致災。以殺爲名。不亦暴哉。和以嘉醕。柔以嘉脯。順而好生。永錫多祜。

喪門

白馬素車。人寔忌之。孰啓其門。有神蒞之。上帝好生。爾獨何爲。攝而懼心。安我戚聞。

五鬼

五氣之歸。其名爲鬼。絀而弗伸。有繁厥類。載以酒漿。道以車船。既享而除。勿爲禍愆。

青龍

星有角尾。其象維龍。蜿蜿蜒蜒。東方之宮。木德司春。爲善爲仁。永錫嘉祥。百祿是臻。

白虎

昂畢之上。其象維虎。有虓有武。在西之滸。金德是司。爲義爲刑。尙斂其威。美疢用寧。

送神

陽主于德。陰主于刑。刑斂德揚。陟降在庭。既享既歆。以安以順。神還應遲。福以時進。

醮星祝文

迎神

欽若昊天。觀象知微。爰卽靈臺。秩祀惟謹。大庖旣享。大尊旣盈。神其格思。來享克誠。

太陽

東望扶桑。赫曦來升。羣陰旣伏。萬國咸承。朝賓陽谷。彝禮斯在。齋宮告誠。綏祿萬載。

太歲

煌煌歲君。臨於端門。有烜朱方。歲德攸存。當離之明。如日斯赫。降爾嘉祥。以輔有德。

天罡

蒼龍之墟。左爲天田。神蛟應龍。景命所躔。斗爲帝車。惟剛是指。相我有道。來錫繁祉。

小吉

維鶉之首。土德是毓。是爲吉神。厚德嘉福。宮壺嚴嚴。景命所臨。徽柔懿恭。式薦其欽。

功曹

寅爲人統。其方析津。肅肅青宮。盛德惟仁。煜煜箕尾。保我景命。克長克安。以輔明聖。

歲星

盛德至仁。所主爲歲。長養生成。福祿攸系。煌煌景光。臨照有方。一人以寧。萬國彌昌。

羅喉

明離有神。維南是司。承其餘光。劍戟孔威。其威孔揚。其福亦厚。來降來享。作我嘉祐。

太陽

明兩作離。繼照四方。赫其有輝。照我青陽。青陽有煒。百福來委。俾熾俾昌。以承天子。
太衝

木德之盛。次於震方。至仁應規。以佐青陽。迺錫嘉福。以暢元氣。帝后萬年。本支百世。
太白

長庚之精。司兵司刑。燁燁其輝。輔日而行。斂爾光芒。順爾軌度。以安以寧。佐我昌祚。
熒惑

赫赫炎炎。揚光於天。孰當其鋒。奮烈莫前。維國有道。宜順軌則。順行爲福。以相有德。
歲后

黃裳元吉。以順爲則。佐於歲君。豐阜民物。靈臺有祠。敬恭禱祈。陰陽理和。百福是宜。
青龍

東方蒼龍。至仁至靈。角尾之間。赫乎明庭。青旂蒼玉。禮祠維肅。蜿蜿蜒蜒。來降景福。
白虎

兌爲白虎。至雄至武。其德爲金。威怒孰禦。白旂素車。象德以旂。風其從之。百祿是宜。
送神

威象於天。降靈於地。國有令儀。克致禱祀。禱祀敬恭。神歸匪遲。天子萬年。福履綏之。
金籙普天大醮青詞

建齋詞

續述不圖。恪奉祖宗之訓。導迎景貺。永綏家國之基。冀輯福于眇躬。暨息菑于中壺。垂象每懷於示儆。祈年尤切於好生。伏願慶衍宸闈。祚隆繼嗣。乾和保合。三光全而寒暑平。坤厚順寧。五穀熟而民人育。

祈嗣密表

祇荷鴻休。肆膺神器。念祖宗之付托。思民社之依歸。重惟繼嗣之隆。實繫本根之固。敢嚴秘祝。用格高穹。伏願錫祚慶圖。申受上天之貺。儲祥寶系。益崇萬世之基。

皇后保安密表

寅奉上穹。申言中壺。克相憂勤之念。每嬰疾疢之虞。冀導嘉祥。用綏福履。伏願高晨鑒格。正氣宣通。天清地寧。保太和而合德。家齊國治。均厚福以資生。

建壇詞

奉丕基以臨萬國。于今有年。類上帝而徧羣神。肇修秘祝。仰輯薄天之慶。俯將率土之誠。紫壇森列於人文。丹闕昭回於象緯。伏願天垂甘露。地發醴泉。靈風受職。以周旋。道氣成章。而嚮達。永符至順。孚佑皇元。第一日早朝祭皇天后土三界萬靈上資宗祧先聖凝神沖漠垂祐邦家祝延睿算保固丕圖中

闡齊年本支繁衍

月律應時。卦極正陽之盛。天根開景。氣升清旦之初。通變闡於雷風。妙流行於山澤。均承主宰。咸赴禱祈。伏願聖祖神宗。陟降洋洋而在上。皇天后土。卑高秩秩以分儀。迺發禎符。用隆寶曆。延齡維永。尙期媿德。

之同。錫羨有輝。更應多男之祝。

午朝祭日月星宿祈日月齊明星辰順度

離爲日。坎爲月。瞻陰陽交易之機。天應星。地應潮。察上下盈虛之候。儼宸居之伊邇。望暑景之方中。敷宣
葉笈之文。朝步琅霄之境。伏願赫曦繼照。煌煌旁燭於萬方。素曜並明。肅肅順行於九道。帝車臨制。四序
曦和。雲漢爲章。五緯咸若。副此乾乾之兢惕。錫子郁郁之嘉祥。

晚朝祭五嶽名山祈社稷尊安宗藩輯睦風俗醇厚百辟忠貞

觀符瑞而告功。升中斯在。出雲雨而及物。望秩攸崇。巖巖民庶之具瞻。肅肅天真之下治。卽秘祠而用幣。
及初夕以飛章。伏願方嶽奠封。靈祇受職。宗藩輯睦。永綏磐石之安。風俗清淳。長被喬雲之覆。

第二日早朝祭聖帝明王先農后稷消穰水旱蟲蝗祈五穀豐稔民物阜康

繼天立極。宣惟上帝之聖神。開物導民。實贊無爲之化育。道秉機緘之秘。教興衣食之餘。功敍九歌。業隆
萬世。藉白茅而明薦。望素履於虛皇。伏願無聲無臭。以作字鑒。此小心之昭事。不識不知而順則。密符大
德之好生。民風馴致於雍熙。國祚誕膺於長久。

午朝祭風雲雷雨祈風調雨順寒暑應時

鼓以雷霆。潤以風雨。彌綸功用之神。求諸形體。原諸性情。主宰玄元之造。觀萬物散殊之迹。知兩間旁薄
之仁。無爲而成。有相之道。日麗端門之景。雲開祕笈之科。伏願天德潛符。歲功咸遂。九農百穀。無旱乾水
溢之虞。四海羣生。享安靜和平之福。庶釋憂於宵旰。用和惠於春秋。

晚朝祭四海四瀆祈山川定位海宇清寧

一元合氣乘風澤於洞虛。百谷來王。出淵泉於溥博。首五行而善利。潤萬物以資生。貨殖用興。舟楫以濟。稽古玄圭之錫。沈茲蒼璧之章。伏願地平天成。府修事治。玉書保運。制衝潰之洪波。寶籙宜年。動滿盈之甘澤。民安居於樂土。國養德於長源。漸被所同。旁溥無外。

第三日早朝祭三洞四輔經籙傳教宗師祈百神效職臣鄰忠孝國祚延長

太元結氣。冥思浩劫之初。妙有垂芒。朝徹延康之上。參贊化工於物始。傳流神寶於人間。保昌運以長存。握真符而不宰。將輯簡穰之福。茂陳敷落之篇。伏願乾曆開天。坤珍闡地。種民在宥。颺言清靜之風景。命溥將相協玄同之造。忠言彙進。道德彌光。

午朝祭左社右稷城隍社令祀典神祇祈民樂太平物無疵癘兵寢刑措疫癘潛銷

泰社之十五色。重嘉穀之屢豐。方澤之樂八成。致幽祇之畢出。帝命作九圍之式。神靈會萬國之封。力扶玉局之安。寅奉璇霄之降。伏願泰階昭晰。坤遂順寧。物阜民康。無疵癘札瘥之害。兵寢刑措。皆生聚教養之時。以至永年。並依玄造。

晚朝祭九壘土皇幽陰主宰資度忠臣義士兵死橫亡六道四生俱登道岸

禮樂鬼神。信顯幽之一致。生成變化。知闔闢之無私。卽昭明焜蒿之間。布風雨霜露之教。三光攸燭。九夜斯煌。伏願帝命下招。天陽來復。玉袍犀甲。禮余忠義之魂。瓊簡羽章。起厥幽沈之趣。羣類並躋於道岸。泰和庶協於明時。

散壇詞

五時列祠。燁燁紫壇之燿火。九宮飛步。雍雍碧落之空歌。備成絳節之朝。敷散瑤華之景。玄科有誠。至敬無文。伏願陟降在茲。達玄黃之玉氣。福祿來下。生丹碧之芝英。普與羣生。恭承嘉惠。

設醮詞

三清

奉承寶位。對太上之顯光。保佑眇躬。罄淵衷而忱禱。肅清璿館。修設金科。伏願元氣網緼。真風舒鬯。室家祚胤。膺福壽以咸宜。宗社臣民。荷禎祥而均慶。

玉帝

維天與祖宗。既全畀付自身。而家國悉有禱祈。爰啓真科。用于洪造。伏願鑒觀。儆懼孚佑。眇沖保和宮壺之安。錫羨本支之盛。至于臣庶。共樂生成。

星主

星環次舍。仰瞻天極之尊。氣斡陰陽。妙宰帝車之運。景光來下。祕祝用陳。伏願司命紫微。自中宮而錫福。儲祥寶系。率下土以蒙休。

天皇

坤拱神圖。妙秉萬幾之會。坐臨華蓋。旁分六甲之司。歲祀殊庭。承禧穹宇。伏願抱極樞而環照。皆占至順之祥。奉天一以尊居。增授泰元之莢。

后土

奉若柔祇。配皇天而立極。統臨廣宇。宅吉土以升中。爲國有祈。維靈斯荅。伏願羣生成遂。九有奠安。玄乙親祠。綏保徽音之嗣。黃流用裸。燕貽翼子之謀。

至順二年十二月二十三日祭星常國公奉旨命撰祝文

迎神

瀨瀨圓穹。三光昭明。四方八維。柔祇利貞。蜡通百禩。歲事告成。犧尊多儀。來享克誠。

天剛

天眷萬方。篤生聖明。受命溥將。攝提建貞。天田之上。左角所經。蒼龍致福。萬歲咸寧。

羅睺

受天明命。百靈翊扶。旁燭有光。赤燿之餘。首乎天經。形隱弗舒。戢爾矛戟。迎祥帝居。

室宿

河有天源。木貴天根。帝命降祉。元台爲尊。定之方中。煌煌焯焯。推而祀之。萬福之門。

弔客

昊天成命。如日斯照。運行推移。載占其小。有客冠素。適據隅兆。祝而祓之。易號以笑。

小吉

乾以天健。坤以地厚。鶉首之墟。土德孔阜。肅肅中宮。元命昭祐。六五黃裳。元吉之繇。

太陽

日以像君。月以像后。陰承陽輝。萬福備有。晨光熿融。晝景煥明。以壽以安。以生以成。

參宿

參墟耀靈。士德長生。台息其和。發爲滋榮。正位居體。西南利貞。培本長源。萬福來成。

金神

中宮土德。位南之西。太白流英。挾威以躋。雄毅肅嚴。戈鋌利犀。尙革而從。降福孔皆。

太衝

煜煜青陽。震雷之門。玉兔肖類。蒼龍儲恩。帝冑天錫。景命翊元。東望孔祠。扶桑載暉。

太陽

肅肅紫微。前星有輝。上承天光。仰接日儀。煦煦爲春。明明在時。陽德粹純。品物咸熙。

斗宿

星回于紀。斗臨漢潢。璧合珠聯。三辰齊光。震夙元台。肇此青陽。司中有神。源深流長。

白虎

木性東榮。金行兌勝。刑德之交。史謹其徵。於菟耽耽。負隅若闔。率義從仁。祈報斯稱。

病符

六氣之邪。孰執其契。歲行神從。臨午之位。青陽占運。適與之值。祝以移精。安和允濟。

太陽

靈臺有祀。報本主日。仰瞻陽光。步我神容。歲周星回。天序有秩。牲幣敬共。嘉惠申錫。

太歲

日月次周。成我歲功。百神具來。羣蜡畢通。明堂嚴嚴。盛德容容。享我報祈。以興嗣豐。

青龍

龍有天德。維木之仁。大明生東。獻歲發春。時而淵潛。時而奮申。施惠自天。至于庶民。

歲后

赫若歲陽。其配在陰。以肅內治。以保中臨。丁女癸妃。其從如林。通幽達微。鑒德以歆。

送神

神來如雲。神惠如雨。彌天映日。惠澤周普。歲行維新。秩祀咸舉。相于皇明。永作神主。

黃籙溥天大醮青詞

建壇詞

歷念先朝。悵神游之日遠。言修秘祝。導靈氣之時升。闢玄景以通誠。建紫壇而經始。伏願懸珠空境。扶玉方輿。風馬雲車。順陰陽而陟降。龍章鳳篆。舉幽顯以鈞陶。

第一朝回薦皇朝宗廟列聖神儀

肅肅在廟。永懷弓劍之遺。濯濯厥靈。恒若羹牆之見。爰資神筴。用導英儀。伏願列聖齊臨。萬真環拱。寅賓

出日返往駕於中天。妙合廻風。發化機於厚地。

第二朝回薦扎牙篤皇帝

企仰山陵。想音容而永慕。顧瞻霜露。感時序以增哀。爰卽紫壇。冀廻玄馭。伏願天健其行而無息。日窮于次而又新。神氣昭明。式慰臣民之望。景光旋復。更貽胤祚之安。

第三朝回薦皇親國戚一切靈儀

藩屏國家。實屬本支之盛。沈淪泉壤。每傷幽顯之殊。遡璇宇之流光。廻銀潢之逝水。伏願會陵絳闕。受煉朱陵。在河嶽。在星辰。還復生民之始。爲支庶。爲藩屏。永承丕祚之隆。

第四朝回薦后妃公主嬪御靈儀

禱諭在御。歷思儷極之尊。車服充庭。徧念穠華之盛。慨生存之弗永。致薦悼以惟勤。伏願施德自天。資生絲地。性靈不昧。釋然幽滯之懷。運祚無疆。仍會聖明之樂。

第五朝普薦勳臣宰輔文武官僚

追懷神聖。脩般薦於曾霄。爰念臣鄰。載忠魂於厚壤。俾偕膺於金籙。庶仍從於瓊輿。伏願受日之光。承天之佑。圭璋濟濟。眠王國以並生。明典昭昭。秉民彝而不昧。

第六朝普度兵刑橫死男女衆魂

內脩外攘。寧免兵刑之用。上征下暴。更深泉壤之悲。拯無告於重陰。寔有資於大造。伏願天光旁燭。地氣昭升。斷者續。死者生。頓釋幽關之故想。病者愈。憂者樂。永爲化國之新民。

第七朝普度普天。率土兆姓羣生。苦爽窮魂幽靈等衆。國家每念於生靈。則脩治道體。魄或淪於苦趣。更轉化機。啓勝會於今晨。廓迷塗之宿業。伏願陽開陰闔。天施地生。執籙把符。仰至真而得度。葆和正性。固大化以長年。

第八朝專爲和安天地調順陰陽保國寧家康民阜物

存順沒寧。極幽明而無憾。往禪來續。妙化育於不窮。宣金籙之玄文。保蘿圖之景運。伏願乾坤毓德。日月垂光。列聖在天。共敷恩於祚胤。一人有慶。永錫福於臣民。

第九朝昭謝皇天后土岳瀆山川陰陽主宰

天佑邦家。總基圖於九有。日臨海宇。妙樞紐於羣生。仰三景之高居。罄一忱而昭謝。伏願降年有永。錫福無疆。凡在臣鄰。咸保忠貞之節。庶幾民物。常依道德之光。

解壇詞

肅肅紫壇。旣備九朝之禮。煌煌金籙。益增列聖之光。熙事告成。誠心孚格。伏願神隨天運。福被坤輿。瑞日祥雲。常麗會霄之景。太山磐石。永隆萬世之基。

設醮詞

三清

天眷基圖。列聖繼守成之緒。時因曆數。先皇成賦代之期。敢緣追遠之初心。普致闡幽之忱禱。伏願開明三景。敷落五文。九轉成真。旣備生神之妙。百靈交鬯。復還象帝之初。仍錫壽祺。并祈康阜。

玉帝

昔扣玄穹。導近親之神識。過臨素幄。致大寶於嗣君。乃陳祕籙之科。溥濟幽關之趣。伏願昭宣天德。旋復氣機。陟降帝傍。九族逍遙於金闕。經綸宇內。羣生成遂於縣圖。申錫長年。永依妙道。

后土

基圖鞏固。每資厚載之功。體魄歸藏。謹候昭升之氣。降璇宮而來享。鑒金籙之敷宣。伏願效法成能。資生有道。超神太極。齊日月於中天。合景至陽。綏子孫於下地。

東極

先皇猷代。因軫念於幽局。上帝好生。爰禱祈於東極。冀瑞光之遠逮。引羣誠以俱超。伏願甘露霽林。慈雲就日。丹鑿寶蓋。並從妙道。以高居玉曆。金符永鎮。生民之極樂。

風伯祝文

東朝有命。祇肅元壇。上帝鑒臨。萬靈率職。咨爾風伯。塵路惟清。戢暴扇和。熙事用成。急急如律令。

雨師祝文

咨爾雨師。灑道是司。和陽散陰。相成祝釐。

皇后修設黃籙大齋齋意

言念宗親。將薦誠於既遠。遽罹大故。屬在疚之方深。肆嗣皇繼序之新。申前日籲天之實。普超幽爽。咸濟生靈。伏願道妙無方。真游如在。升九霄之神氣。衍億載之昌圖。凡罔化工。並承德施。

正薦位白文

言念先朝列聖。帝室懿親。蚤遺體魄於人間。思導神明於天上。鼎湖弓墮。俄興臣妾之悲。丹闕禮成。既得基圖之托。及燕休於長樂。申祈禱於太清。惕然霜露之寒。恍若風雲之會。龍儀虎衛。陽光照灼於朱陵。貝闕珠宮。明水激揚於東井。願金支之並濯。與玉氣以俱升。穆穆乎秉德以肅雍。洋洋乎在帝之左右。輯和九族。驩娛還若於生存。旋歷曾霄。感爽頓忘於凝滯。返至真而外無與。造化以爲徒。況王政施仁。必先無告。而大鈞播物。何間有生。更推滄海之餘波。徧及幽關之苦趣。妙機所運。道化同超。明則復爲人。亦我聖神之賜。斂而錫之福。庶乎寬大之恩。嘉與明時。共躋壽域。惟天地日月合德。合明保子孫黎民。能安能久。

孤魂榜

生死者。晝夜之常。汝勿認昭昭靈靈之識。坎離者。乾坤之用。吾以開生生化化之基。茲者清朝。稟承慈極。尊尊而思逮於凡下。親親而念及於幽遐。導揚列聖之法筵。普惠重泉之苦趣。如茲良會。實號希逢。汝孤魂等。昔受天地之降衷。其初皆善。各累形氣而逐物。以妄爲常。貪者徇財。烈者徇名。忿則如山。慾則如澤。極沈淪而愈降。恣飄蕩以忘歸。因根接塵。隨境生解。爲寒冰。爲湯火。皆其一念之差。爲鬼蜮。爲豺狼。遂入萬殊之變。原其名數。何可歷陳。我是以廣太上之好生。推妙嚴之濟衆。酌黃華於東井。蕩爾形骸。耀丹冶於南宮。陶其靈質。宿業不存於故想。化機更造於新成。不溺不焦。爾可以見本真之不昧。能流能焰。爾可以驗道氣之常行。承茲三景之開明。卽詣諸天而受度。更無退轉。並樂超升。

葉蓋北瞻天帝座。蓬萊東擁道家山。

啓玄殿

只尺天光開玉府。萬重道氣見金容。

正薦位

雙鳳駕雲開輦路。羣龍環日護天香。

總真殿

春當霄漢三台貴。朝步星辰四輔尊。

萬法宗壇門

綠章封奏通三景。絳節趨朝引萬神。

殿後西門

玉殿受釐春意滿。竹宮拜貺景星明。

北斗殿

慶雲郁穆承天闕。景緯昭回共斗樞。

殿後東門

仙音縹緲鸞鳳合。神衛森嚴虎豹間。

景曜殿

三光合景扶元氣。五緯齊明報德星。

寥陽殿

五文結篆間天極。九氣生神象帝先。

朱陵府

九華曲蓋迎司命。七寶芳林主好生。

齋廚

金鼎蟠龍甘露溢。玉芝成象大庖盈。

齋堂

報聞千歲蟠桃熟。約取九霄飛佩來。

茭郭

莫就此間存活計。便教向上得光明。

祭風伯文

維風有神在巽之位。地附天而不墜。持舉於中。陽旋陰而時行。扶搖直上。今則至尊有禱。上帝來臨。伏願宣靈氣於八門。穹祇翕合。卻飛塵於九地。宇宙廓清。

祭雨師文

恭承帝命。祇祀雨師。出雲氣於山川。彌綸瓊闕。濯天章於河漢。飛洒玉都。今則肇起玄壇。導迎法駕。伏願

六龍調馭。順和協於陰陽。萬物潤滋。肅澄清於天地。

長春宮祈福保安齋意

上天眷佑。長貽宗社之隆。至道冲盈。式衍邦家之福。屬偶嬰於疾疢。爰謹事於禱祈。伏願聖鑒昭回。祥光旁燭。身逢康泰。暨中壺以平安。運協壽昌。與多方而寧謐。

青詞

治平之運。仰荷洪庥。疾疢之生。敢忘忱禱。爰命羽衣之士。敬敷寶笈之科。伏願五帝儲華。三光協德。身康彊而逢吉。有永壽祺。國清淨以無爲。均蒙福惠。

崇真宮祈福保安齋意

丕承付託。仰資天地之和。祇有啓居。偶感陰陽之沴。喜過臻於康復。爰謹致於禱祈。伏願輯福上躬。錫禧中壺。前星炳煥。協家國之尊安。景貺熙明。及臣民而定壹。神明垂祐。丕顯隆平。福履愆和。偶嬰疾疢。敬祠琳宇。備葺琅科。伏願景貺來臻。壽祺永錫。康強逢吉。承宗社之安。化育成功。長乾坤之造。

祭海神文

潮失故道。犯我鹽官。有司捍防。民力旣殫。閱歷歲時。靡漬茲害。浙郡多下。恐就淪敗。民實何辜。不德在予。相臣來言。交修用孚。乃勅中外。悉智展力。相爾有臣。亦克受職。我土旣固。民生底安。六府治修。報祀萬年。祭伍子胥文。

爾以忠隕。王潮于吳。潮今爲災。吳其沼乎。爾其揚靈。具訓海若。俾安其常。毋作民虐。旣止旣安。民遂有生。

爾作明神。永有令名。

大龍翔集慶寺正殿小上梁文

伏以龍光有赫。象教方興。式嚴前殿之崇。祇奉祇園之勝。上棟下宇。方締構於良工。細栴大案。並具材於貞榦。成規斯在。願力維弘。伏願天相聖心。佛加神運。百重闌楯。移來天際之慈雲。萬歲山河。永鎮人間之福地。

吾殿小上梁文

兜率化宮。移來地上。梵天新刹。示現人間。坐延衆佛之臨。殿有四阿之制。鉤心鬥角。先崇締構之宜。審面飭材。已具經營之素。式觀地架。儼若天成。伏願龍象翊扶。鳳皇翔繞。丹青金碧。赫然佛日之輝。黼黻文章。永著皇風之盛。

大龍翔集慶寺正殿上梁文

伏以虎踞龍蟠。卽淵潛之佳地。雲興霧滃。建梵釋之新宮。巍巍中正之居。赫赫大雄之座。欽惟欽天統聖。至德誠功。大文孝皇帝。惟天爲大。如日之升。經綸既正。於洪規崇信。不忘於願力。美矣善矣。大成舜帝之節。韶經之營之。匪爲文王之臺沼。我佛有護國救民之助。吾皇示報功崇德之心。黃金滿布於祇園。華構上移於兜率。式崇大殿。爰舉脩梁。相我工人。陳茲善頌。

拋梁東

日上扶桑散曙紅。鹿苑珠璣涵曉露。鐘山草木動春風。

拋梁西

石城突兀護江堤。舊遊曾見羣龍舞。望幸猶聞六馬嘶。

拋梁南 蒼龍曾此臥江潭。風雲會合千峯一。山谷傳呼萬歲三。
拋梁北 瞻望帝星臨萬國。山川誰爲地東南。形勢只知天咫尺。
拋梁上 白玉毫光千萬丈。吾皇還似覺皇尊。龍象人天皆拱向。
拋梁下 亦有嶰嶰千萬厦。彌天法雨本無私。滿月明珠寧有價。
伏願上梁之後。皇基鞏固。紺宇尊高。紀億萬年。共祝聖神之壽。遍大千界。同沾殊妙之恩。萬歲萬歲萬萬歲。

吾殿上梁文

伏以浴日九淵。現禎符於鐘阜。承天八柱。建名利於治城。爰開方廣之筵。用祝周阿之殿。欽惟欽天統聖。至德誠功。大文孝皇帝。清明有鑠。故舊不遺。驚起新河。萬斛綵舟之容。與鳳歸天闕。七重寶樹之檀。爰轍跡之所臨。宜珠光之共護。脩梁肇舉。善頌斯陳。

拋梁東 萬丈紅光接寶宮。古佛昔來龍繞座。高僧時謁錫飛空。

拋梁西 長安日近碧雲齊。但依貝闕瞻龍象。卽是鸞輿慰老倪。

拋梁南 千年王氣現優曇。浴龍池水皆功德。擁日山峯盡翠嵐。

拋梁北 上意每憐江樹碧。紺宮留鎮國南門。華蓋瞻依天北極。

拋梁上 紫蓋紅雲春蕩漾。舉頭見日庶民心。思佛思君同一想。

拋梁下 慈雲恩雨均沾灑。三年以至萬斯年。長樂昇平承福嘏。

伏願上梁之後。皇風遠播。佛日同輝。四字八荒。總被覺慈之化。億靈萬載。永歌帝力之加。萬歲萬歲萬萬歲。

道園學古錄卷之二十七

歸田藁一

賦

東臯賦爲趙德莊作

出東郭以聘望。得逶迤之方臯。窈窕脩筠之舍。盤桓嘉樹之高。秀野綠縵。長渠翠濤。界畦疇以分畫。列藩籬乎周遭。汎崇蘭於舊畹。薦幽澗之新毛。鳶魚樂兮。天光雲影之動蕩。虎豹蔚兮。山輝川媚之薰陶。結幽居以靜好。不窺園以爲遨。或視明星而弋鴈。或饜朋酒而魚羔。其有乘敝屨於軒冕。託遺響於歌騷者乎。吁嗟。惟麟黍稷在畿。眇故封兮。江海。悵王孫兮。不歸。載耘載耔。載裳載衣。忽十世其將遠。挺三君而奮飛。奉賢書以造廷。並策名於常旂。鸞翔鳳翽。赫其有輝。值炎精之旣淪。遽斂翮於熹微。於穆季侯。知德者稀。中田有廬兮。種瓜。北山無蹊兮。采薇。悄悄隱憂兮。顧懷。懇懇蓄畝兮。疇依。慨膚士之不億。懼俯仰之多違。侃侃廣文。特起無儔。內有明賢之助。外嬰憂患之酬。二親高年。一身百謀。煦煦陽春。英英涼秋。屢專席於名郡。常曳裾於諸侯。觴詠不間於絲竹。旨甘頻及於交游。積累之勤。百福是遒。婉婉子孫。食德不渝。嗟予少時。迎于名門。揮弦飛鴻。垂綸遊鯤。老至不知。車懸身存。夕草載露。黯然銷魂。訊故老於岑隅。索履跡於崖根。秀娟娟兮。旣長鬱蒼蒼兮。彌尊。孰辟世於醉鄉。樂舒嘯於丘園。晨光粲其盈庭。鶴鳴聞于九天。黍稷旣豐。華實載繁。俎豆衣冠。古而又文。東臯之人。其昔之桃源也邪。

芝亭永言

古詩四言

環洲詩爲蔡天壁作

溪有清流環我中洲。雜華鮮明。芳草和柔。詠有文君。鳴有睢鳩。采采遊女。侃侃良疇。載泳載游。在我中洲。迥迥無端。沿沿無止。既采蘋藻。亦有蘭芷。觀彼嘉魚。一日千里。彼畎彼畝。皆爲方田。分合雍丘。我流壁旋。星迴于天。雲媚于川。君子樂豈。眉壽永年。言命輕舟。言載百壺。駕我乘黃。履我雙鳧。汎汎彭蠡。至于匡廬。詠歌以歸。清風載途。

冰雪相看亭

趙君有道之先。故宋南渡時。自東都徙分宜。三百年于茲矣。其大父登進士第。仕至文林郎。湖北憲司。幹辦公事。其父兩舉江西轉運司進士。覃恩受官。宋亡不復仕。城東故地。美竹萬箇。作亭其間而隱焉。名之曰冰雪相看。信國公之子平遠宣慰之所題也。有道信厚敦愿。衣冠容氣。翩翩然有王孫公子之遺風。敏稼穡以服徵賦。謹詩禮以保族姓。無外驚。無妄求。弗變其父之志。以老其身。以長其子孫。是以士君子稱焉。夫元亨利貞之爲德。猶春夏冬秋以爲時也。君子觀乎運序。以自處。則合於時措之宜。而不過焉。方其以振振麟趾之賢。處富貴之極。則大亨春夏之時也。自其來南。族蕃以久。非秋之利乎。其在有道。爲冬之貞無疑矣。冰至堅而不折。雪至潔而不汗。凜然相看。不接於他物。誠得處貞之道也。予

聞而善之。故爲之賦詩焉。

挺挺直筠。琴岡之陰。豈無春陽。匪今斯今。高宜於天。下蟠地深。不易其節。侃侃素心。豈無膚敏。白駒駸駸。我獨考槃。樂乎幽林。堅冰在淵。積雪在岑。獨往不迴。悠然行吟。采采紫芝。園綺是尋。還求陶生。撫我素琴。逸乎古人。副我夙欽。

竹林七賢圖

瞻彼脩竹。下臨清流。文石偃隄。華松蔭丘。植表界壤。翦茅宅幽。梁度高巘。臺隱中洲。方床讀書。異宮同休。詠歌相聞。觴豆相求。或蒔名藥。或釣游鯈。課藝嘉植。坐思遠游。濯纓微波。看雲良疇。逸而不放。儼而自脩。秦哉沮溺。邈乎巢由。按圖以觀。永宜春秋。孰若五君。遺其故儔。糟粕塵世。高踪莊周。我懷古人。邈而遠憂。安得揮弦。以招湛浮。

竹溪六逸圖

悠悠逝川。矯矯逸民。攜書相從。敷席水濱。支頤負暄。揮羽却塵。躡屐遠道。隱几重茵。幽響中發。虛觴載陳。投我嘉實。含和茹醇。優哉悠哉。及茲良辰。山有鳴鳥。郊有游鱗。濟濟以寧。我懷古人。

古詩五言

題汪華玉所藏蘭亭圖

衡茅負晴旭。有客至我門。共披會稽圖。山木盛繽紛。衆賢坐水次。飛觴汎沄沄。夷曠各有趣。高閒知右軍。

幽情付後覽。陳迹感前欣。悠悠千載來。不異更旦昏。探穴問神禹。望海悲秦君。逝者皆如斯。死生固奚云。所以鼓瑟人。思從童冠羣。春服涼新浴。歸歟聊永言。撫卷不知老。遐思在茲文。東南極積水。日暮多浮雲。

寄題曹元賓尙書臨流圖王繼學參政畫

昔聞適炎服。中道臨清漪。涵涵蕩蕩荒日悠。悠悠動寒颼。來者何滔滔。逝者不可追。聖有川上歎。晝夜固如斯。解纓手自濯。浩蕩忘險夷。高人今摩詰。萬里同襟期。抽毫寫幽思。帶雨更題詩。三年反田里。春河釋冰澌。舟楫繫野樹。灌沐晞晨曦。上堂喜懼集。艱辛謝親慈。入室換野服。登山采靈芝。庶以永年壽。豈惟療朝飢。開囊見舊物。感慨深係之。歲晚金石友。看雲立多時。憐我不共看。寄言令我知。來鴻春若早。去燕秋易衰。近遠不相覲。加餐慰遐思。

玉隆留題

仙真治茲山。重阜隱延廣。冲奧元氣會。運至法靈響。與世作司命。神宇廓弘敞。及門春雨來。玄感副夙仰。摩挲晉時樹。託身何蕭爽。千載抱微息。日月共來往。欲爲黃髮期。日待紫芝長。上天垂光彩。月出江海上。故人不可待。惆悵理歸鞅。

黃堂留題

雲館息塵鞅。夜聞春雨聲。溪水傍階長。仙茅新綠生。曉氣動原野。曠分見夷平。神真昔參合。觀泉宅幽貞。儼然師弟子。歲來會秋清。遺民千載後。高宴從簫笙。因嗟蚤好道。晚歸濯冠纓。矯首望遠海。駕言羽翰成。神仙在平地。崎嶇愧凡情。太乙有移召。中洲良可營。

記夢

夢行衡廬間。千仞過蒼壁。崇高仰神明。深廣下不測。雲雨蓄盤礴。時至如欲出。網縕尙回旋。揮霍忽奔逸。物怪匿岩穴。懼若俟霹靂。黑波汎高樹。木葉走崩石。升身登玄間。縱觀龍變跡。俯視九州野。草木有輝澤。乃在風雨外。手畫素三尺。揮豪極動盪。落墨更沉鬱。圖成示坐人。共唉不可得。顧瞻以踟躕。恍惚增歎息。因之命肩輿。出門聊有適。大術何舒舒。白鶴從數客。略經幽澗濱。使上青松側。憑高望遠水。雙景蕩虛碧。拂石共客坐。芳草籍尻膝。忽然聞鐘聲。睡覺北窗席。

次韻陳溪山樓履

頗憶蜀井西。樓欄每易討。披心割魚子。束皮充彗掃。澗工巧紉履。文織象花草。輕鬆隔沮洳。緩步得堅好。長跪獻圯下。會期後三早。知君貴賤履。陟降恆有道。憐我涉世深。垂誠不待造。兢兢歷淵水。縮縮奉師保。時行不違矩。庶慊歲年老。

其二

解舄還上方。歸山據枯槁。禁足結僧夏。陳編謝探討。隱几或過書。凝塵遂忘掃。行庭不見人。誰或踐生草。實由筋力衰。無復馳走好。前年當此時。嚴召出城早。追度龍門水。賜見沙領道。鼎湖忽踰年。始克能趨造。感君素履詠。幽貞可長保。番番茹芝人。長歌豈知老。

其三

六月乃屢雨。良田不憂槁。獨念桂林戍。觸熱赴南討。道路備攘掠。所過淨於掃。縛人夜送軍。吏卒何草草。

蠻獠亦人類。義利啓戎好。尋原可制亂。機要貴及早。夜來送者還。頗言喝橫道。諸軍四面集。同月約皆造。誰爲飢渴謀。性命安可保。藜藿雖滿槃。對之令人老。

浮丘公吟寄赤城陳道士入山有遇爲溪山壽

浮丘生上古。形神蓋不泯。說詩秦漢間。安知非斯人。世俗苦淺迫。無能信直淳。雨雲不待族。飛光越窗塵。豈知有道者。千歲一息勻。金精歷可鍊。色重無磨磷。蒼蒼紫玄峯。只尺天北辰。神明寂已定。尊高此依因。握機稟元化。同流溥無垠。所以赤城子。從師踐荆榛。三周日却中。志確神乃親。廬間玉雪相。旭陽射光新。稽首受餘嘏。骨換非昔民。不遠恆在茲。矍然願知津。先生旦有聞。爲恭若逡巡。賤子請執御。端覲駕飛麟。爲變理普化。題陳立所作龍眠山圖

爨侯起高科。得邑舒水上。民淳事稀簡。田野甚夷曠。戰爭遺跡泯。山水良足賞。幽棲南昌尉。英爽赤壁將。古仙家白雲。美人化黃壤。岿岿龍眠山。一士獨可尙。高懷托千載。妙畫極羣口。向來讀書處。春雨草木長。夷遊昔賢遠。瑤席共來享。彈琴坐終日。微泉散清響。來者安可期。徘徊以悵悵。畫圖記彷彿。聊以慰遐想。

和陳溪山韻

幽人慎素履。古道思獨往。曠目登高臺。浮雲不足上。丹砂煉仙骨。沆瀣濯神爽。遠懷澄江靜。耿若孤月朗。河漢自傾注。山川邈游想。斂跡倦飛翼。歸耕故時壤。好風從東來。空谷感遺響。詔書薦遺逸。郡府屬高仰。聊持東湖水。往助敬亭賞。

和陳溪山送蘭花韻

幽林有藁蘭。菁菁秋不衰。憐彼采藥人。不識敷榮時。涼風動綠葉。清露生華滋。世傳神農經。圖書竟空披。深根寄連茹。藉以瓊瑰詞。同心永爲好。豈但服食宜。先民昔有言。所貴希見知。舊聞絕行仙。挽有童孺姿。南陽有黃華。西山多紫芝。度世未聞道。咀嚼空莖枝。淇一保冲氣。執御正不奇。靈苗無助長。無爲以熙怡。始信斷金利。終古真不移。千載同一息。敢忘君子期。

送空岩印公還徑山

東出楞伽室。西望香爐峯。曲折披翳蘊。蕭條倚枯筇。然燈共過夜。曝日忽經冬。天山斷緣想。海國識行蹤。忘言及生滅。抽簡托疎慵。追憶塔中相。表茲雲際封。螭父謝五鳳。永護煩雙龍。

題張觀海所攜虛舟竹所二毛圖

虛舟倚亭臯。脩竹相因依。水木有清華。魚鳥淡忘歸。鵝羣晚色靜。鶴羽傍林暉。似是鑑湖曲。幽栖掛朝衣。古道日已遠。昔人相見稀。蒼茫寫雲霧。蓬壺是耶非。

送龍翔高獨峯上人還金陵

承詔寫宮榜。馳使出丹闕。黃金射江海。光景依日月。邇來垂十載。感遇嗟白髮。神靈在雲漢。畎畝慨明發。祇園何潭潭。夙志返超忽。幽士住精舍。諸妄久息歇。浩劫鑑止水。高峯獨巖崒。觀察勝願力。知我心兀兀。清風不可執。振錫出林樾。

送海東銛上人十首用雲霞出海曙梅柳度江春爲韻

積水衆鷗滅。春空藹餘雲。掩室坐脩竹。天花散繽紛。上人東海客。來去何見聞。飛錫還日下。珠宮浪沄沄。

日色出海水。千波散明霞。一杯承足來。九載不爲賒。要觀香爐峯。折蘆長風沙。微吟動林響。蒼龍送浮槎。我昔參泰霞。東望候日出。子從日下來。海水中蕩漾。坐受龍女珠。簾垂夜光室。持還定何有。長空斷鴈一。爲法不辭遠。遨遊歷年載。衣中得故珠。終夜動光彩。還持一支葦。歸泛萬里海。駕言乘桴行。沙際如可待。旨蓄崇虛豆。生芻長冰暑。無堪餉遠客。桑下若爲住。行囊掛屋壁。破榻夜風雨。神光發慧劍。耿射東海曙。燕坐共禪月。行吟向孤梅。有懷匡廬山。老人岌崔嵬。洗鉢三峽水。振木東林臺。乘槎動歸思。欲去更徘徊。山居如老禪。坐致不請友。何方蒼下雲。識我門前柳。翠竹不礙山。黃花紛在手。未覺酬對難。離妄亦無取。老胡昔東游。勝士乃西度。到岸無彼此。不憚費筏屨。要之心本空。一了不移步。龍宮解相迎。黃金已先布。百鍊成利器。千金來海邦。清霜凝秋水。國士歎無雙。持正行正令。魔邪孰不降。觀子製名字。高風凜寒江。止觀覓心要。律儀檢凡身。密言轉相付。海刹幾秋春。奇哉善根熟。一徹無逡巡。子來得何法。歸報日邊人。

楚石琛藏主自蔣山歸却欲就叢林閱藏同舟清江之上賦此贈之

手攜北山雲。却上西江水。月明洲渚生。葉落風不起。虛舟不移棹。寒波釣金鯉。銀河轉碧落。北斗去天咫。龍吟匣中劍。虎躍弦上矢。殺機誰敢當。吹毛豈輕試。貝葉啓千函。木榻脫雙履。惟應勝壁觀。悠悠度年歲。

題東郊山房

秀挺東郊山。雲氣常覆之。林丘翳幽潛。流泉發芳滋。盤桓在中谷。良疇漾清陂。開堂直岡景。長年誦書詩。孝友夙所敦。求道遠有師。雅志尙端潔。凡近諒難知。康樂昔賜履。詠歌足遐思。啓書訪前聞。往跡無所遺。瞻彼南澗松。深根連喬枝。亭亭植高節。鬱鬱含令姿。衆木不同泯。悠哉副深期。

題蒙菴爲黃石谷賦

東南有高丘。下臨萬家邑。汪洋泱春潤。沃衍盛秋入。羣山若浪波。起伏翠重襲。靈運好奇險。高平罕相及。幽人園綺間。周覽度原隰。隨山導清泉。積石拾層級。結菴以蒙名。果行信所執。良時一來游。朔月九交十。門當星斗高。隴臥風雨濕。一川燈火歸。賓從雜車笠。登高愧能賦。騰身竦山立。

爲黃氏賦大雅詩

岐山鬱嵯峨。鳴鳥昔有聞。周公盛制作。經綸以彌文。朝事接燕饗。勸勞兼賓軍。肅雝述盛德。工歌替前勳。流蕩桑濮靡。何由返咸雲。陳肆輒有見。吳李真不羣。公子有古絃。歷然宮徵分。大雅忽有作。青春日方殷。高堂以居之。樂康永欣欣。

己卯十月廿二日從宜春郡幙嚴伯威觀南軒新閣登舟有賦却寄同游者劉粹中賢良

茲郡多美泉。小大各有神。深澗挾溫厚。草木何光新。披圖閱名世。顧皆仙佛人。退儉寡外驚。懷哉此良民。退之文旣遠。秦伯學未醇。昔我朱與張。遺言存縉紳。東湖有新閣。下臨南澗濱。周眺忽已晚。皎然仰空旻。虹梁互溪流。落日車馬塵。曾丘間叢祠。鍾鼓嚴昏晨。江潭嘆搖落。名邦感宜春。爲治古有道。川原隨所因。華構相爲雄。大雅竟誰陳。移舟古峽口。西望蒼嶙峋。浩蕩無與語。逝波絕垂綸。

秋堂

秋堂者。臨川吳生文明之親舍也。生才甚清美。賦詩婉麗。無塵滓之汨。觀其同門。未之及也。昔胡邦衡以詩人薦朱文公。大儒豈以玩物以成名哉。性情之正。冲和之至。發諸詠歌。自非衆人之所能。而士大

夫各以其見見之耳。生未可自喜自畫也。是以爲賦秋堂詩云。

閭巷多鬻塵。秋堂獨高深。有子能讀書。幽懷發微吟。天高風露下。澗泉落危岑。神仙絕飲食。穢濁無留沉。所以聽夜誦。共愛風滿林。神清易以哀。情長恐成淫。大冶昔有作。九牧歸吉金。熬樞下五石。工成振鴻音。宣風萬物暢。神祇肅有臨。鳳鳥鳴岐山。人文示來今。候蟲入床下。嗟哉苦勞心。

清風拂高堂。舊席忽已除。下堂具甘旨。上堂列琴書。垂紳夙夜至。再拜問起居。誦詩已三百。習禮少壯餘。納交君子室。執御長者車。爲樂古之道。誰能咲其迂。

題雪泉齋

長河互凝合。微泉自溫活。蛟龍依以生。抱困待春發。南雪不到地。流泉常在山。飛英散絕澗。流澌響潺湲。融結各有方。不息在無二。觀茲保深長。乃得養生理。濯尊薦寒冽。卷陽向熙怡。君子遠莫致。永言以相貽。平江開元雪。牕光禪師訪。予臨川山中。其歸也。予與賓客用一兩六月涼。中宵大江滿。分韻送之。不足予爲繼之。而予分得一字。

積雪何處高。蜀山最崑崙。海東極孤絕。目送斷鴻一。徘徊杪欒樹。宴坐但空室。園果墮宿雨。常晝從定出。八月露水繁。石鉢滿華蜜。相會豈無因。分床便深密。

賦彭氏靜深堂

君子憺無欲。淵然事幽潛。貞居觀物初。天機引休恬。寂寂象愚朴。容容無數厭。羣動不知止。謀思墮鉤筭。反息不及踵。乘舟膠漸漸。豈知本湛一。不與利欲兼。圖書發聖繆。受命字不占。戒慎保靈秀。先幾發微纖。

進善取損益。閑存日惟嚴。浩浩厚有積。悠悠浸何淹。盈科以時行。小人暫屬壓。虛堂積雨霽。光風草侵簾。空洞薄龍澤。止水澄秋蟾。善學在年富。勇哉副遐瞻。

秋山行旅圖

春夏農務急。新涼事征游。飯餽既盈橐。治絲亦催裘。升高踐白石。降觀索輕舟。試問將何之。結客趨神州。珠光照連乘。寶劍珊瑚鉤。乘馬垂首蒼。縱目上高丘。策名羽林郎。談笑覓封侯。大行何崔嵬。日暮摧回輈。古木多悲風。長途使人愁。羸驂見木末。足倦霜雪稠。谷口何人耕。禾麻正盈疇。出門不及里。酒饌相綢繆。壯者酣以歌。期頤醉而休。安知萬里事。有此千歲憂。

爲題馬竹所九歌圖

屈子久去國。行吟山澤秋。思君不復見。婆娑感巫謳。仰瞻貴神遠。俯慨深篁幽。衝波起浩蕩。玄雲黯綢繆。初陽翳扶桑。莽蒼蕩海漚。渺渺君夫人。遺玦在中洲。壽夭乘陰陽。孰知制命由。慨然長太息。悲歌寫離憂。想象以愉悅。開卷令人愁。

清明山房詩爲危太朴作

矯首望太清。正色蒼以玄。皦皦何歷歷。日星高轉旋。游塵雜氛氣。起滅尋丈間。容光見擾擾。孰與爲控搏。所以學仙者。凌空怡妙顏。質化入常寂。凝暉托空山。據會觀往來。生死何足患。妙哉太朴子。難爲世上言。次韻太朴良友對何仙舟讀書山中見懷之作

得謝荷休澤。消搖在巖阿。結廬庇風雨。樊圃塞藤蘿。塞坐古人書。日夕猶詠歌。追念少壯日。玩愒亦已多。

兢兢事補塞。奈此遲暮何。美人百里內。邈若隔山河。興懷貽好音。緼藉二春花。報言慎芳歲。卷石崇巖峩。

道園學古錄卷之二十八

歸田藁二

芝亭永言

古詩七言

江樓看劍歌書趙子昂劍銘後

豫章高秋宴高閣。乃出此劍相娛樂。當時冶鑄絕精英。土蝕沙沉更銷鑠。遺質所存如冷電。江光不與書光却。神光內闕氣逾深。識察誰能動冥漠。等閒千年不一試。壯士酣歌謾揮霍。嗟予衰朽雪滿顛。空對涼風起天末。或言江中有蛟孽。常煩仙人下寥廓。吾故臨風拂其鏗。俾伏崖陰無敢作。

劉忠肅公之四世孫中書舍人諱震孫之曾孫益之題其居曰雲松巢。予家與劉氏累世之契。故爲書忠肅公文集之首詩三篇并賦此詩與之。

丞相昔遊泰山頂。天風浩浩春晝永。玉檢微茫不可求。但覺靈霞熟丹鼎。白日人間如水流。前代衣冠成古丘。悠悠憂患何足計。直道十年橫素秋。徂徠之松數千尺。東連海上莫烟碧。中書偉人如玉立。每向南風望東北。濁世公子何翩翩。却憶匡廬還謫仙。夫容出水耀初日。五色光新天未妍。我今僑居廬阜側。西視義眉歸未得。豈無雲錦晚相娛。月落終懷雪山白。森森喬木魯東家。河間禮樂更光華。勿忘先世舊遊處。吾秣爾馬膏其車。

吳興趙子昂十馬圖

昔在祕閣見十馬。云是韋偃之所畫。此圖位置略相似。心神偶同。豈臨寫馬種本自渥佳來。濯濯清泉更瀟灑。常恐一旦風雨至。蹙踏波濤遂神化。英雄意氣今豈無。未見深沉如此者。君看最後臨岸驄。自是真龍無世價。

畫馬

百年升平却走馬。立伏天閑常見畫。蕭灘灘頭八十翁。却寫西來大宛者。高蹄如鐵項如鈞。風鬣蕭蕭苜蓿秋。常見貢來騎不得。長嘶要蹴崑崙丘。

題畫

連昌宮裏古牆陰。積雨過春黃竹深。老樹無枝交屈鐵。立石有書名錯金。吮豪池上寫幽鳥。承恩春日風光好。當時執戟今白頭。却對蕭森倚秋昊。

空山歌

高空之山聳公宅。稚川作圖纔數尺。秋天薄雲千仞表。春雨喬林百年物。憶昔侍郎鎮成都。將佐盈庭賓客趨。錦官城外笳鼓發。駟馬橋邊高蓋車。先廬舊在小東郭。丞相祠堂同寂寞。嚴公同訪杜陵家。退之亦到淮西幙。峩眉嵯峨久不歸。江水娛人秋日暉。坐看蓬萊變桑海。自古南城天下稀。公子親迎陳氏館。我初至撫猶弱冠。看君揮翰甚風流。豈想重逢鬢毛換。君言中間一再來。數見先公胸次開。鶯花風雨必求友。水竹園林持酒盃。嗟予晚歲始能退。寧有文章驚海內。平生不受簡書畏。故家高致君應最。圖中山色

積翠濃。雖欲舍子將焉從。蜀人相如最能賦。行倚山木歌高空。

爲燮玄圃題鼇溪春曉圖

夫容山陽萬家邑。石嶺戴轍縈紆入。溪水西行夜雨深。連村桑柘春雲濕。昔因荒迥少官府。日莫孤兔作人立。自從置縣二百年。稍有衣冠更俗習。讀書進士比舍聞。潤屋黃金亦家給。山中白日浮雲多。負乘因仍足車笠。燮侯世胄國勳舊。射策君門恥浚製。朱衣作監列星宿。遠人豈意高軒及。援琴不鼓書牒稀。彈缺無魚賓客集。綉衣使者停車見。黃堂大夫下床揖。登高望遠送飛鴻。攬轡駸駸庶原隰。人言桐鄉人愛我。我愛桐鄉重於悒。畫圖千疊山木稠。茂舍蕭條莫忘葺。

題馬竹所畫

霜清木落江海空。一棹歸來何處翁。雙松千歲如鐵石。爲爾回薄旋天風。憶昔神龍劍所化。夕臥滄波弄明月。望中冉冉雲氣生。直接銀河上瓊闕。

霍元鎮規模董北苑米南宮父子寫山水雲物殊有標致見示春江捕魚圖遂賦此

春江聚網萬魚急。漁人相讙魚相泣。負薪深山何處樵。利害相乘不相及。海鷗冥冥秋影微。黃葉江南一棹歸。人間得失兩無迹。不廢山水含清暉。

南岡

華蓋三峯立天表。山北山南青未了。曾看兩雲出太虛。幾送餘霞落飛鳥。岡頭春歸露未稀。梧桐鳳皇相因依。臥龍之孫思外氏。悵望輝光生翠微。

題何大夫畫馬

國朝畫手何大夫親臨伯時閱馬圖。伯時絕憶鐵面語。放筆驩躍懷此都。此都大夫八九十。千馬萬馬在胸臆。偶然數鬣落江南。捲束上箱謝槽櫪。

同開先南楚悅禪師觀息齋畫竹卷於崇仁普安寺煜公之禪室蓋煜之師一初本公所藏也因記延祐甲寅息齋奉詔寫嘉熙殿壁南楚與之同寓慶壽寺間予時爲太常博士俯仰之間已爲陳迹乃題其後云

嘉熙殿裏春日長。集賢奉詔寫簷簷。邇來二十有五載。飄零殘墨到江鄉。匡廬高人昔同住。身見揮毫風鬱鬱。木枯石爛是何年。修竹森森長春雨。

題村田樂圖

尺素自是高唐物。瑩如秋水宜設色。何人畫此畎畝間。二三老人若相識。茅屋蕭條古樹下。農務未殷牛在野。或怜鸛鳩脫籠繫。或弄獼猴咲真假。老翁政自如兒嬉。高髻襁負相扶持。古時粉社祀田祖。移饌高亭隨所宜。抱甕初來未貯酒。亦有生鵝宛延首。村優競攜樂具至。大怪鷄鶩兒拍手。拄杖出門欣見賓。雜華滿庭生好春。歲時無事得如此。擊壤何必非堯民。騎驢過橋殊矍鑠。攜具荒陂來赴約。定知張果千歲人。游戲人間共盃酌。

柳塘野鴨

江南水退秋光淺。風柳參差萬絲捲。鴛鴦在梁鳧在渚。蕩蕩扁舟去家遠。千艘轉海古長策。白粲連江動

秋色斷蒲折葦野水闊。爛爛明星且將弋。翠盤擎露夜深寒。玉色亭亭落月殘。太液池頭黃鶴下。夢中曾見畫中看。

丙吉問牛喘圖

少陽用事春猶淺。丞相公行問牛喘。三公職事知者稀。嗟彼德微蒙榮免。天子有道守四夷。中心無爲日萬幾。遠有旬服近有畿。夙夜明哲發裳衣。

江貫道江山平遠圖

江參去世二百年。翰墨零落多無傳。人間幾人寫山水。誰能意在揮毫前。昨見石林舊家物。春雷疊嶂初破墨。我和葉詩頗豪放。三者相望都突兀。險危易好平遠難。如此千里數尺間。高雲舒卷非散地。麗日照耀皆名山。我持美脯酒一斗。墨汁盈盤可濡首。江生精神作此山。向山呼生當至否。高秋銀漢天無雲。帷中冷然來夜分。黃茅嶺頭華蓋頂。畫我獨訪浮丘君。

爲汪華玉題所藏長江萬鴉圖

雲巢幽人愛江渚。抽思揮毫寫橫素。波瀾不驚潦水盡。秋氣晶明絕烟霧。征帆去棹不相襲。岸曲洲旋總堪賦。孤村城市僅如蟻。百丈牽江直如縷。蕭蕭木葉洞庭波。歷歷晴川漢陽樹。兼葭宿鴈天欲霜。叢葦寒鴉日云暮。就中樓觀何王宮。想見華年貯歌舞。丹青倒景駭靈怪。粉黛含情怨幽阻。青春遊子澹忘歸。白日冷黑帳中語。人間遺迹何足留。最惜精思墮塵土。郭熙平遠無散地。小米蒼茫托天趣。銛鋒鏘戟不破墨。刻畫品煢昔誰苦。渤海細書藝文草。精絕戈波絕回互。南唐後主萬鴉圖。點點晨光動毛羽。昔年曾見

今日昏。雖復逢之亦難睹。汪侯此卷出故家。相示摩挲極愁予。香奩犀軸見者稀。謾錄餘情示來者。

盤車圖

大車麟牛駕。輓西望大行雪千尺。往時飛挽實長安。百兩仰關過阡陌。亂流十里九屈曲。水濺車箱沙沒轂。前和後應日云暮。王事有程車下宿。旂旄央央昔臨洛。東南會期出方嶽。侯伯有位賦有差。載弊瞻迎來若若。君不見海艘百萬乘天風。京坻連雲多腐紅。天子視朝大明宮。千乘萬騎來何雄。

贈羽士費無隱

東望雲林三十六。聞有仙人結茅屋。清露零零采紫芝。白雪深深斷黃獨。國初山下苦流離。義士傾家救世危。百年孫子俱華髮。誰解燈前說舊時。聖恩深重絕征戰。猶慮寒溫資瞑眩。身着黃冠寫古方。薄素細書三十卷。相從寂寞久者誰。禹穴山頭一布衣。鬢如鴉羽顏如雪。跳入壺中夜不歸。市人扣門呼不應。光影俱消聲色泯。但言解隱不言無。不道本無何所隱。我欲作丹須水金。人間無藥不堪尋。青霞如練還相覓。華蓋衝天丈室深。

題漁村圖

黃葉江南何處村。漁翁三兩坐槐根。隔溪相就一烟棹。老嫗具炊雙瓦盆。霜前漁官未竭澤。蟹中抱黃鯉。肪白已烹其瓠當。屨粲更插寒蔬共萑席。垂竿何人無意來。晚風落葉何毵毵。了無得失動微念。况有興亡生遠哀。憶昔采芝有園綺。猶被留侯迫之起。莫將名姓落人間。隨此橫圖卷秋水。

題韓幹畫馬

韓生觀馬十二閑。時寫一二傳人間。坡翁嘗來伯時宅。見此遺迹開衰顏。前行如雲塵不動。後者追風絕飛鞚。昔人能事已可能。始覺賞識非虛諷。昔觀祕府韓絕少。得見龍眠已驚倒。使人讀詩如見畫。人中豈復生坡老。五雲之中天上奇。代產名駒天子騎。神明尙令後古見。莫歎韓生非畫師。

題黃都事仲綱山居溪閣圖二首

出山作官十載餘。聊托筆墨懷幽居。連雲一一列眉黛。細雨往往逢樵漁。隣家父老每載酒。隔屋弟兄皆讀書。我久居山不待晝。獨念稚子扶犁鉏。閣前流水秋愈深。故人東來還見尋。方舟直過彭蠡澤。把釣坐對香爐岑。雲中烟樹差可辨。江上鄉關誰與吟。我欲芳蘭寄遠者。日暮天際多輕陰。

題秦毓二夫人承召遊華清宮圖

貴人並鞵如輕鴻。承恩馳入華清宮。道途先不止行客。策蹇奔趨烏帽風。奚囊墮地何足拾。豈有篇章浪相及。畫史當時妙墨傳。光彩流動狂情急。君不見白頭拾遺徒步歸。明眸皓齒事皆非。朝天泥滑袖封事。高閣雨餘宮漏稀。

方壺畫山水歌

方壺之山在海中。世人欲見知無從。壺中仙人閔昏濁。綵筆手開三五峯。亭亭兩箇老松樹。萬壑千崖閱古今。憶昔長從王子喬。坐聽秋風最高處。世人畫山非不多。不識真山奈若何。君看昆侖上丹穴。芝泉玉樹森婆娑。東望方壺應不遠。飛度九州如過電。使從海上問金公。莫待浮杯水清淺。

示問

憶我蚤歲離親側。足自跋躑心惻惻。中年祿廩不及養。人羨清華已驚惕。歸來老病五年餘。閔子謀食躬
犁鉏。蓬蒿雜生果嶽異。蛛網微細仍縈紆。星河江上喜非遠。况與良朋適我願。故人念我一相見。暑中尙
慎柅樓轉。

律詩五言

玉隆宮所藏宋乾道宸翰雲壑二字

昔者雲歸壑。天章自九重。日華常暎鳳。山氣盡成龍。俯仰遺陳迹。高深儼德容。飄然化春雨。結想在高松。
投老清江外。依山結數椽。扶藜循水竹。把筆賦雲烟。歲熟無憂食。秋清不礙眠。故人相望遠。北極在天邊。

寄忽承旨

寄三衢守馬九臯

聞道三衢守。年豐郡事稀。詩成花覆帽。酒列錦成圍。鶴髮明春雪。貂裘對夕暉。扁舟應載客。閒聽洞蕭歸。
題朱澤民山水

積雪山陰道。嵯峨筆底生。雲門見童子。禹穴闕蛟精。高臥人何在。幽情幾詠成。杜陵空想象。晚飯柅樓晴。
寄題汪道士草亭

飛白妙娉婷。新題照草亭。仙遺相鶴法。客借換鵝經。霧雨歸懸黍。風雲護伏令。遙知春晝永。深坐養黃庭。

黃敬延送竹本

分得瀟湘玉，森森忽滿林。香爐來曉色，石檻借清陰。好共芝蘭長，毋令草蔓侵。清風月如畫，老朽要長吟。

聞鴈

樓近煖雲濕，夜深歸鴈低。聲音燈外盡，羽翮月邊迷。冉冉白榆上，悠悠黃竹西。應逢穆王駿，春草一長嘶。

錢舜舉畫

一樹花如雪，清明客未歸。坐看黃鳥並，夢作綵雲飛。翠袖寒猶薄，羊車過絕稀。相如能作賦，月下卷春衣。

山水圖

泛舟桑落浦，望見香爐峯。野水常欹樹，山雲不礙鍾。桃源攜客竟，松徑與僧逢。爲託荆關輦，添予九節筇。

丹霞觀黃知微留別

寓館隔溪津，過從厭市塵。振衣清露曉，拄笏野亭春。歸作芝田玉，思存黍谷神。松華頻寄取，老去欲輕身。

題馬竹所畫

老樹依江岸，歸舟傍釣竿。水花看晚淨，風葉識天寒。鴈字來千里，魚羹付一餐。遠山青可隱，目下是長安。

題曹霸馬

將軍今爲庶，畫馬寄高情。聚立天風起，長嘶沙草生。飛揚萬里意，凌亂五星精。日暮太行道，悲哉長短行。

答陳溪山元日卽事

積雪埃塵淨，光風宇宙新。閒來知惜日，老去善酬春。退密觀羣動，憑虛集百神。真人起居法，無一是違仁。

送客北門晨登山木閣

晨登山木閣。零雨煖於春。溪水解留客。梅花偏照人。林香知酒熟。市遠覺民淳。此地堪娛老。惟愁度水頻。

次韻陳溪山

移棹避殘暑。開樽就夕陰。冥鴻聊自達。幽草若爲吟。離索連三月。棲遲共寸心。遙矜溪上晚。扶策獨臨深。

又

乘興忽忘遠。相思知幾何。未使塵事少。謾悔世緣多。朝食烹芝菌。秋衣製芰荷。平生但隨運。何地不蹉跎。

杏園詩爲黃思順賦

善藥多陰德。名花種滿園。暄風吹雪盡。暑雨綴金繁。臥護煩仙虎。分嘗任野猿。佳兒足文學。食實似桃源。

寄題樓撫山普潤禪寺重增

寺在撫州城南八十里。唐普潤禪師道場。師姓翁氏。元和元年二月八日。坐化於潭州。有靈異。州人就肉身裝塑。後現夢撫州太守。迎歸建寺。至今遺體堅固如初。靈應尤著。

高人出世間。未忘鄉里思。靈骨萬里還。深恩千載遺。嘉穀歲恆登。羣生無痼疵。古刹抱禪悅。高丘依母慈。寺右有師母墳。名翁家林。卽師故俗家。崇構起積廢。新堂納華滋。今長老秋雲富公所建。東隣有一士。峩冠誦書詩。謂袁徵君誠夫。清秋約杖屨。千步攀松枝。寺後有山名千步。

寄題許愿夫抗雲樓

城居苦迫隘。層閣上岿甍。措身方丈間。千里心目超。可以抗浮雲。誰能顧塵囂。擬峴有古臺。遺碑正蕭條。

子固若星斗。其魂安可招。龐公輟耕際。頗懷見凌霄。賦詩托飛鳥。長空何寥寥。

贈劉無作

袖中殘卷在。動是十年前。逝水從前輩。傷情有妙年。博聞誰共學。孤坐獨求禪。莫恨相知晚。文章倘爲傳。

又贈劉無作

一家俱學佛。之子更劬書。諸老交游徧。真乘究竟餘。治生惟淨業。志養足嘉蔬。爲問龐居士。成能更久如。

道園學古錄卷之二十九

歸田藁三

芝亭永言

七言律詩

與燮元溥登仙遊和李浩卿韻

老去江山已倦游。况聞風雨滿溪頭。擬尋黃鵠望松壑。聊伴白鷗經稻疇。山崦有雲堪作供。酒樽無婦可歸謀。從教賓客回車晚。留取衰翁專一丘。

陳可復爲予寫戴笠圖賦詩四首

浮雲滿空無所依。高岡獨行來者稀。仙人冉冉遺松老。鳴鹿呦呦生草肥。伐木遠聞何處谷。頃筐近得故時薇。山中雨來霧先合。此日先生戴笠歸。
南園多竹暑氣微。始來結屋相因依。掛巾石壁晝霧濕。沐髮池水朝陽晞。頻年車馬踐霜雪。六月裳衣無綵絺。鄰翁問舊坐來久。此日先生戴笠歸。
老去懸車百慮灰。西風獨愛菊花開。田家酒熟邀皆去。茅屋詩成懶更裁。欲及天清滄沆瀟。要觀日出上蓬萊。赤松有約應相待。此日先生戴笠來。
捨却鄉人駟馬車。老身全不要人扶。雲霄一羽山頭杜。風雨孤村海上蘇。薄命長鑱隨積雪。多情破帽落

輕鳥莫圍玉帶垂朱絨。此是先生戴笠圖。

仙游道士余岫雲爲從珠溪余隱士求得華山下黃茅岡一曲規作丹室喜而賦之不覺五首

華山東下有茅岡。云是毛公舊隱場。清露尙餘丹滿白。白雲今許草爲堂。冬憑野燒開畬隴。春託山雷淨石牀。從此便爲千載計。洞天先拜紫玄章。

茅岡地主古醇儒。乞我岡頭作隱居。嶺上閒雲從管領。澗中流水聽開除。刀耕火種從茲始。雨笠風瓢便有餘。自古詩人多會合。浮丘毛氏不愁予。

石人屹立古仙壇。雙澗交流拱一盤。臨水種松須匱匣。就中作室要寬安。洞經卽日修真訣。玉臼逢春冶舊丹。却恐山中添故事。題詩莫與世傳看。

仙游辦得茅千束。華蓋須分屋數間。微咏玉經忘我老。謾調金鼎勝於閒。龍雷變化從舒卷。鶴露清寒自往還。何似綺園諸老者。採芝初不離南山。

茅岡初割一溪雲。玄契華陽舊隱文。謁簡自題香案吏。封章先報大茅君。種成和露桃千樹。借與摩霄鶴數羣。便是宸清真洞府。不煩夢想託紛紜。

崇仁監邑阿里仁甫茉莉花盆中折竹插之而生枝葉近年翰林學士薩公謙齋作御史時亦有此瑞朝之士大夫引寇萊公故事以爲徵名其堂曰瑞竹而咏歌之薩公仕東南歷郡守部使者至所

有仁政著清節美名者壽今爲中朝老臣瑞蓋不虛發也仁甫長邑三年清介明恕字于上下此竹之生父老庶士爭走山中相告因取而觀之略寫其狀賦詩以美之

華盆插竹忽生根。枝葉青青向曉暎。直節有生資地力。虛心無愧荷天恩。薩公堂上今重見。萊國祠前孰更論。但得清風千古在。常扶筇杖看淇園。

撫郡天寧明極覺。講主陪敬齋。監郡奉祠華蓋。特有高咏三讀敬。嘆僕偶共清游。輒復次韻。衰退不工聊資咲粲。

三峯宮殿接新橋。十月長齋陟翠巖。朝步仍垂蒼玉珮。登歌遠引紫瓊簫。千枝絳蠟連虹貫。五色香雲向日飄。賴有高人陪後乘。輕清詩句似參寥。

鄧公信吾契家賢。弟比奉憲臺書幣。存問衰朽于山中。其還也無以爲餞賦。此與之。

幙府秋高寄遠情。飛鴻肅肅度江城。深慚衰朽勞人問。豈有文章與世驚。疏傅多年餘賜盡。揚雄已老太玄成。憑君歸致殷勤謝。擊壤田間荷聖明。

故人將命清嚴地。越陌經阡枉見存。松菊荒蕪慚重客。裳衣顛倒出柴門。老忘舊事尋書卷。喜走鄰家覓酒尊。此邑故家無幾在。更崇令德及諸孫。

安成劉雲章漢章兄弟兩秀才來訪一長書一長詩皆有志文學賦此爲別

步屨東行好弟兄。束書銜袖見才英。只愁困學孤來問。豈有奇聞外素誠。知道言辟無詭妄。及人事業匪縱橫。名鄉自昔多君子。珍重歸來在矯輕。

壽陳溪山生日

西來驛客作南居。來往風流舊不疎。好句每容鄰曲寫。高情不解世間書。溫溫中夜還丹鼎。冉冉高仙畢

道車千歲相期真有約。九天風露壽尊餘。

秋日同朋游北塔山

縣西北塔極蕭疎。投老能來幾度餘。山木已隨樵斧盡。屋塵猶護醉翁書。遠懷天上多騎鶴。近愛槎頭可釣魚。九日懸厓多細菊。可能無意再巾車。縣道蕭條北客疎。西人居者亦無餘。春尋道士松花館。秋覓山人柿葉書。太史闕文誰借馬。相君退食尙烹魚。何因得似先天叟。洛下人家認駐車。歸田多病故人疎。好客相逢樂有餘。老去深盃那解飲。詩成大字尙能書。門生去上青驄馬。道士歸騎赤鯉魚。如此餘生多樂事。誰能七十始懸車。

送尼山廟學彭山長

尼山新作素王庭。春告成功用上丁。徂徠有松充采斲。靈光何殿效丹青。風霆形氣皆垂教。金石文章具刻銘。天子萬年綏福祿。曾孫奉若薦明馨。

游浴湖田舍

近郭林泉無可游。行尋田舍逐微流。春眠稍可遠鍾鼓。秋熟或能求豆區。萬里橋邊祠廟古。百花洲畔釣船幽。兒童不解憶鄉里。老夢時時還故州。

題范德機詩集後

抱膝長吟老范兄。寒岩古柏兩同清。東都高節鴻毛遠。南海真仙鶴骨成。遺藁飄零存梗概。孤兒瘦弱賴

高情若無塵外知心友，千古誰聞出世名。

溪山翁所居與小雅易君相近，翁與予賦詩易君之季子至善，輒隨錄之，遂成巨帙，賦此以答其美意云耳。

橫塘烟雨易東家，翠竹娟娟映白沙。綵筆徧題詩滿春，繡簾長對樹交花。往來二老隨天分，爛熳三春感物華。却問綺園商嶺外，曾無高咏到烟霞。

題徐孟俊屏山閣

題詩遠寄屏山閣，回首人間三十年。西嶠依然仙子館，東湖還載隱君船。同時翰墨嗟誰在，滿屋詩書嘆獨賢。欲買一舟江海去，遠看喬木翠參天。

送易用昭

詩成長是倩人書，最愛東家織翠裾。遠樹斷雲春雨外，華星明月晚涼初。滿牕柿葉題都徧，短帽梅花畫不如。莫向墨池成久別，鵝羣還欲謝崇虛。

和陳溪山雪中雪晴二首

柴門積雪未全開，千樹瓊林豈異哉。鉛鼎微溫過半夜，玉經細咏却千災。江南冰向川流合，天際春隨斗柄回。太華高人觀物表，詩成先寄鶴飛來。東風先散息寒威，病骨欣然解帶圍。日照瓦溝生淑氣，冰融硯沼漾晴暉。銀旛試載花枝弱，玉鱸新嘗菜本肥。尊酒欲爲君子壽，除公誰是兩忘機。

和陳溪山立春後三日卽事

夢朝金闕見明晨。混泱臆間積玉塵。三日新春一日雪。一分深雪一分春。柳條封盡榮如粟。梅萼飄殘實已仁。欲破鳳團銀盃凍。冬溫且酌井泉新。

寄陳奉常并序

昔聞朝廷寧廟升祔。奉常陳君新甫。以世胄之貴游。博治之高誼。特奉明詔。出使江海之上。采上金明材。擇良工絕藝。新作禮器樂器。求在郡國之書。與通樂律之士。以備一代之盛典焉。鴻儒碩彥。感嘆其委任之隆。非尋常效一職治一事之凡近而已。故賦相餞。奇辭瑰句。傳乎四方。何其盛哉。僕泊然老懷。未忘舊俗。亦成一章奉寄。

新廟工師謹駿奔。奉常承詔出修門。鑄金就徵揚州貢。觀樂應求季札論。功德頌成諧鳳鳥。文章篆定刻瑤琨。千年製作于今盛。擊壤猶慚荷宿恩。

集自郡城歸溪山翁寄詩并和申字韻垂教依韻再呈殊愧遲拙

暮春長日雨兼風。買得江船未及東。出郭故人邀杜老。輟耕田父訝龐公。謾從修禊忘溪曲。何用安車徧洛中。且起紫芝行復長。詠歸先與謝崆峒。待客花陰午過中。茶香榆火一時新。千竿嫩綠搖輕暑。數萼餘紅墜晚春。坐憶雲林行道迹。夢遊仙島意生身。連根分種如冰雪。來向清池對玉真。

謝陳溪山送蛾眉豆種

種豆南山憶故鄉。蛾眉分種喜封囊。底須飛鶴能嚙子。未許蹲鴟共淪湯。玉椀茶香分瑟瑟。瑛盤櫻顆間煌煌。燃箕煮釜催詩句。更約鄰翁共佛床。

己卯秋舟過清江憶范德機

歸來江上鬢如絲。所謂伊人獨繫思。千載清風東漢士。百年高興盛唐詩。離離宿草秋雲斷。采采黃花夕露滋。山水含暉無盡意。他生何處共襟期。玉堂風日擅揮毫。海上馳驅嘆二毛。太傅竟無宣室召。拾遺空署華州曹。孤兒衣食交遊古。百世文章慕石高。車過不留應腹痛。寒泉秋菊賦離騷。

宜春臺晚眺

長沙王子舊層臺。古佛神龍寶殿開。秋水繞渠三峽漲。春雲垂雨大瀉來。萬家香火網緼合。四面峯巒紫翠堆。最憶老藤陰覆地。空中幾見異僧迴。

廬陵歐陽德器游京以所藏先世誥勅見原功於玉堂賦此以送之

竟公族子不離鄉。封誥于今幾世藏。恩數重懷全盛日。標題猶是故時囊。遠從史館求同姓。未覺輜車滯一方。昭代治平多制作。討論應及漢文章。

送黃子昂

從師學道暫辭親。百里西來動十旬。夜讀松林堂下月。晝吟梅萼坐中春。每欣老筆蛟龍走。亦愛幽居鹿豕馴。春服蚤成還再到。永歌同向澗之濱。

書武進縣學記後

縣令之職。有社稷民人之寄。不敢以百里爲小也。有政焉。有教焉。不可以偏廢也。陳君子瑛治武進。修學校。馮彥思記之。可以知其所系之重矣。崇仁之士。觀乎其記。蓋亦有所感而不及爲者。豈非天乎。因邑士之意。賦詩以書其後云。

從容文學聖門優。惆悵吳人獨子游。百里絃歌誰濟濟。千年禮樂付悠悠。邑人此日傳新記。弟子遙知憶故侯。何事紫芝三秀地。空聞疎雨過新秋。

己卯臘八日雪爲魏伯亮賦

官橋柳外雪飛綿。客舍樽前急管絃。僧粥曉分驚臘日。獵圍晨出憶殘年。白頭長與青山對。華屋誰爲翠黛憐。唯有寒梅能老大。獨將清豔向江天。漫空飛絮散輕絲。所異寒威欲折絃。縣令溫存僵臥叟。詞人解頌太平年。剪雲爲葉煩相寄。種玉成田不受憐。丹鼎溫溫千歲熟。樂天事業在知天。

寄賀吳宗師七十壽旦

開府希年正樂康。聖恩錫宴在斯堂。歲周二十逢熙洽。年接期頤披寵光。劍珮總從仙苑集。簫韶還就洞庭張。簪花當日今誰是。試向雲籤閱舊章。舊德高年荷聖恩。慢亭如宴武陵君。松喬能壽多深隱。園綺來朝只暫聞。千歲天邊觀鶴髮。五雲日下護龍文。山中七日陽初動。遙禮三台過夜分。

和陳溪山元日後雪

瓊妃剪水散春天。坐下先迎華嶽仙。飛步摠鳴蒼玉佩。閑居能檢白雲篇。朝元閣近星辰北。獻壽盃深雨露前。白髮舊時香案吏。幾迴七日是千年。

撫郡玄都觀羽士黃一初自京師還得文宗師吳公所爲和詩三篇其一故翰林學士吳先生廿年前廬山中所賦其一則和天師所與詩其一則予在茅山羅山第一谷中送一初詩也臨行大宗師囑之云到臨川卽以示予也忽復一歲一初又將北游却賦此一百六十八字記一初謝大宗師古道高誼也

和吳先生韻

世外神丹起積痼。臆塵坐見月明過。侯生猶識遺經草。梁甫空成鼓缶歌。柱史通家今昔少。番君分杞子孫多。淒涼遠寄懷賢咏。譜入朱絃久未和。

和天師韻

白髮高居古道山。蓬萊雲氣隱垂環。尙方徧識前朝履。特進仍先法後班。桃李成蹊春日滿。風雲繞坐晝陰閑。梅仙舊隱玄都館。紫陌紅塵有客還。

自和韻

荒陂野色帶餘曛。隴上時逢植杖耘。靈囿鳳麟千載去。玉階鷄鷲此時分。誦詩自託浮丘伯。垂問長勤大隱君。爲報黃茅岡曲舍。蒼端盡日宿浮雲。

贈武夷道士羅鑑空兼憶范德機

學道應須伴武夷。青山綠水不勝思。九天清露三生夢。千古高情兩鬢絲。羽客鑑空猶有鑑。故人詩後更無詩。懸厓仙骨堅如玉。明月長歌覓紫芝。

寄題采石新造觀瀾亭

雪嶺春融萬里來。浮雲天際兩眉開。魚龍夜水星前起。風雨春潮足裏回。尊俎誰陪賢太守。文章莫媿惜英才。無邊李白登臨意。更覓遺碑步紫苔。

某與胡伯友書問疏闊稍久因楚石藏主待謁翹仰高誼賦寄此詩

喬木千章萬壑秋。使君清興在危樓。星沉夜水神魚化。霜落寒汀宿鴈留。紅袖烏絲酣楚客。畫屏銀燭看吳鉤。不知肯着枯藤杖。采采芙蓉涉遠洲。

贈楚石藏主謁饒心道六有先生

不識南塘第幾橋。翠樓華屋上岩堯。古文獨許揚雄識。幽興誰爲杜甫邀。伐木春聲生澗谷。涉江秋影蕩蘭苕。散花如雨攜雙履。解與高人話寂寥。

十月朔旦同監邑大用暨僚屬游北塔山

敗壁殘書五十年。重來山色尚依然。田疇稍稔農民喜。官府多閑令佐賢。黃菊不差蓬髮改。清尊一聽酒盃延。坐中有客天邊去。金榜春風待鴈傳。

九月與薛玄卿外史會于黃氏溪園陪坐溪山先生談玄觀古仙像

自昔簪纓盛邑東。新堂還見百年風。兩人白髮驚先老。一客玄裳喜暫同。食飲具陳先世業。耘鋤全效野人功。談玄不及紅塵事。盡日溪園樂意中。

會後將登華山按茆岡玄卿先往候予至

石斛金釵感素秋。洞懸鍾乳入山幽。扶衰不是人間藥。聞健聊爲物外遊。雲作衣裳塵不染。詩成珠玉世誰收。石人久立黃茅月。歲歲能來爲客留。

予與玄卿相遇山下別後和朱德嘉韻奉寄重廬廣和再用韻奉謝

茅岡七疊七香車。誰賦新宮蔡少霞。千歲留蹤丹井臼。諸天獻供菜羹瓜。石人雨立春衣濕。崖蜜蜂來晝樹譁。憑仗仙翁須一到。浮丘已遣鹿嚼花。

和朱德嘉登華蓋山有賦韻寄薛玄卿和詩未成登山已遇玄卿下山道中足成以寄

相期秋晚命柴車。同看華峯散綵霞。農父苦留稂似雪。山人先許棗如瓜。蛟翻巨石痕猶在。鶴立危峯語不譁。邂逅不留知有意。林臺菊有未開花。

縉山張君榮字仲華來丞撫之崇仁歷兩政六年心平氣順上下相安如一日雖有遠役重勞亦無闕事甚可稱也予之閒居相愛如故舊每懷扈從東道往來縉山道中見其風土之勝民俗之美未嘗不談道以爲樂於其受代調官京師因記之以詩而與之別明年進秩南來觀舊治父老兒童相迎於東門之外又當歌此以爲一咲之歡也

昔從時巡出縉山。翠畦綠樹畫圖間。驅車百折龍門險。載筆千峯虎帳閑。麥粉勸嘗銀縷熟。梁炊持獻玉

漿還道傍父老應常好。爲說鄉風一破顏。

馬公同涉龍門道。歎似山陰及武夷。儘有千崖如罨石。但無一棹弄清漪。知君久有鄉關夢。老我能無木石思。抱甕青梁供玉食。饋漿道在野人誰。

太平縣道喜年豐。每出城南訪野翁。粗有軒牕閒草木。謾留車馬翳蒿蓬。心寬易醉毋多酌。事簡無私亦屢空。好得公田多稼地。長年歌詠聖恩中。

集家世以文學爲業。亂離顛沛。憂患困苦。無敢失墜。然學未成而出。早涉筆爲文。應事而已。人或以爲能。自知其不足也。歸田以來。稍得安閑。而目疾相嬰。學不加進。於立德立言之事。無有乎爾也。是以所作事過。卽罷不復記錄。至元庚辰冬。臨川李伯宗黃仲律來訪山中。拾殘稿於敝篋。得粗可屬讀者二百餘篇。而錄之賦此以謝。

冰生鐵硯不堪磨。收錄殘編夜每過。老病自知才思少。應酬長愧語言多。天人理一非無學。內外篇分豈自訛。只恐玄經終寂寞。空煩彌月駐山阿。

答黃仲律學文之問

少學文章慮每周。鄉人未免是吾羞。讀書次第依先覺。下筆流行稍自由。血氣旣衰尤帖帖。神明自至但休休。聖賢端緒無岐徑。篤信躬行莫妄求。

重題環翠亭爲李浩卿作

亭深環翠燭光寒。曾與詩人語夜闌。秋色相高風肅肅。露華如洗月團團。莫疑窈窕圍歌舞。自愛空閒接

羽翰。我憶舊書陰德事。百年應長萬琅玕。詩人謂燮元傳觀志能也。

答馬竹所見示詩韻

黃茆分土勝封留。惟有松喬是匹儔。帶笠不愁山雨濕。倚筇嘗聽澗泉流。玉堂夜永空餘夢。瓦甕春生欲自浮。豈料朝雲停翠竹。能從幙府一來游。壯氣橫秋勢利輕。讀書讀律總留情。爭看撤幙清風起。歸拜懸車白髮榮。馬上詩成恰我老。尊前花發爲君清。鳳池緩步春還近。莫厭羹魚斫尾頰。

送吳文明

山雨臆寒詠楚辭。可人同有古人思。冰梅的的開生面。霜菊英英保令姿。詩似仙成隨世換。學如春到只心知。重來宜及東風早。華蓋茅岡長紫芝。

冬至後陳溪山賦以佳句謹用韻奉答

一陽初動反隆寒。久雨山居絕往還。彩筆曉題傳蜜意。綠樽春泛換衰顏。希夷睡足風雲外。安樂吟餘水竹閒。共看往來閒日月。紛紛塵事不相關。

雪夜有懷華蓋山王玉玄

三峯千仞玉穹廬。石骨金筋守靜孤。渺渺微陽丹建地。緜緜深息火生苻。瓊林撐拄虛明兔。銀海奔吞黑赤鳥。持酒相尋行迹斷。人間無鶴到蓬壺。

答盱江聶空山

老去文章不滿車。蕭條家學賴兒扶。從師授業渠能達。對客揮毫我病蘇。春雨解憐轅下憤。朝陽愛及屋頭烏。德星何日賢人聚。膝上瑤環看畫圖。

繞屋看山不命車。天寒翠袖自攜扶。梅花照眼春常健。竹葉怡顏氣倍蘇。復有新雛娛老鶴。莫將舊事憶童烏。畫堂圍煖歌春雪。蜀錦波瀾列海圖。

寄和吳閑閑大宗師

鈞天樂徹洞庭波。野迥誰爲擊壤歌。筆硯烟雲塵世隔。鶯花風雨客愁多。傳書稚子空遺簡。伐木樵夫久爛柯。舊識浮丘華蓋近。相思何處看雲過。

答吳宗師壽稀年詩韻

早接雲龍晚散萍。三年交信祝修齡。公從天上承恩宴。我向山中讀道經。老兔幸分千歲藥。高鴻還借九秋翎。蓬萊清淺人應識。拄杖過頭弁會星。老子長年藏室居。舊聞星象動江湖。向方別賜三公烏。維嶽恆馳六轡駒。龍馬河中先聖畫。麒麟閣上列仙圖。從游童冠俱頭白。幾度涼風咏舞雩。能歌能辨九爲章。無恨才情屬楚襄。巫峽草生春易晚。洛宮花發日何長。玄經寫就池皆墨。國語成來日少光。把筆題詩亦聊爾。坐中何用怪章郎。

送撫郡經歷海朝宗調官

館閣論思拜命新。風雲近接屬車塵。受釐宣室多清夜。奏賦甘泉是暮春。雨過落花行處少。日移高樹坐

來頻。知君此日行吟思。驄馬封章又避人。
論撰西清近九天。回頭二十五華年。送人趨召迎新雨。對客停思倚暮烟。染翰朝朝裁五色。吟詩往往過羣賢。故人若遇楊開府。莫說章郎鬢颯然。

寄趙知微廉使

曾賜玄州水玉丹。南征六月海生寒。宣威辨說誰爲陸。列守文章孰是韓。溟渤不驚天蕩蕩。烟塵如洗月團團。故家文獻應催召。拭目雲霄一羽翰。

題致爽樓

易君小雅雅士也。自其先長沙知錄公。老於是邑。子孫守儒業。至于耆耆。又以醫藥活人。鄉邦稱世有善人者也。小雅與余年相近。少相好也。元統癸酉。余自京師還。小雅觴余新樓之上。望眺平遠。山川。屋烟雲竹樹。歷歷在目。而易氏子孫。或仕或處。皆循循敏藝而敦本。小雅髮須郁然。顏貌充悅。諸子侍立。若弟兄之相次也。余深嘆善焉。小雅曰。樓未有名也。子爲我題之。余以爲米元章最號善標置。嘗自名其軒曰致爽。子之樓四面皆可觀。而西面獨遠。請用拄笏意。字之曰致爽。仍請賦之。

易公屋上有青山。故架層樓擁鬢鬢。客至每留風燕外。詩成多在雨簾間。南階竹似兒孫長。東老身同日月閑。若道神仙平地好。便從南郭覓柴關。

東坡墨竹

扁舟憶上浣花溪。風雨橫江萬竹低。石室歸來秋似水。峨眉相對醉如泥。春雷翻石蛟龍起。夕照穿林鳥

雀栖。二老何年重會面。爲揮濃墨寫淒迷。

白雲間上人度夏

白雲長傍大湖飛。忽向西江度釣磯。彭澤小龍邀共飯。潮陽遷客憶留衣。筍因春雨朝朝喫。橘待秋霜顆顆肥。我自本名無所住。經函松下共柴扉。

寄龍翔寺訴笑隱

贏得歸來休便休。鶯花何處更追遊。閒雲過雨依檐宿。好雨添泉繞舍流。世上文章將底用。夢中塵業又何憂。隨身宮殿香雲裏。還見千峯百海秋。

寄魯學士

往歲樓船過太湖。珠簾翠幙護圖書。泉南五馬傳燈後。天上羣龍進講餘。滿座賓朋尊有酒。盈疇秔稻食多魚。趣裝未覺曹參晚。應有賢人載後車。

答甘允從寄海東白紵

海國練衣雪色明。寄將千里見高情。著隨野鶴渾相稱。行近沙鷗亦不驚。江露滿船歌醉起。爐烟攜袖憶詩成。秋風遊子偏愁予。誰采芙蓉共晚晴。

次韻董子羽見寄

家徒壁立相如宅。森列雲山作畫屏。前日遠煩天子使。至今猶詫野夫亭。有來妙句題章草。政爾齋居讀道經。積雪滿亭誰見問。故人千里眼終青。

昔年供奉慚清切。簪筆春明近御屏。一日攜書歸菊徑。幾回對雪坐茅亭。女蘿薜荔如新葺。華蓋夫容歷舊經。最憶先生天上去。皇都應見草青青。

次韻答聶空山

惠我名香海上來。講帷還憶舊親陪。微風高閣紆天步。細雨深廉對露臺。滿袖當時攜馥郁。孤村此日爨蒿萊。高人雅意相期遠。未覺匆匆白髮催。

寄貞居張先生

司馬先生苦著書。久滄金液日清虛。星辰欲動含精劍。雲霧長隨畢道車。重憶仙翁千仞表。爲修真籙百篇餘。白頭供奉黃金盞。靈笈何因到隱居。

孫宰金碧山水

昔代香山避暑宮。中天積翠立夫容。雲生金水三春柳。露滴銀床五粒松。飛瀑橋長通窈窕。斷堤人倦立從容。舊時行處今堪盡。烟雨樓臺晚更濃。

甲戌四月十七日至臨川冲雲寺祝聖壽齋罷爲賦此詩

郭西寺門雙石頭。水檻相對林塘幽。白花過雨落松暝。黃鳥隔溪鳴麥秋。衰朽虛蒙宜室問。淹遲實愛小山留。爲貪佛日同僧話。滿袖天香念舊游。

蜀人留夢良效楊補之掀蓬圖

錦屏山下花如錦。却愛清江野水邊。放筆豈能無直幹。掀蓬方欲鬪清妍。最怜半面欵歌扇。更笑輕身障

舞筵君看上林千樹雪。繁枝何處獨娟娟。

寄吳思可廉使

歲月將題傑閣成。寄來三筆荷高情。知公比任中丞重。念我文慚吏部名。王勃當年神所助。江淹老去夢還驚。尙懷曝日茅檐下。解寫農謠詠治平。

寄南安燕信臣總管

昔同禁苑又經筵。一別于今四五年。太守政成梅嶺北。老夫吟徹野雲邊。愁來每看新題字。夢裏猶懷舊奏篇。頗欲仙茅扶病骨。想能亟致到臨川。

遊仙遊山賦詩

仙遊亭子北門東。雲樹烟霞野逕通。秋淨華峯千仞表。春濃仙縣百花中。昔人黃鶴何年去。九日清尊此意同。醉插菊花歸路晚。莫令狂客惱衰翁。

方壺作仙遊山圖

身在山中底用圖。偶然點染出方壺。數株古樹雲連屋。一箇橫橋水滿湖。門外從教車馬過。鑑中不計稻梁儲。等閑真遇尋師者。指與雲間一翠渠。

會錢翼之

吳郡名書盛有唐。流傳風致到錢郎。閑門三月梨花雨。徧寫千林柿葉霜。客看舊題驚歲月。僧將新句度江鄉。莫愁茅舍淹留久。秋菊春蘭各自芳。

次韻聶空山送杏

看偏生紅雨滿林。筠籠遠致百丸金。遙知過熟心先喜。猶恐微酸齒不禁。洗琰便應催泛蟻。封囊何必共來禽。唯當種核成嘉樹。花遶春壇坐鼓琴。

和陳溪山春雪見貽

彌天春雪積塵空。花信今爲第幾風。一色瓊林無別間。九年金粟有餘豐。愁吟野徑雲俱黑。睡起東牕日已紅。幸自與公同此樂。莫辭微醉注黃中。

予少年過薊門酒樓賦此題曰連十八書郡人疑其爲呂洞賓詩此謾記于此

耳目聰明一丈夫。飛行八極隘寰區。劍吹白雪妖邪滅。袖拂春風稿朽蘇。氣似酒酣雙國士。情如花擁萬天姝。如今一去無消息。只有中天月影孤。

卽事四月十六日

臥病丘園忽五年。千官此日正朝天。縣公稱壽邀相共。野老扶藜拜不前。帶拭文犀看舊賜。髮垂明鶴愧初筵。莫言小邑天光遠。朝蓋靈芝五色鮮。

目疾偶成二首

一任榴花五月開。看如烟霧亦悠哉。靜聽靈響空中發。坐受天香世外來。樂府好邀張籍賦。策書宜共左丘裁。太清絕點誰能畫。一瞬青蓮月滿臺。

木綿鶴袖小烏巾。百事無聞自在身。舊是玉皇香案吏。今爲華蓋洞天賓。看花謾笑如烟霧。落筆那能泣

鬼神聞有紫芝新可食。園公有約願爲隣。

柯敬仲畫古木踈篁

不見丹丘四五年。幽篁古木更蒼然。兼葭霜露風連海。翡翠蘭苕月在川。憶昔畫圖天上作。每題詩句世間傳。前村深雪誰高臥。亦有晴虹貫夜船。

富盱江石門江秀才

石門山在盱江上。閒似金山及落星。浮石不隨春漲沒。道林常見晚雲停。鳥飛空界誰能賦。龍負經函我所銘。此地卜隣多逸興。重來爲寫向幽亭。

夢吳成季真人見訪夢中作

竹外旌旗駐馬鞍。兒童驚喜識衣冠。青山春日何須買。高閣浮雲只共看。野蕝不堪供七筍。新詩聊可助盤桓。當年赤壁扁舟夢。幾度人間玉宇寒。

嘉平歲望陳谿山自山齋還邑月下獨步有賦

野迥霜明月轉高。寒花疎影立亭臯。池冰下見蒼鱗鬣。雲海東迴雪羽毛。客去夜深猶倚杖。詩成春近更揮毫。茅簷數尺當晴昊。無限清歡一縵袍。莫愁寒日經簷短。甕牖西南煖有餘。頗有襟期俱老大。略無塵滓涉清虛。飢來進火烹仙朮。定起和丹較道書。憑仗白雲封谷口。免教人跡近幽居。

題馬竹所照磨捕魚圖

霜寒水淨已無魚。漁者縱橫網不疎。羹食盡供晨市遠。炊烟猶待晚歸餘。已知漠漠濠梁異。豈盡洋洋鄭沼如。萬里江湖春雨闊。海鷗不去小舟虛。

李伯宗錄詩

老去逢春祇謾吟。敢煩綵筆爲追尋。玉堂天上成塵夢。茅舍山中稱野心。萬里雲霄歸鳥盡。孤村風雨落花深。文章傳世知何用。空使高情慨古今。

壽陳溪山生日

風動蕭蕭白髮疎。高齋長日共清虛。輕雷過雨神功外。瑞露垂雲壽瀝餘。藜杖每期天外友。松肪更試枕中書。九秋華蓋通天極。千載相隨兩鹿車。

鶴

予家有薛少保鶴一軸。先尙書自蜀攜至此。以爲珍玩。先參政晚歲失之。不知何在。當時極惋嘆。今二十餘年。集妻姪浚儀趙德莊。從好事者重購得之。欲集識其故而藏諸篋笥。爲賦此。

吾家舊物薛公鶴。老氣崢嶸壓九臯。鐵石開身修足脛。雪霜依骨淺翎毛。通泉久失千年壁。杜甫空吟一世毫。老去思鄉歸未得。時時借看倚秋高。

二月雪與陳齊賢

江南二月長聽雨。誰見翩翩雪滿舟。病眼直驚翻玉樹。吟身渾欲覓貂裘。衝寒載酒怜佳客。把筆題詩想舊遊。得意長安各騎馬。山堂還憶醉翁不。

閩憲克莊以故舊託文公五世孫明仲遠徵鄙文老退遺棄散逸荷伯宗用昭止善浩淵子勛至善及余表姪孫陳誼予兄子豐仲弟之壻賈熙用昭之從子大年等十餘人寒冬連旬日夜錄之得五十卷亦已勞矣賦此爲謝

老去斯文付寂寥。寒枝枯甲一遺凋。虛言有歎真何補。好友相求不憚遙。敗篋塵埃煩數子。破窗燈火每連宵。書成明日尋梅去。共看春風轉斗杓。

送朱明仲歸建安并簡貳憲幹克莊

道南遺緒實天存。徑寸神膠萬里渾。路遠祇憑霜履穩。歲寒更覺緇袍溫。山川文物今誰在。師友淵源尙可論。弱翰不堪酬使者。遠來深愧考亭孫。

送王公輔遠遊

君子之所居。雖歲月易遠。而餘風流韻。不自知其及人之不窮也。空山雷先生。隱于種湖之上。豪傑名勝多從之游。其光顯盛大者。固已著見于代。其高尚深遜者。則有不可得而知者矣。然種湖猶有先生遺書數百卷。與平生著述。皆無恙也。湖觀之師弟子。相傳而守之。其寥廓之趣。粵古之思。必有彷彿其精微者乎。至元二年。丙子正月六日。大雪。道無行人。有羽士王公輔。自種湖來。袖詩一篇。爲贊觀此風致。諒非俗塵所能。固有得於君子者乎。問其年。纔三十。喜其盛年好讀書。苦吟。聞其將從吳越淮泗。而遂至乎京師也。故作詩以送之。

春雪門前二尺深。子喬雙鳥度幽岑。欲吹藜杖同清夜。靜看梅花對苦吟。江國鷺花時冉冉。京城烟雨晚

駸駸。老來每憶登臨處。仗子芳年一一尋。

題趙師舜謝安遊東山圖

太傅東山杖屨行。總將憂患托高情。獨尋窈窕開瑤席。雙引娉婷韻玉笙。春雨松間殘奕冷。秋風江上莫塵生。三分籌策頻煩甚。惆悵雲霄一羽輕。

活水源爲王欽道賦

川上嘗聞感聖衷。尋源曾見出泉蒙。風霆流動千門闢。山澤高深一氣通。潤物已隨時雨化。濟川猶歎昔人功。野塘舊隱誰能住。一勺清泠謝太空。

夜宿周氏簡饒復心李伯宗

復心與伯宗。留宿周氏東齋。談易論語集註。至於達旦。某以微疾。不得奉陪。然心甚喜。鷄鳴賦此章。呈二君子。

霜月高齋宿兩賢。夜深清話極幽玄。退藏莫測神明化。通變猶聞典禮傳。五十華年思絕學。二三良友信遺編。選鋒若欲驅殘臘。晴昊梅英孰與先。

贈朱萬初之官建寧并序

仲春之望。建寧幕長朱君萬初之官。迂道百里。惠訪山中。存撫老病。深感古誼。得見禁林貴臣名公書報。萬初延閣機暇。得進所製新墨。甚稱旨意。中書傳問所居官。將有朝擢之喜。良爲助慶。因賦此爲別云。

墨卿玄璧進明光。玉硯雲興御榻香。內相貽書傳異賞。中朝垂問仕何方。宗家應訪金絲舊。古道相求草木荒。把筆欲題新感遇。牛衣春夢鬢蒼浪。

五言絕句

題汪華玉子昂蘭石四首

海內出珊瑚。枝撐碧月孤。鮫人拾翠羽。泣露得明珠。
參差不可吹。級佩寄遠道。遂令如石心。歲晚永相好。
抱玉下天河。繞叢秋露多。天寒翠袖薄。日莫欲如何。
翠袂倚岩巖。來尋碧玉簫。拂衣成歷劫。遺迹映寒潮。

題黃與可所藏錢舜舉瓜圖

秋蔓有遺實。不食庸何傷。東陵爲圃地。何曾憂雪霜。

題趙師舜光風轉蕙汎崇蘭圖以下重增

衆芳非不多。金石好兄弟。雜佩以間之。春風接襟袂。

春妍帶雪圖

玉茗深宮裏。春妍帶雪殘。可憐五色羽。相並不知寒。

江村秋晚圖

依約米家船。疎林泊暮烟。新詩吟未了。槎上釣江鱸。

題饒世英所藏錢舜舉四季花木

海棠

睡起多情思。依稀見太真。一枝紅淚濕。似憶故宮春。

黃蜀葵

花萼立清晨。鵝黃向日新。金杯承玉露。偏醉蜀鄉人。

芙蓉

丹霞覆苑洲。公子夜來遊。終宴風露冷。折花登彩舟。

家茶

萬木老空山。花開綠萼間。素粧風雪裏。不作少年顏。

題趙師舜所藏雪竹圖

鳳皇臺畔竹。猗猗別出參差玉。一枝閱盡雪霜心。似鐵高風惟許歲寒知。

題饒世英所藏孤鶴圖

海風吹月憶危巢。清夜梳翎雪墮坳。仙客不知猶是畫。每聽長唳向松梢。

贈朱萬初四首

霜雪摧殘澗壑非。深根千歲斧斤違。寸心不逐飛烟化。還作玄雲繞紫微。

近世墨以油烟易松滋媚而不深重。萬初既以墨顯，得真定劉法石刻墨法，以爲劉之精藝深心。盡在於此，必無誤後世。因覃思而得之，蓋取千百年摧朽之餘，精英之不可泯者，乃用之，非常松也。烏乎！孰肯舍易而求難，必求古人之成法，而後盡其心者乎？

珥貂鳴珮入明光，新墨初成進御床。草野小臣春夢短，猶懷染翰侍君王。

天曆己巳，天下大定，中外乂安。天子始作奎章之閣于宮廷之西，日親御翰墨。時榮公存初，康里公子山，皆近侍閣下，以朱萬初所製墨進，大稱旨，得祿食藝文之館，其名藉甚。邈在草野，豈勝千古之思乎？

延閣晨趨接佩聲，又紆朱紱向江城。丹心要似東陽水，釀作官壺徹底清。

朱萬初以藝文直長，以年勞恩賞，出佐帥幕南海，轉承東陽。東陽文物之邑，俗第以名酒歸之，豈其山川之望哉？韓文公譏丞不負余，余負丞。今丞凡邑之風俗教命刑獄科賦，無不得言，言之當無不可行，存乎其人而已。萬初勉之。

頗愛燒香是鼻塵，不應緣蹶又勞人。方牀石鼎過清晝，一縷山雲伴老身。

深山高居，爐香不可闕，退休之久，佳品乏絕。野人爲取老松柏之根枝，葉實擣治，斫楓肪和之，每焚一丸，亦足以稍助清苦。久亦不復爲。今年大雨時行，土潤溽暑特甚，萬初袖致土速數片，空齋蕭寒，遂得爲一日之供，亦可喜也。

道園學古錄卷之三十

歸田叢四

芝亭永言

七言絕句

雪後偶成

千山積雪日華明。甕牖前頭畫不成。未有樓臺供遠眺。負暄過午聽簷聲。曉來殘雪在陂陁。遠似羊羣或似鵝。憶踏春泥看柳色。駝裘貂帽度冰河。

自贊題白雲求陳可復所寫像

歸來江上一身輕。野服初成拄杖行。祇好白雲相伴住。天台廬阜聽松聲。

築室

溪頭築室苦不多。無奈今年春雨何。水暖白鷗渾不去。泥深田父少相過。

客有好仙者持唐人小遊仙詩求予書之惡其淫鄙別爲賦五首

東海轉上白玉盤。滿天風露桂花寒。方平欲來共今夕。微聞洞簫過石壇。偶過松間看奕棋。松枯鶴老忘歸時。山前酒熟不中喫。自有金盤行五芝。關關雖鳩在河洲。錦幄春溫吁可愁。六合清凝海天碧。木公金母坐優游。

衣垂烟霧冠晨暉。雪色鬢毛風外稀。何事酒壚眠不去。塵中醉裏或忘機。
老婦扶兒休笑僂。不肯學仙蚤已翁。東家木公合辟谷。但汝護田祈歲豐。

子昂竹

憶昔吳興寫竹枝。滿堂賓客動秋思。諸公老去風流盡。相對茶烟颯鬢絲。

子昂蘭石

汀草離離石老蒼。行吟何處樂清狂。江中遺佩相思久。莫待明年春蕨長。

夢蟾圖

炯炯孤蟾兩目寒。莎羅臺上濯神舟。冰容映日初無質。故許空岩夢覺看。

唐五王出遊圖

華萼樓前御柳長。春風馳道曉塵香。龍姿鳳質多相似。黃髮爲期樂未央。

八駿圖

瑤池積雪與天平。西極空聞八駿名。玉殿重來人世換。蕭蕭苜蓿漢宮城。

射獵圖

羽獵長年從翠華。合圍八月度龍沙。蕭蕭徒御圖中見。猶想君庖賜滿車。
日莫推車力已疲。道逢猛虎快饑飢。負嵎何待要馮婦。弱婦嬰兒未可欺。

題白玉蟾像

日出搏乘積雪。高海空天淨絕。纖毫每看劍氣。衝銀漢。知是吹笙詠碧桃。
題大別山柏圖

憑陵霜雪鼓風雷。此樹相傳手所栽。想見樓頭黃鶴客。千年一度此山來。
禽趙秉彝送地黃膏

身如老馬視茫茫。多謝銀罌致地黃。昨日飲餘肌骨煖。解持書卷近晨光。
酌張用鼎

老馬尙書賓客盛。淮南淮北誦君詩。玉堂自是歸來晚。不及觀君落筆時。
題關尹問道圖

身隱何爲更註書。區區關尹強留車。周公制作成殘缺。嘆息何人問緒餘。
中秋前偶賦

一室蕭然絕蔽虧。桂香初發自先知。已無熱惱仍無夢。坐到空林月落時。
空林月落大如盤。雞犬無聲曉氣寒。童子擬謀朝一食。玉盃盛得露漙漙。
一杯濃露滑如飴。灌溉清涼可療飢。畢力石田嗟已晚。空山何處采靈芝。
采芝不覺過前山。偶答樵歌莫却還。人影自行殘照外。雨雲先入翠微間。

次韻答魯子暈參政四首

山水娛人若妙顏。幾年搖落鏡中鬢。高情誰與爲膏沐。舒卷春雲指掌間。

海風吹雨散晨曦。紈扇高堂兩鬢絲。想是東南賓客盛。臨江釀酒看潮時。
病鶴前年下玉京。空巢聊寄一毛輕。白雲千載悠悠外。自照寒溪野水清。
方嶽羅賢祝罔開。選掄更欲籍非才。故人情厚慚衰朽。千里空煩重使來。

題赤城站壁

莫怪扁舟不早歸。斜風細雨濕蓑衣。天心月滿江心定。贏得閒身坐釣磯。

又和赤城壁韻

飛鴻力盡始能歸。敢向漁樵詫芟衣。多謝相如遠相問。華星明月照寒磯。

秋夜有作

月明清露浸山河。八極無塵水絕波。形質不應猶有礙。鼻端惟恨桂香多。

玉龍圖

貝闕澄澄海月生。水晶簾影接空明。蛟綃剪得霓裳就。却擁冰髯上太清。

郭熙畫木

江南喬木已無多。誰畫參天鐵石柯。記得玉堂春晝永。寒林坐對老東坡。

浙西提舉陳衆仲以其省之命請考秋試其還也賦此贈之

道誼交情志竟完。千山觸熱訪衰殘。唯慙薄德成虛辱。故詠高風小子看。
百病消沉老病身。石田茅屋度餘春。故人遠訪閒相對。共看流泉日日新。

合禮文章體道心。事天成物致精深。老來更覺交游少。珍重高賢副所欽。
游楊羅李生閩土。千古斯文一綫微。最憶相逢共細繹。開牕東海眇烟霏。
子去聲光日已高。荒村那復重相遭。盡屏甕牖閒欹枕。春雨秋雲見羽毛。

贈閒白雲

白雲東去入經春。每想飛鴻到水濱。幾箇遮山松樹子。憑君洒雨洗埃塵。

無題

貝闕珠宮夜不眠。露華浩浩月娟娟。不應又作人間夢。窈窕吹簫度碧烟。

題亡弟嘉魚大夫與眉山奴詩

瞻望眉山草木春。西還無計每傷神。數家共客巴陵下。只託詩書論古親。
吾弟文章絕幻麗。只餘詩句似西江。十年夢斷遺書在。風雨梧桐自一窗。

書蘭亭後

墨池春雨水泠泠。消得鵝羣舞雪翎。千載臨文嗟悼盡。摩挲病目看蘭亭。

題黃敬申虎圖

當時玉帳蜀雲西。坐嘯風生草木低。傳寫餘威千載外。空山藜藿尙萋萋。

聞機杼

啞啞機杼隔林幽。夢覺江湖憶舊遊。滿地月明涼似水。數聲柔櫓過揚州。

賦玉簪花

玉簪花發憶京城。偏閱詩篇未識名。解道折花猶帶露。却愁香色起凡情。
面植芝蘭背植蕙。高花冠玉擅中園。小冠不厭雙蓬鬢。賴有朋簪玉露繁。
翠葉長筵出露叢。素華高潔倚微風。方田種得新秋玉。萬斛濃香屬老翁。
天宮會卉若星流。簪筆同朝八月秋。一色尙方新切玉。舍香無語度中洲。

溪橋踏雪

萬竹孤亭積雪明。衝寒先到寄高情。過橋不是尋常客。共聽空山裂帛聲。
奉答吳仲谷見寄兼簡許愿夫

城南謾作草堂新。過客全稀既有塵。城闕鶯花二三月。無因藜杖伴詩人。
華蓋山前已結菴。荒陂獨往策羸驂。何如城北蕭閒叟。吟詠高齋從適參。
翠竹如雲百尺樓。川原錦繡出城頭。遙知吟詠羣賢老。清酒千壺薦膳羞。

賦范德機詩後

玉堂妙筆交游盡。投老江南隔死生。最憶崖州相憶處。華星孤月海波清。
題文丞相詩後

大廈明非一木支。區區未忍聽傾危。故人邂逅聊相問。矢死終天更不疑。

次韻陳溪山春日卽事

日出蒼龍霧露零。郊原花柳總蘇醒。七言內外黃庭景。歷歷東風舊所經。
河漢光微海出暎。蓬萊宮闕啓千門。晴虛無外來相覓。塵影俱消湛若存。
蕉竹窗中舊席虛。白雲不住意何如。欲占正叔來消息。正值包羲未畫初。

題呂洞賓見滕子京像

一杯湖水碧於天。飛劍來時月正圓。天下儘多憂樂事。翛然來往又千年。

題魏受禪碑

華歆勸進鍾繇筆。妙畫千年不可磨。舊有始皇金石刻。李斯文字更嵯峨。

崇仁邑士吳景永。客授齊安寓定惠院書來報寺之。海棠東坡所爲賦詩者。今二百五十餘年。枝萼

復盛住山明月溪。增葺坡翁舊寓并錄所賦爲寄。偶成三章答之。并呈幹公克莊部使者云。

滿山桃李擅春風。籠俗何妨總化工。賴得土人渾不愛。故容山寺對衰翁。
江城紅萼是鄉人。人去花飛海復塵。二百餘年還一見。雨中月下爲誰春。
昔登棧閣俯春濤。紅萼青松翠壁高。應有故人知我在。鷓鴣春雨老江臯。

次韻東山鳳栖別墅四時詞

湖邊綠樹多年柳。島上紅雲二月花。惟有舊時雙燕子。經春仍在故人家。
雨餘飛蝶傷秋潤。江外蹲鷗喜早涼。高屐圍碁歸別墅。東山莫是謝家莊。
秋聲柿葉書連屋。日暮黃花醉短籬。每歎觀文修舊史。不違初志見新詩。

寒陰潔白分嘉玉。園果青黃貢上金。受命素心如鐵石。不知冰雪歲年深。

臨川艾蜚英茂才求書北游京師荒山久病筆墨盡廢偶有近詩二首寫寄國史侍講祭酒先生數
千里外一笑契舊有同在者共一看之亦知衰朽托庇無恙也

鳥鳴不鳴山更幽。少學多聞今始休。常年空喫人間飯。聊爲田家事牧牛。
牛角掛書田裏歸。昔人行處不相違。白蘋如雪鷺飛起。耿耿銀河星宿稀。

和陳溪山韻

林園寥廓靜籬攏。來往風雲盡日中。萬卷相娛嗟歲晚。一簞猶恐負時豐。
幽幽直入南山路。行到水窮猶有雲。回首獨歸無一事。道傍還見丈人耘。

題樓攻媿織圖

我國家既定中原。以民久失業。置十道勸農使。總於大司農。慎擇老成厚重之君子而命之。皆親歷原
野。安輯而教訓之。今桑麻之效徧天下。齊魯尤盛。其後功成。省專使之任。以歸憲司。憲司置四僉事。其
二則勸農之所分也。至今耕桑之事。憲猶上之大農。天下守令皆以農事繫銜矣。前代郡縣所治大門。
東西壁皆畫耕織圖。使民得而觀之。而今罕爲之者。撫圖頌詩爲賦三章。章四句。

鄉里蠶桑勿失時。畫圖勸相又題詩。當時補袞應無缺。金玉餘音到蠶絲。

吳越蠶桑用日多。始終吟咏極婆娑。工成繭館間琴瑟。宜薦房中備樂歌。
昔者東南杼袖空。詠歌蠶織到圖窮。勸農十道先齊魯。百世興王衣被功。

送程以文兼柬揭曼碩

樸學清忠荷主知。每驚異論苦相危。只緣自信非鄉愿。俟命從容絕妄思。
玉堂北局是秋官。健筆相遭日晝寒。莫怪討論成諍論。御床夜索草篇看。
故人不肯宿山家。半夜驅車踏月華。寄語傍人休大笑。詩成端的向誰誇。

西郊草堂圖爲從子豈作

故家東郭百花洲。梅柳西郊總舊游。賢子獨知懷土念。結廬爲擬草堂幽。
早晚東吳買客船。直歸萬里畫橋邊。寄貲儘有詩人在。忍向園中看數椽。
草堂在處卽西郊。巴嶺還如雪嶺高。但有好孫能力學。不愁老杜不春遨。
野梅宮柳頗依依。酒債尋常七十稀。莫遣錦溪賢姪覺。恐愁安樂不思歸。
至正改元辛巳寒食日示弟及諸子姪

疾風吹雨作春深。抱膝西牕獨自吟。百世詩書千古事。只憑孫子不虛心。
江山信美非吾土。飄泊棲遲近百年。山舍墓田同水曲。不堪夢覺聽啼鶯。
寄成都孝成姪

寒食風花高下飛。錦官城外是耶非。百年墳墓惟孤姪。因酌寒泉薦蕨薇。
寄吳門弟姪

尙書大墳在吳門。老病西江更斷魂。春雨滿山湖海去。扁舟強飲引諸孫。

寄子安民從子宣

兩兒逐祿廣東西。解憶荒村叫竹雞。北返衣冠先志在。扁舟有日發端溪。

癸酉歲晚留上方觀

投老歸來山縣小。無端人事尙關情。雲房借宿最岑寂。亦有鄰春月下聲。
燈前自了讀殘經。風入疎簾月入櫺。坐到夜深誰是伴。數枝梅萼一銅瓶。
偶行幽徑豈尋春。忽見叢蘭紫萼新。幸自林深可終日。莫將香引路行人。
山中積雪到簷端。獨對篝燈坐夜闌。不是梅花心似鐵。如何禁得許多寒。

葵榴雙冕

江南春事已蕭條。只有葵榴絢日嬌。水國不知炎暑近。雙將文羽戲清潮。

題明皇按舞圖

寢安食飽對青雲。按舞調笙不厭頻。西內歸來還獨看。梨園弟子白頭新。

題昭君出塞圖

天下爲家百不憂。玉顏錦帳度春秋。如何一段琵琶月。青草離離詠未休。

題陳氏遠塵樓

春風滿縣花開日。夜月千山雪積時。定有扁舟來好客。倚闌溪水度雲遲。

偶成

野田閑水浸秋天。隨意行吟到水邊。樵牧各歸魚鳥散。微風吹面鬢蕭然。
半畝秋陰近石床。倚床自炷水沉香。新涼透骨清如水。幾箇簷簷共夜長。
鶴骨新來怯曉寒。東牕睡覺日三竿。蒲團深坐香如縷。塵凡殘經亦倦看。

桂亭

夜色澄澄海氣深。水光蕩漾入簾旌。冰肌玉骨便清夢。不爲吹簫送月明。
璧月珠星繞四周。團團翠樹屋東頭。黃金布地香爲國。此是山中富貴秋。

田舍

晨昏車馬亂雲烟。花下追遊亦偶然。百舌無聲春亦去。蕭蕭田舍日高眠。

題漢孝宣受貢圖

悠悠旌旆馬蕭蕭。萬里歸來氣不驕。黃屋東邊渭水上。從官誰是霍嫖姚。

富饒心道四首

碧玉淒涼思入雲。數峯江上見湘君。夜深霜冷絃中折。儘有遺音世未聞。
日下紫微還獨歸。陰陰夏木掩柴扉。空傳秀句寰區滿。世外高情更絕稀。
巴水東流日夜深。先生茅屋背城陰。東風盡日吹香草。金石臺荒想獨尋。
塞坐詩書日昃歌。陶公於此每婆娑。匡廬雨過青如舊。只爲長松不易柯。

題約牖爲譚無咎賦

約牖前頭一沼開。天光倒影入蒼苔。臨泉洗墨春雲濕。恐有神魚起蟄雷。
檢束精神不外馳。天光融徹入初曦。飛塵不礙晴虛景。意識空從一管窺。
意識休將一管窺。歛箴深密靜無私。始終慎獨成天德。深信開天自必義。
酬酢紛拏窘室廬。老來漸覺就明虛。羨君盛歲先知約。絕利尋源事廣居。

別燮玄圃後重寄

郭西山路有寒梅。想見臨行首重回。夜聽雨聲知水長。滿船明月幾時開。

聞燮玄圃除御史

好風天上送春來。紫陌紅塵萬里開。春雨春波舟一葉。題詩先到鳳皇臺。

燮玄圃除御史後寄蕭性淵巡檢

望仙亭長最清閒。日日吟詩竹樹間。長官新豸豸冠去。誰與空山相往還。

題趙子固梅

楚王宮室賦離騷。不及梅花不解嘲。留與周南舊公子。歲寒聊寫兩三梢。

古檜

根到深泉石作身。疎疎香葉不知春。海波不動天風遠。千歲寒蛟作老人。

題夢良梅

詩翁白髮對青春。看遍江邊玉雪新。我是錦城城裏客。開圖更憶錦屏人。

留易小雅樓促陳溪山同飲

花滿橫樓酒滿盃。晴光偏送好春回。東家縱有溪山興。聽得歌聲也合來。

和陳溪山櫻桃

紫玉盤中絳雪繁。相知多渴喜清寒。明光分賜難重得。却作金丹火齊看。

留題龍門寺

自入重山知者稀。默然終日坐垂衣。山猿還笑癡頑甚。無見無聞忘却歸。
一榻東軒絕百非。浴波紅日上當扉。輕雷谷口作飛雨。知是老龍回翠微。
舊得鸚鵡短羽毛。筠籠三月未能高。攜來聽法生公石。風竹雲松任所遊。
投閑雖久尙勞生。數日山居實稱情。香象渡河姑且置。端然聽得落花聲。

樂府

滿庭芳

微雨經霄。暖烟籠畫。相尋閑步堤沙。露桃風絮。香影傍烏紗。徒倚江樓最久。綺牕迴。翠擁雙丫。輕鷗外。水村山郭。帆過泊誰家。東華塵土夢。漢宮傳蠟。隋樹啼鴉。記當時攜手。何處天涯。日暮清吟未足。聽街鼓。催發香車。山翁醉。驚雷散雹。深夜未停撾。

寄阿里仁甫

維舟南浦。臨流不渡。踏破城南蔬圃。故人直是不相忘。把酒看沙頭鷗鷺。青雲得路。蘭臺烏府。早晚新承恩露。輕車切莫使乘風。先報與山翁知取。

法曲獻仙音三疊爲陳溪山壽

秋氣至。壽學注天香。燕坐喜看扶兩几。擊鮮何必溷諸郎。長歲接賓行。盤石上新畫。太丘翁。扶老一枝風滿袖。凌霄千歲露垂松。不與世間同。千歲事。何許覓松喬。急雨輕雷開道路。星河北斗轉。岵堯相對話漁樵。

浣溪沙

江上秋風日夜生。蕭蕭兩鬢葛衣輕。芭蕉蘂竹共幽情。病骨不禁湘簟冷。夢魂猶似玉堂清。畫簷疎雨過三更。

銘

虛白齋銘爲陳玉林作

於穆聖皇。有嘉玉林。曰若積雪。日華照臨。六合無外。旣清旣廓。氣容明新。庶物咸作。羽衣有儀。燕見穆清。迺取虛白。肇錫之名。汎景太虛。接軌貞白。先生之稱。世豈多得。天垂休光。賁于丘園。寶我谷神。守我幽玄。冥升在上。日月于邁。顧懷下土。福祿攸介。我瞻草木。我行戶庭。風雲徘徊。雨露載零。齋居孔明。夙夜敬止。以祈繁釐。以報天子。冲而不盈。涅而不淄。上帝臨女。永勛遐思。

方床銘

後至元庚辰九月二日。芝亭老人作方床于居室。銘其背曰。

晝安以恭。夕歛以息。儼然若思。順應無迹。崆峒有人。善脩其身。千二百歲。不衰而神。

几銘

方床前几。因式致敬。俯毋傲視。仰毋傾聽。必精必明。必安必定。敢曰。毫至弗鎮。中正。

先君硯銘

硯。先君所常用之。先君去世十有九年。硯亡而復得之。銘其陰以示子孫。端而溫。謙彌尊。思德容如生存。

贊

子昂畫陶淵明像贊

田園歸來。涼風吹衣。窈窕崎嶇。遐蹤遠微。帝鄉莫期。乘化以歸。哲人之思。千載不違。

劉原父遺像贊

博學洽聞。椎言通史。經殘禮軼。折衷補擬。百煉懸鑒。照物不遺。末世寡陋。肅瞻遐思。

劉貢父遺像贊

兄弟並興。博雅冠代。著書滿家。精覈之最。守道自如。不局曲迂。精神所存。天祿石渠。

先公遺像贊

至正辛巳九月九日集理故書得先君郡公遺像於是棄諸孤廿有三年矣逮事者咸曰甚似再拜瞻對繼以泣血敢述前德以示子孫其辭曰

孝弟之誠仁義之學傳宗世家踐跡先覺歷患難而心常定處貧約而氣愈充不與物忤而人自化不與時競而道彌崇遺我子孫者實行之積沒世不忘者盛德之容恂恂與與知者實稀常與人俱孰同其歸

邵菴老人畫像自贊

世家岷峨之山生身衡嶽之舍詠聖神之遺言攀仙真之軼駕白雪晴空春風秀野雨雲露雷不可繪畫聊采靈芝以遺遠者

孝女贊有序

金谿縣因金谿場之名也唐時有銀鑛發其地作場以治之曰金谿場寶曆乙巳銀絕而冶廢宋開寶初始置縣云冶廢時土不產銀久矣有司不敢失其貢迫諸民而取之有葛祐者官強之蒞治事銀既無所從出傾其家不足充數吏驅祐家取土石雜烹之卒無所得縛祐榜掠不勝其苦祐無子獨有二女且長不忍見其父皆自投冶中焚死監吏黃慄上其事撫州刺史奏除之里人哀二女又感其去患害也神而祠之皇元至元中郡守張國紀用獻利者言起金銀冶屬縣至今民病之獨金谿以二女事聞得不作大德庚子縣丞吳瑾作新祠于沙阜之地延祐戊午縣尹李有又新作之民間歲時祠之有詔祠在祀典者劉縣長吏行事焉元統甲戌四月朔邑士危素請太史虞集贊之贊曰

寶藏之興。豈爲厲階。叔世盡利。民生罹乖。榮榮二女。哀其所天。力不能拯。投身毒煙。身盡義著。苛政亦熄。民以永寧。無愧血食。

玄帝畫像贊

玄帝像。吳興趙公子昂。寫其夢中所見者。而上清羽士方壺子之所臨也。青城山樵者。虞集述贊之曰。吳興趙公。前代公族。神明氣清。靜處貞獨。乃夢天人。被髮跣足。玄衣寶劍。坐臨厓谷。再拜稽首。仰視退伏。念昔敬事。存思莊肅。敢意接對。光耀心目。如聞教言。知子誠篤。爾善繪事。追步顧陸。凡吾真儀。子善記錄。審而傳之。與世瞻矚。傍有介士。玉板金籙。曰帝告汝。錫爾榮祿。冉冉而升。夢亦遂覺。明月在戶。香彩徧屋。取火亟寫。神運掌握。豪分無失。三十其幅。丹青既成。齋戒韞匱。有當受授。先事穆卜。而其祕夢。初不以告。晚有相師。泄其玄躅。人始得傳。錦標鈿軸。方壺仙人。潔以薰沐。臨池擬容。識以玄玉。有得之者。昭事毋瀆。上帝臨女。介爾景福。

宰淵微先生畫象贊

湛乎澄之而愈清。昭乎執之而有象。我自和以天倪。人乃見其神王。納湖山於几席。運風雷於指掌。酌沆瀣以濯鼎。御氣機之來往。此所以身潛九淵之深。名應少微之上。居與稚川相望。壽與廣成相長也。

子昂書忠孝二表贊重增

漢丞相諸葛武侯。以建興五年。出師伐魏。所上表。後一千一百十又九年。吳興文敏趙公所書。又後三十九年。臨川饒龍得之。其太守洛陽楊侯友直審定。以爲子昂直蹟。雍虞集爲之贊云。

維昔武侯拜表出師。追感先遇。蹇蹇正辭。君子小人。興衰之辯。凡厥有邦。可以觀善。代有文臣。進思盡忠。爰致筆諫。寫爲屏風。考文取義。集思廣益。遊藝之美。傳世無斁。

蜀李密字令伯。晉武帝徵爲太子洗馬。密辭職。所上表。大德九年。吳興文敏趙公所書。至正三年。臨川饒龍得之。其太守洛陽楊侯友直審定。以爲子昂真蹟。雍虞集爲之贊云。

侃侃郎署。蜀漢遺臣。報德王母。誓畢厥身。新服有邦。求我遐僻。懇懇陳情。以謝徵辟。誠篤之言。義命攸當。教孝教忠。百世同尚。墨妙筆精。重書其辭。載誦載瞻。實勞我思。

道園學古錄卷之三十一

歸田藁五

序

周易玩辭序

周易玩辭者。江陵項公安世平甫之所著也。其言以爲大傳曰。君子居則觀其象。而玩其辭。動則觀其變。而玩其占。其道雖四。而實則二。變乃象之進退。占乃辭之吉凶。聖人因象以措辭。後學因辭而測象。是故學易者。舍辭何以哉。項公以其玩於辭而得之者。筆於書。使後之學者。因其言。皆有以玩於前聖之辭而得焉。此項氏著書之意也。嗟夫。天不言。生聖人而代之言。故曰。聖人之精。畫卦以示。聖人之蘊。因卦以發。微卦。聖人之蘊。殆不可悉得。而聞然。卦象未有語言。自非明知。何以知之。中古聖人。以其憂患之心。因卦立言。暢於周公。究於孔子。首尾具完。皆所親定。所謂精與蘊者。後世因得以推見焉。今夫生乎千載之下。而仰觀於千載之上。以凡人之資。而欲窺見天與聖人之道。苟得於聖人之一言。卽爲天之命已矣。况乎三聖人之言。廣大悉備。雖歷世久遠。遭時喪亂。互千萬古。而與所謂卦畫者。略不可有所磨滅。豈非天平後之立言。豈有加於此者。志於學者。誠不可下此而他求已。愚是以深歎項公之爲知言。漢晉以來。治易之師。其言猶有可見。而於四聖人之意。未知其何如也。及乎邵子周子之生。易道蓋中興焉。邵子以先天心學。著爲成書。不必麗乎經傳。而極天地之妙。通萬物之情。三聖人以降。未之或先。而學者鮮或知之。周

子之圖亦不必求同於易象而理則不二。所謂通書者皆所以通乎易者也。因卦以立辭者如乾損益家人睽復无妄蒙艮之說僅見如大畜等卦。當時已不得聞。獨賴河南程子親得其宗。以其成德之能事附於三聖人之書而言之。非直傳註而已也。自其學而推之以極其至。則天人之際豈有間哉。蓋嘗聞之。能盡其性者則能盡人之性。能盡人之性則能盡物之性。故曰知其性則知天矣。苟知天矣則天地之故鬼神之跡事物之雜豈待於考索推測而後通之。故程子有言不盡意者誠有望於後世學者自有得於聖人也。朱子發明象占本義多約程子之言而精之云爾。故學易之士於是得其端緒而不差焉。項公實與朱子同時。當時則又有江西陸先生者各以其學爲教。又有聰明文學過人之士興於永嘉。項公嘗從而問辨咨決焉。其遺文猶有可徵者。朱項往來之書至六七而不止。其要旨直以程子涵養須用敬進學則在致知之說以告之。於是項公之學上不過於高虛下不陷於功利而所趨所達端有定向。然後研精覃思作爲此書。外有以采擇諸家之博聞內有以及乎象數之通變奇而不鑿深而不迂詳而無餘約而無闕庶幾精微之道焉。其書旣成而朱子歿矣。自敍其學皆出於程子而其言則不必皆同也。是可以見其講明之指歸矣。近時學易君子多有取於其說豈徒然哉。然而爲是學者自非深求於程朱之說而有所憤排於缺塞則亦不足以知項氏之功也。集之壯歲至好此書每取其說以與朋友講習。今淮西廉訪僉事幹君克莊好古博雅學道愛人嘗以禮學貢於有司而不及奏。有旨俾居成均勤苦數載有人所不能堪者。文宗皇帝臨御開延閣以待天下之士乃特召見得與論思之次一時謂之得人。持節淮壩至于江上取是書於篋俾齊安郡學刻而廣之。蓋歎乎學者之不多見是書也不鄙謂集退老林下庶乎困學之

不敢忘。俾敘其說焉。嗚呼。內聖外王之學。不明於後世。而爲治者。以其知力之所及而行之。不無其效。至若上下與天地同流者。則何有哉。昔邵子有言曰。學於里人。而盡里人之情。學於鄉人。而盡鄉人之情。學於國人。而盡國人之情。學於古人。而盡古人之情。學於天地。而盡天地之情。如此則可以玩辭觀象而得之。世有斯人也哉。

戴石玉所著三禮序

治親書者。廬陵戴君石玉之所編也。其意以爲記禮者有曰。聖人南面而聽天下。所宜先者五。一曰治親。故雜取爾雅儀禮戴氏記。及先儒之言而成之。凡三篇。一曰釋親。二曰宗法。三曰服制。而親親之道備矣。品節之禮辨矣。予讀之而歎曰。考之於書。帝堯則曰。以親九族。帝舜則曰。察於人倫。其命契也。亦曰。百姓不親。五品不遜。敬敷五教。在寬。然則治天下者。思盡人道。以成善治。豈有出於此乎。今布衣韋帶之士。坐誦書史。慨然思古。聖人爲治之道。有取於聖經賢傳。著而爲書。以自見其學。其必有見也。夫夫大學之道。其極致在於平天下。蓋其素講者如此。又何疑也。夫親親之名。立內有其序。外有其別。禮可得而行矣。名之不立。則或昧於一本之立。迷於疏戚之辨。謬於愛敬之節。溺於鄙倍狎昵之私。此犯上好亂之所由起也。治親而首釋其名。可謂善矣。古者天子有天下。諸侯有國。大夫有家。故宗法可得而行焉。秦人壞封建。後世雖復建侯立國。不能如先王之制。故宗法不得行。而士無田。不可以祭。則烏在其爲宗乎。爲士者猶然。况庶人乎。是故學者。肄其說而傳之可也。石玉所謂君子行其意者。庶幾得之。若夫服制之說。今所敘列。先王之法。時君之制。先儒之說。可謂備矣。余竊有慨焉。喪服者。所以著其哀。所以稱其情也。世俗淪降。

不能三年之喪者多矣。又何總小功之足察乎。雖然。君子之爲道也。亦教之以孝弟而已矣。五十而慕。庶幾有聞大舜之風者焉。則其立制也。常欲節其過。以勉其不及焉。則凡石玉之所序者。可考而通之。以就其可行者矣。噫。論至於此。亦不過肄其說而傳之云耳。不亦悲夫。孟子曰。天下之本在國。國之本在家。家之本在身。爲人上者。不有躬行心得之君子。孰能與於此哉。方今聖明在上。人文方興。必有諸侯王大臣。能獻其書。以就一王禮樂之盛。千數百年之間。戴氏復以禮顯。不亦偉歟。

戒子通錄序

愚嘗聞之人受天之命以生。亦猶子之稟父命而行也。君子畏天命而不敢違。猶孝子之從父命而不敢悖。事天事親。其致一也。人之事天。而不求於事親。則不可以爲人。子之事親。而不足以事天。則不可以爲子。是故父命卽天命也。同一至仁而無私者也。然而天不能爲諄諄之誨也。知命者。觀乎風雨霜露之迹。變化消息之故而得之。詩云。昊天曰明。及爾出王。昊天曰旦。及爾游衍。庶幾奉以周旋者乎。故曰。富貴福澤。將厚吾之生也。貧賤憂戚。庸玉女於成也。莫非惟其所命。而順受其正者也。事親之道。亦若是而已矣。夫親之於其子也。蓋無不愛焉。欲其善良。欲其賢智。欲其福澤長久而不欲其兇惡愚不肖。不欲其困乏斷折。其心無有異者。語曰。厲人生子。夜而取火。是欲其子之善者。至於凡庸盡然。况中人以上乎。是故愛之至。則慮之深。知之明。則言之切。或因其材。或因其事。或抑其過。或勸其不及。或正其偏。或定其是。以啓迪其所未知。而增益其所可進。雖人品不同。而立言遠近。淺深頓異。要其指歸。皆愛其子而已矣。天理之公。孰有著於此者乎。昔靜春劉先生。輯凡爲人父者之戒其子言。載書傳者。以爲戒子通錄。意其所以謂

之通錄者。豈不以天下之爲人父者。各以其愛子之心而爲之戒。天下之爲人子。皆可因其所受而省念之。如聞其父之命。親在求諸容色辭氣之接。而不能盡也。卽此書以充其所未達。親歿思其精神志意之微。而皆不及聞也。卽此書以徵其所欲知。一語默動息。無非受命於其親者矣。天理寧有間斷乎。集嘗得其書而敬愛之。服行之。明不敢後也。它日至臨川。劉氏之族。在金溪者。多賢俊。每舉其先世遺書相示。僕慨然問之曰。戒子通錄亡恙乎。有曰。做叔熙者對曰。是吾世守以保族者也。敢忘之乎。集曰。子之家。顯且二。三百年。豈偶然乎。蓋又聞之。孝弟之順德。視犯上作亂之惡。其間之相去。甚不相似也。而有子推兩端之極。於一言之間。豫章羅先生曰。天下無不是之父母。而陳公了翁推致之曰。亂臣賊子之起。常始於見父母之不是。烏乎不受命之害。至於如此。三君子之言。所以有功於萬世名教者也。而忽焉者。不足以知其言之有功也。必有觀乎此書而用力焉。則能惕然恐懼。而所以盡心於事夫事親者矣。子盍刻而廣之也。做曰。諾。明年以成書來告。因請題其說云。

六書存古辨誤韻譜序

古者以六書教小學。是童丕已通習六書矣。今有皓首而未遑究之者。何望於孺子乎。秦法學童十七。諷籀文九千。試八體。乃得爲吏。書不正者。至尙書舉劾之。後爲政者。不復用此律。官府孰與正之哉。叔重存說文解字之書於漢。陽冰發義中興。篆法於唐。學者蓋亦希闊矣。宋初徐騎省兄弟。能倡明其說。著爲繫傳。有通釋部敍等篇。許李之舊。考辨推充。奧深衍博。可謂極矣。其後若吳興張謙仲。著復古編。亦號簡要。夾漈鄭獻仲。大發類例義旨。於二十略之一。學者可以觸類而長焉。至永嘉戴氏父子。三世所著六書故。

六書之外。設疑一條。以識不可強通者。近世書法之要論也。國朝至元中。祕書少監魯人楊桓。武子善。大小篆。所著六書統。以詔書刻之。尙方多出己意。篇帙浩穰。刻梓在尙方。學者莫之能究。縣焉。獨徐氏嘗又以爲古法背俗。秉筆操觚者。要資檢閱。而偏旁奧密。不可究知。尋求一字。往往終卷。乃令楚金取叔重所記。以切韻次之。聲韻區分。便於檢討。聊存詰訓。無恤其他。則其爲後學計。可謂詳盡。今瑞陽學官。亦刊五音韻譜。然聲韻所協。乃偏旁之本文。學者檢尋。未爲省力。則未知何爲而作也。番禺吳正道。年五十餘。世爲儒家。深好篆法。既著六書淵源。字旁辨誤。又著存古辨誤韻譜。故翰林學士臨川吳公。見而喜之。親作兩書。兩序。噫。吳公豈輕許可者哉。蓋其字旁辨誤之說。既考之諸家。而舉其要。用工固已深久。而韻譜之書。徐氏舊作。直載其字而已。蓋不更加於辨誤。而張鄭戴之辨。又不得以切韻尋檢。是以正道有辨古。有存古。具見於切韻相從之下。視徐氏爲後出。而益詳矣。惜刊未成書。而吳公歿。無名公大儒。力贊助之。故久未克完也。往者鶴山魏公。嘗以篆法寓諸隸體。最爲近古。而近時豫章熊先生亦用之。吳公又直用篆法。而結體加方云耳。然學之者無所講貫。則寧無差誤。爲俗隸媚好反病之乎。於此得正道之書。則思過半矣。且魏晉以來。善隸書以名世。未嘗不通六書之義。不通其義。則不得文字之情。制作之故。安有不通其義。不得其情。不本其故。猶得爲善書者乎。吳與趙公之書名天下。以其深究六書也。書之真贋。吾常以此辨之。世之不知六書。而效其波磔。以爲媚。誠妄人矣。然則正道之書。豈直篆者有益。欲爲隸書。亦必有取焉。是其不可少如此。必有博雅君子。如吳公之喜之。而助趣成之。

昔之傳春秋者有五家。而鄒夾先亡。學春秋者。據左氏以記事。以觀聖筆之所斷。而或議其浮華。與經意遠者多矣。是以公穀據經以立義。專門之家。是以尙焉。唐啖趙師友之間。始知求聖人之意。於聖人手筆之書。宋之大儒。以爲可與三傳兼治者。明其能專求於經也。然傳亡存者。惟纂例等書。意其傳之所發明。無出於所存之書者。清江劉氏權衡三傳。得之爲多。而其所爲傳。用意奧深。非博洽於典禮舊文者。不足以盡明之。是以知者鮮矣。蓋嘗竊求於先儒之言。以爲直書其事。而其義自見。斯言也。學春秋者。始有以求聖人之意。而無傳會糾纏之失矣。程叔子所謂時措之宜爲難知者。始可以求其端焉。胡文定公之學。實本於程氏。然其生也。當宋人南渡之時。姦佞用事。大義不立。苟存偏安。智勇扼腕。內修之未備。外攘之無策。君臣父子之間。君子思有以正其本焉。胡氏作傳之意。大抵本法於此。蓋其學問之有源。是以義理貫串。而辭旨無不通。類例無不合。想其發憤忘食。知天下之事。必可以有爲。聖人之道。必可以有立。上以感發人君天職之所當行。下以啓天下人心之所久蔽。區區之志。庶幾夫子處定哀之間者乎。東南之人。賴有此書。雖不能盡如其志。誦其言而凜然。猶百十年。至其國亡。志士仁人之可書。未必不出於此也。然其爲學。博極羣書。文義之所引。不察者多矣。國家設進士科。以取人。治春秋者。三傳之外。獨以胡氏爲說。豈非以三綱九法。赫然具見於其書者乎。而治舉子業者。掇拾緒餘。以應有司之格。旣無以得據事直書之旨。又無以得命德討罪之嚴。無以答聖朝取士明經之意。新安汪克寬德輔。以是經舉于浙省。其歸養也。能以胡氏之說。考其援引之所自出。原類例之始發。而盡究其終。謂之胡氏傳纂疏。其同郡同氏前進士澤民叔志父詳敘之。夫讀一家之書。則必盡一家之意。所以爲善學也。推傳以達乎經。因賢者之言。以

盡聖人之志。則吾於德輔猶有望也。至正改元辛巳七月一日。雍虞集敘。

鄭氏毛詩序

聖門之教人。蓋以詩爲學矣。孔子說烝民之詩曰。爲此詩者。其知道乎。故有物必有則。民之秉彝也。故好是懿德。戰戰兢兢。如臨深淵。如履薄冰。曾子之所以終身也。鳶飛戾天。魚躍于淵。子思子之所以明道體也。不以文害辭。不以辭害意。以意逆志。是爲得之。孟子之所以說詩也。是以程子之於詩也。嘗點掇一兩字而誦之。使人自解。又曰。今之學者。未見意趣。必不樂學。欲以三百篇教之。歌舞恐未易曉。欲別作詩。令朝夕歌之。似當有助。其意一也。聖賢之於詩。將以變化其氣質。涵養其德性。優游厭飫。詠嘆淫泆。使有得焉。則所謂溫柔敦厚之教。習與性成。庶幾學詩之道也。漢儒有保存遺經之功。而亦不無專門訓詁之失。儒先君子。知豈不足以知之。而罕見於言者。豈非有得於此。則彼穿鑿纏繞之說。自有所不得行乎。諸經皆然。蓋不止於詩也。齊魯韓詩不傳。而毛氏獨存。言詩之家。千數百年。守此而已。至宋歐陽子疑詩序之非。而著本義。蘇轍城亦疑而去之。不免猶存其首句。譬諸山下之泉。其初出也。壅塞底滯。而端亦微見矣。漸而清通。沛如江河。後因於先。而廓之。而水之源流達矣。亦有其時也。至於朱子詩傳之出。然後悉屏去大小序。別爲一編。存而不廢。以待攷辨。卽經以求其故。自爲之說。而天下學者從之。國家定以爲是。然後其說與聖賢之言詩者合。而學者有所用功矣。集之幼也。嘗從詩師得鄭氏經說。以爲大序不出於子夏。小序不出於毛公。蓋衛宏所爲。而康成之爲說如此。心竊異之。欲求其全書不可得。中歲備員勸誦。有阿魯灰叔仲。自守泉南。入朝爲同官。始得其錄本。而讀之。見其說風雅頌之分。蓋本諸音節之異。於比興賦

也。訓詁多不得興之說。而爲序者。掇拾博會。以愚惑乎後之人。烏獸草木之名。天文地理之說。或疎或謬。非一端也。剖析訓詁之舊。痛快決裂。無復餘蘊。向之所謂纏繞穿鑿者。幸一快焉。恨未久散去而不得終卷也。蓋竊惑夫鄭氏去朱子之鄉。若是其近。以年計之。不甚相遠。門人學者。里閭交錯。而不能通見於一時。何哉。雖各自爲說。而多同者。豈非閩多賢人。學者老於山林。嘗有其說。未達於外。而兩家各有所采乎。將二氏之卓識。皆有以度越前人。不待於相謀。而有合乎。世遠地廣。未之有攷也。西夏韓公克莊。常以禮經舉進士。如左榜漢生者。考官見其博贖。疑不敢取。而朝廷知其爲明經之士。其僉憲淮西也。以項氏易玩辭。足補程朱之遺。諗于集也。序其說而刻之。自南行臺而貳閩憲也。以爲閩在山海之間。豈無名家舊學。諮詢之暇。思有以表章之。予因及鄭氏之詩。卽使錄以來示。且曰。果可傳也。略爲我叙之。故著其說如此。又曰。求諸鄭氏之子孫。夾漈之手筆。猶其書五十餘種。故御史中丞馬公伯庸。延祐末。奉旨閱海貨於泉南。觀於鄭氏得十數種。以去。將刻而傳之。馬公敷歷清要。出人臺省。席不暇暖。未及其志而歿。秦定中。故太史齊公履謙。奉使宣撫治閩。亦取十餘種。將刻而傳之。太史還朝。不一二年而歿。亦不克如其志。二家皆有子弟。安知無能承其先志者乎。吾聞閩人刻書。摹印成市。成邑。散布中外。極乎四海。其間亦有謬妄。未經論定。在所當禁者。觀風使者。得以正之。而移其工力於博治有用之說。則在於今日矣。至正元年辛巳。十有一月十日。雍虞集序。

飛龍亭詩集序

古之言詩者。自其民庶。深感於先王之澤。而有所發焉。則謂之風。其公卿大夫。朝廷宗廟。賓客軍旅。學校。

稼穡田獵宴享更唱迭和以鳴太平之盛者則謂之雅飛龍之亭我文宗皇帝昔游之地也臣民咏歌何有間乎然而中外大小之臣因登覽斯亭而有賦者在是四方遊士與凡民俊秀之覽觀而有賦者亦在乎是大元興萬壽宮住持勅賜虛白先生陳寶琳既以旨意作新斯亭又取其風雅徧刻于亭下所以繫千載之思者不在斯乎傳曰言之無文行而不遠詩者文之最深而風雅者又詩之盛者也文皇帝成功盛德如天地之大日月之明若其治化之精微思慮之熙廣蓋不勝紀焉然而書諸簡冊者闕不如見於咏歌者之悠長告於神明者嚴不如播諸臣民者之周浹然則所謂飛龍亭詩集者山林畎畝之士不忘其君於無窮者其在斯乎次第成編而虞集爲之序

曹文貞公文集序

我國家龍興朔方金源氏將就亡絕干戈蠶起生民塗炭中州豪傑起於齊魯燕趙之間據要害以禦侮立保障以生聚以北嚮於王師方是時士大夫各趨所依以自存若夫禮樂之器文藝之學人才所歸未有過於東魯者矣世祖皇帝建元啓祚政事文學之科彬彬然爲朝廷出者東魯之人居多焉典誥之施於朝廷文檄之行乎軍旅故實之講乎郊廟赫然有耀於邦家至元大德之間布在臺閣發言盈朝所謂如圭如璋令聞令望而顒顒叩叩者焉集束書游京師猶或望前輩之一二而三四十年以來求文獻於當時邈乎遠哉自不獲見者矣其所存者其爲文章言語之可見者乎故魯郡曹文貞公起于漢泉受業於墊齋李公受知於信齋馬公起自儒宦宦游東南敷歷臺省聲譽籍甚每其來至京師集嘗得與清河元公復初汝上曹公子貞諸人有往來之好焉未嘗不嘆其意氣之宏達議論之慷慨而文物之雍容也

當文宗起故老於休致之餘。託文儒以風紀之重。集時執筆史館。而歎慕焉。歸田以來。歲月逾邁。乃從其子南行臺照磨復亨。得中臺所命刻文貞諸詩以見示。俾識其言焉。讀其墓碑論議。慨然千古之隔。觀乎張歐蘇之序言。又感乎一代之盛衰。退不敏。其何能贊一辭於其間哉。雖然。窮鄉陋邦之遠。聞天下之偉人。而莫之及也。獨得其咏歌之緒餘。以觀其性情之所在。觀其敷歷之所至。而知其行事之所著。傳曰。誦其詩。讀其書。不知其人。可乎。後之君子。將有徵於聖朝文章人物之故。其必於此而取之也夫。

楊叔能詩序

人之生也。以其父母妻子所仰之身。以治乎居處飲食之具。外有姻戚州閭之好。上有公上貢賦之供。固其常也。然而氣之所稟也。有盈歉。時之所遇也。有治否。而得喪利害休戚吉凶。有頓不相似者焉。於是處順者。則流連光景。而不知返。不幸而有所嬰拂。飢寒之迫。憂患之感。死喪疾威之至。則嗟痛號呼。隨其意之所存。言之所發。蓋有不能自揜者矣。是故有知其然而思去之者。則必至於外其身。以遺世。不與物接。求生息於彝倫之外。庶幾以無累焉。然其爲道。則亦人之所難者矣。蓋必若聖賢之教。有以知其大本之所自出。而修其所當爲也。事變之來。視乎義命而安之。則憂患利澤。舉無足以動其心。則其爲言也。舒遲而澹泊。闡然而成章。是以君子貴之。予行四方。求之而未之見也。又求夫今昔之人。有詞章之傳。而合乎此者。必取而諷之。以寄予意焉。然而亦鮮矣。臨川危太僕。與其友豫章楊顯民。以其族叔父叔能所爲詩一編。以示予。觀其所游。不過州郡數百里之間。觀其所慕。則千古高尚之士。澹然有餘。而不墮於空寂。悠然自適。而無或出於傷。但。迺若蟬蛻汗濁。與世略不相干。而時和氣清。卽凡見聞而自足。幾乎古人君子。

之遺意也哉。吾嘗以此求諸昔人之作。得四家焉。則陶處士。王右丞。韋蘇州。柳子厚其人。蘇州學詩於
憔悴之餘。子厚精思於竄謫之久。然後世慮銷歇。得發其過人之才。高世之趣。於寬閑寂寞之地。蓋有懲
創困絕。而後至於斯也。右丞冲澹。何愧於昔人。然而一旦患難之來。遽失所守。是有餘於閑逸。不足於事
變。良可嘆也。必也大義所存。立志不貳。乃若所遇。安乎其天。若陶處士者。其知道之言乎。雖然。言不可以
僞發。人不可以徒欺。千載之下。簡翰之存。苟有一人。諷咏於一日之間。則安所逃乎。是故君子尙論其本
也。今有讀叔能之詩者。譬諸飫芻豢之昏。病夏畦之苦。而得一勺之清泉甘露。豈不悅乎。夫泉之所自出。
露之所由降。尙善求之哉。

送危太樸序

臨川危太樸釋書山房。將有觀乎江海之上。虞集酌酒送之。而爲之言曰。夫士者。有一鄉之士。有一國之
士。有天下之士。一鄉之士。鄉之人有不得而見之者矣。况一國之士乎。一國之人有不得以見
之者矣。况天下之士乎。環百井之里。以爲鄉。鄉之人多矣。列千里之封。以爲國。一國之竟廣矣。合萬邦之
士。以爲天下。天下之體大矣。而士也。以一鄉以一國。以天下名。其何以知之乎。邵子曰。有百人之人。有千
人之人。有萬人之人。非其等乎。噫。何其不常見也。彼所謂天下之士。必有所居之國矣。一國之士。必有所
居之鄉矣。以天下之士。一國之士。而處乎一鄉焉。吾不待去親戚。遠墳墓。而得見之。不亦幸乎。去臨川五
百里而近。有一人焉。清文厲行。立志自信。曰。范君德機者。太樸旣得而從之。至臨川二百里而遠。又有一
人焉。經明道立。爲人師表。曰。子吳子者。太樸又得而師之矣。是豈非天下之士。在夫一鄉者。

乎。而二子者。歿世矣。宜乎吾子之徬徨適遠。而有所求也。吾聞諸孟子曰。一鄉之善士。斯友一鄉之善士。一國之善士。斯友一國之善士。天下之善士。斯友天下之善士矣。吾子其行矣。登東山。則見魯矣。登太山。則見天下矣。吾子得一鄉之善士而友之。則吾子亦一鄉之善士矣。得一國之善士而友之。則吾子亦一國之善士矣。得天下之善士而友之。則吾子亦天下之善士矣。苟得天下之善士。吾請從太樸而爲之。執御焉。雖然。子亦欲子之善與。孟子之言。又有之矣。蓋曰。以友天下之善士爲未足。又尙論古之人。頌其詩。讀其書。不知其人可乎。是固求至善之道也。奈老且病。不足以有所適。徒將頌詩讀書。思古人之微。以遲子之還。可乎。

葛生新采蜀詩序

吾聞廬陵之文溪。生息繁夥。其俗好遠遊。不問於稚壯強艾也。特其志尙之不齊。則執業有懸絕者矣。葛生存。吾獨曰。今天下車書之同。往昔莫及。吾將歷觀都邑山川之勝。人物文章之美。使東西南北之人。得以周悉而互見焉。且夫風物之得以宣通。咏歌之易以傳習。則莫盛於詩。緣古者采詩之說。而索求焉。乃沿豫章。汎彭蠡。上九江。浮游湘漢之波。遂遡三峽。至于蜀都而止焉。名卿大夫。文雅之士。居數年。得詩六百餘篇。歸廬陵。將刻而傳之。吾鄉之人。知予以老病歸田。寓耒耜於江上。託生相問勞。而保寧賢帥大夫鶴野。蕭侯存道。又手爲書。使予序。夫六百篇者。予不敢辭也。而生抱數鉅帙。欲予有所去取。其間。則僕不敢也。生往反萬里而得之。且諸君之屬生厚矣。何敢有所擇乎。集之去鄉久矣。親戚故人之別。遠者二十餘年。近者亦五六年。一旦因生。盡得其詞章。而諷誦之。以詫其門人子弟。唯恐不足。豈肯抵玉於昆岡。棄

珠於合浦者乎。生宜無憚於煩也。烏乎。吾蜀文學之盛。自先漢至於唐宋。備載簡冊。家傳人誦。不可泯滅。宋南渡以來。蜀在斗絕一隅之地。然而文武忠孝之君子。冠蓋相望。禮樂文物之懿。德行學問之成。立功立言。卓犖亨暢。下至才藝器物之類。其見諸文辭者。亦沛然非它州之所能及矣。喪亂以還。廢軼殆盡。集雖嘗從父師。聞一二於千百。蓋亦以微矣。微而後著。當在斯時。其有以鳴乎國家之盛大者乎。生之所采。識者有以見其端矣。生其亟成書。以西報諸君子乎。僕在禁林時。嘗與蜀學者史君秉文。言將謀築於滄江故居之上。字之曰歸歟。天幸不違斯意。固將與其故人父兄昆弟取生之篇。而絃歌於其堂也乎。生年甚富。天下之都會若吾蜀者。何啻八九。而兩京又在其上焉。生亟成其志。勿怠。且必有遇合者矣。

廿天民詩序

岷山導江。合衆小流。千源萬派。其水盛矣。見束於三峽。出夷陵。而後得衍曼徐行。滔滔汨汨。至於海而後止。蓋自夷陵而始得志焉。今夫才智之士。懷抱利器。鬱鬱不見於用。一日如水之出夷陵。豈無其時哉。豫章甘天民。雄於文。盛於氣。中年僅得爲夷陵學正。人或病其地幽僻。而天民怡然就官。書滿而後去。是夷陵者。不特水之隘至此而伸。安知天民不如水之自夷陵而遂伸乎。長風揚瀾。一日千里。吾知天民之利涉大川也。故爲作送行詩序。昔歐陽子小絀於夷陵。而大名在天下。後世亦余言之。一驗也。郡從事有李道濟者。嘗與余同在祕閣。試以此語訊之。

臨川黃氏復姓譜序

臨川黃大明。以其高祖冒游氏。而不能自歸也。始復爲黃氏。嘗無子。以其弟爲子。後知其不可也。仍其弟

之次。更以弟之子爲子。而心始安焉。自著譜以傳諸子孫。而示信於人。夫三年無改於父之道。可以爲孝。自高祖至于大明之身。其爲三年也多矣。父子兄弟之間。心有所未安。必求其安而後已。大明其知禮也哉。夫異姓不可以爲後。弟不可以爲子。天理民彝。固當然也。是以昔者別氏於其族者。有之。蒙他人之氏者。無也。有國者。兄歿而弟及。有臣子之道焉。直以弟爲子者。無也。而後世有是者。其始蓋出於率情徇利。而天下之爭端起矣。故君子慎之。而小人弗之察也。是故爲政者。因世之有是事也。則爲之條制而防閑之。卒亦莫之止也。若大明者。知禮之所不可。心之所未安。而能自返焉。不亦君子之道乎。

送饒則民序

吾聞則明之曾大父神童君。幼穎異。有大名。稍長。與主一張先生。洽爲友。壻於豐城范氏。明春秋之學。未及顯而歿。及則明之父。好史學。家藏書萬卷。內附初散軼無存者。乃盡力購求。一二十年之間。史官之書。行于世者。掇拾略備。爲閣以度之。手疏其目。以見得書之難。則明承世業。接見聞於父兄。材可以適當世之用。故翰林學士臨川吳公曰。吾郡世爲儒者。有婁氏饒氏。皆有鄒魯之質。行學術雅正。守醇謹而不變。然未甚顯於世。近年婁氏稍有仕進者。而饒氏猶遲之。其在則明。可以仕矣。今則明除韶州儒學正。將之官。吳公之言驗。而不及見之矣。乃求贈言於予。噫。昔者夫子嘗使漆雕開仕矣。使之仕。必可仕者也。吳公許則明以可仕。其必有所試哉。夫春秋道名分。實盡性之書也。分之上下弗辨。則民志不定。亂之所由生也。必君君臣臣。父父子子。夫夫婦婦之分立。則王道行矣。此教之大者也。夫古今治亂之迹。不攷。則無以極事理之變通。又史學之不可不講也。則明持其家學。而佐其長以爲教焉。信乎其可仕矣。窮鄉下邑。無

良師畏友。以相發明。君子憂之。而爲之計。則明所持以往者如此。尙何疑哉。昔唐相國曲江公。實生是邦。人材之出。初無方所。則明毋忽而薄之也。今曲江宰長沙趙君。故信國諸孫。於予有世契。試出此而共詳之。

道園學古錄卷之三十二

歸田藁六

序

送太平文學黃敬則之官序

至元甲申之歲。集從先人始來僑臨川之崇仁。時內附未久。淄萊李忠愍公。方領其軍。定江右。鎮豫章。鹿泉賈公。以文臣爲使。奉詔分闡。綏撫其士民。思有以畏服衆志。而安定之。起文雅通練之士。知名一時者。以慰民望。故宋進士之在崇仁者。猶十數人。衣冠甚偉。獨宗正寺簿思梅黃公爲諸公一起。爲之賓客。氣象論議。多所感發。旣而河東劉公伯宣。來爲按察使。與其同列具書幣。遣使者禮延公於洪學。親聽其講說焉。劉公則許文正公高第弟子。經學節行。方正嚴重。其爲此舉也。風厲激昂。四方聳然。歲丙戌。寺簿公歿。忠愍元子龍川公。以世家仍鎮其部。歷陞省府。賈公劉公子弟之往來于洪者。皆以其先志。求寺簿之子。浮山君。開館塾。而禮貌之。中山趙公樸隱。持節再至。與君處無一日之舍。而李氏之子孫。至再世皆稱門生弟子。君之生平。客授之日。多於居家矣。龍川以平章留樞筦。嘗與翰林集賢薦君。而僅一拜文學之命。而君不屑也。使其子仕爲學官。則敬則也。敬則自浮梁改遷太平。需次者五六年。恬然以居。略無躁急之意。是以學者稱焉。仍改至元之五年。孟夏之吉。敬則來告曰。有人自太平來。趣治其學事。求一言之贈焉。集爲席與坐而告之曰。世祖皇帝。以天兵臨鄂渚之歲。歲在己未。我先尙書解組永州。道過崇仁。爲姻

戚少留始識寺簿公。寺簿公登進士第時，實寓我尙書臨安之別第，而我先參政少寺簿公十歲。甲申之來，得相從者三稔焉。我先人涪湛田野，簞瓢屢空，不計閑達。浮山君友道崇篤，每爲諸侯大夫稱誦之。趙國董忠宣公之延敬先人，則君與清河元文敏公實啓之也。及忠宣還朝，先人卽歸田舍。浮山君亦漸倦游，相處東西家，講學脩行，無食須不相求，始終無閒言。人以爲有古君子之風矣。延祐己未，先人卽世。浮山君年已六十，視集少有十三年，待之若稚弟焉。及集再召還朝，而君沒矣。旣老而歸，君已不可復見。賴敬則之家居也，時有過從之樂。今出而服官政，集得無言乎？集嘗聞諸鄉之遺老云：敬則曾大父梅窗先生，方盛年，富文史，教授近郊之巨室中，夜有求見魯男子者，先生絕袖扶闌而走，失道墮巨浸中，衣絰水柳而止。聞有人聲相呼者，云：此人，有子登科，謹護之。且乃得解而歸。家人怪問之，不答也。而館人或歎其事而泄之。後三年丙申，而寺簿公生，造物之報卓行君子，昭昭如此，可不懼乎？可不敬乎？今內附且七十年，寺簿公之名德雅望，浮山君之清才懿學，再世積累，旣被其子孫，充碩盛大，方殷而未央也。可不知所自乎？夫善必積而後成，非必一事而可責報於天也。然而一念之烈，其發之不可遏若是。此孟氏之論學所貴乎擴而充之者也。吾敬則橫經於其堂，以其祖父之所教而教人者，余豈足以盡知之。至於善端之發，確持而不變，勇行而不絀者，尙有以廣君子之澤哉？子行矣。余待子於蓬華之下，三年而歸，有以爲告焉。采石之上，有我先忠肅公遺廟在，故人覃懷，薛公超，吾守郡時，爲起斷碑於草莽而植之，誼不可忘也。集過祠下，又已六七年，子弟之至者，亦一二年矣。敬則經行，幸爲集省其庭柏階草焉。

夫欲觀於國家聲文之盛。莫善於詩矣。類而求焉。是爲得之。昔者延陵季子。見詩與樂於中國。心會意識。如身在其時。而親見其人。蓋以此耳。梁昭明著文選。其詩不必出於一時之作。一人之手。徒以文辭之善。惟意所取而已。然數百年間。篇籍散軼。幸有此可觀焉。而衰陋之習。或取此以爲學。則已微矣。河汾君子。有意於續經。漢魏之詩。殆必有取。然而其書不傳。蓋非偶然也。蓋嘗聞之。詩三百。一言以蔽之。曰。思無邪。又曰。王者之迹熄。而詩亡。詩亡。然後春秋作。邵子亦曰。自從刪後更無詩。蓋知聖人之意爾。昔者盛時。學道之君子。德業盛大。發爲言詩。光著深遠。其小人。蒙被德澤。風行草偃。變化融液。莫或間焉。此所以一言可蔽之。曰。思無邪也。此所以王者之迹熄。而後詩亡也。此所以刪後之無詩也。國朝之初。故金進士太原元好問。著中州集於野史之亭。蓋傷夫百十年間。中州板蕩。人物凋謝。文章不槩。見於世。姑因錄詩。傳其人之梗槩。君子固有深閔其心矣。我國家奄有萬方。三光五岳之氣全。淳古醇厚之風立。異人間出。文物粲然。雖古昔何以加焉。是以好事君子。多所采拾於文章。以爲一代之偉觀者矣。然而山林之士。或不足以盡見之。百年以來。詩文之輯錄。蓋多有之。然雖多。不足以盡其文。或約而不足以盡其意。亦其勢然也。監察御史前進士燕人宋鑿顯。夫在史館多暇。其所薈粹開國以來。辭章之善。多至數十大編。自草野之所傳誦。亦皆載焉。庶幾可以爲博。而傳寫之難。四方又有不得盡見之病矣。建陽蔣易師。文著國朝文雅三十卷。而以保定劉靜脩先生爲之首。許文正公繼之。終之以雜編三卷。庶乎其有意焉。嗟夫。若劉先生之高識卓行。誠爲中州諸君子之冠。而許公佐世祖成治道。儒者之功。其可誣哉。若師文者。其可以與言詩也。夫十卷以上。諸賢皆已去世。而全集尙有可攷載。如臨川吳先生之經學。具有成書。其見於詩者。太

山一豪芒也。窮鄉晚進，尙繇是而推求之乎？十一卷以下，諸君子布在中外。夫君子之爲學，苟不肯自止，則進德何可量哉？竊以爲未可詎止於斯也。至於僕也，蚤持不足之資，以應世用，老而歸休，退而求其在己者，尙慊然其未能也。片言隻辭，何足以廁於諸賢之間哉？亟除而去之，則區區之幸也。至元己卯七月三日，雍虞集書。

送墨莊劉叔熙遠游序

元統甲戌，予自史館歸，僑臨川。從清江墨莊劉氏賢子孫之分居金谿者，得見其先世遺墨遺事，與羣賢交游之翰墨，蓋三嘆其文獻之懿，久遠而能使人不忘也。其後叔熙氏歲登華蓋山，必及于門。予嘗與叔熙論其家書，因及靜春戒子通錄，實有助於名教，恨其書不大傳。叔熙曰：諾。有家藏舊本，當刻而傳之。一年而書成，宗族鄉黨受而讀之。遠近學者願得之，臺省有知其書，不遠千里使人求之，信乎錫類之不匱也。叔熙又謂予言：族人諸父昆弟願合其財力，先取公是公非兩先生之文而刻之，而公非集頗有遺脫，將訪而足成之。故緩他日，叔熙又及予門，以自清江至金谿族譜及侍讀以來，所與歐陽公、王荆公、眉山蘇公、昆弟、南豐、曾子固諸家之書，與劉氏相關者，及并靜春與諸子所往復備錄爲凡三巨編，受言誦之，慨思古人之不可復見也。予早辭親游京師，館授以爲業，每懼夫於道未有聞也。至於古今記載名物制度之類，又皆空疎不足以酬應，觀於昔者斯文之盛，有歐王蘇曾度越前代，而侍讀公兄弟父子博學洽聞，森然參著於其間，聲望略等，何其盛哉！故予每執筆茫然，博雅之士未嘗不歎息。劉氏於二百年之上也，往者承乏，事文宗皇帝於延閣，清燕之暇，曲賜延對，訪問故實，著述文字，幾無虛日。於是時也，則前日

所愧。於是益深。承詔讀進士對策於殿廡。得劉性粹衷。劉聞。聞庭諸君之文而奏之。後知其賜官廬陵。臨江。因告以其說。而囑之曰。劉氏之書。惟春秋意林。及三傳權衡。刻本在學官。而所著傳尙闕。其他成書者。猶十七八種。惟西漢書注。或附見於本書。七經小傳。學者或傳寫讀之。其餘蓋罕傳焉。而靜春氏等諸著述。未暇數也。宜訪而廣之。二年前。聞庭刻小傳於臨州。粹忠刻弟子記於旌德。皆摹寄以屬。鑿予之嗜焉。因以其貳與叔熙。叔熙歸讀而告曰。與家藏本無異也。故家子孫。若叔熙氏之拳拳於先世。草茅俗陋。其可以小愧乎哉。世祖皇帝時。既取江南。大臣有奏言。國可滅。其史不可滅。上甚善之。命史官修遼宋金史。時未遑也。至仁宗時。屢嘗以爲言。是時予方在奉常。嘗因會議廷中。而言諸朝曰。三史文書闕略。遼金爲甚。故老且盡。後之賢者。見聞亦且不及。不於今時爲之。恐無以稱上意。典領大官是其言。而亦有所未建也。天曆至。順之間。屢詔史館趣爲之。而予別領書局未奏。故未及承命。間與同列議三史之不得成。蓋互以分合論。正統莫克有定。今當三家各爲書。各盡其言。而覈實之。使其事不廢可也。乃若議論。則以俟來者。諸公頗以爲然。然每思史事之重。非有歐公之才識。而又得劉公之傳治以資之。蓋未易能有成也。予聞前輩言。渡江後。眉山李公仁父。就蜀置局。著宋通鑑長編。而北兵卒至。盡亡其書。走至東南。多追憶以成書。凡數百卷。是可以追及劉氏者歟。宋晚禮部尙書王公伯原。最彊記。而我從大父祕監公與之。齊名予不及見。王公祕監公。蒙世祖特起之。任以輿地之事。今其書在祕省。予幼時得豫章布衣孫詒吾。每得書覽。記之不忘。又能參錯攷定。非是。每有問。必舉之。終其篇。蜀人范大治。亦善記。嘗言幼在蜀。從予先世得盡見六經緯。時爲予讀一篇。予時尙小。不能通其說。時范已七十餘矣。其後同朝友。侍講四明袁公伯

長蓋學於王氏。得其記言之要。而秦定執政東平王公繼學。見書輒記。無復再覽。領政事省朝省。吏牘過目。無所遺。皆異材也。然今惟王公在耳。此予之所親見者也。朝廷必欲成一代之言。不有如此數君子者。其克有濟乎。戊寅春。叔熙來告別。云將游觀乎燕趙齊魯晉宋之郊。予曰。善哉。子之遊乎。慎毋苟然也。觀夫山川之形勝。封域之離合。考古人之遺迹。風氣之變通。習俗之升降。文史之遺闕。皆子家學之能事也。以子之清通明敏。因以肆其問學。而資其見聞。今聖明在上。必有述作之事。如圭如璋。令聞令望。濟濟之多。詎可遺吾叔熙者乎。

送李仲永游孔林序

章甫逢掖之士。視魯孔林。如支庶流裔。觀於父母宗子之家。孰不以爲歸往瞻仰之地乎。國家混一以來。有欲觀夫徂徠之松。新甫之柏。瞻龜山之雲。泳沂上之風者。川有舟航。陸有車馬。不待贏糧計日而可至。視前代分裂隔亂之世。欲往而不可得。則其游豈不快哉。然以布衣陋巷。窮居終日。坐誦書史。安於閭里之近。無其志者有之矣。桑弧蓬矢。有四方之志。而力不足以充之者有之矣。有其志。有其力。或仰事俯育。供給公上之類。又足以累之。無其時者有之矣。予年垂七十。數經濟泗之間。每以王事有程。不獲伸闕里之敬。歸老臨川。自意無復是行李。遠仲永。視予年僅將半之。有其志。有其財。有其時。欲爲孔林之行。其行矣哉。毋因循。毋簡慢。毋退志。爲它日有予之悔者也。嗚呼。昔楊中立先生。自程門歸。叔子歎曰。吾道南矣。旣而宋失中原。而南渡。然道統之傳。自楊氏爲豫章羅氏。延平李氏。乃得朱子。其傳諸胡氏者。得張宣公。是諸君子之學。宛有端緒。身不必親觀乎靈光之遺。而親聆乎金絲之音也。其望聖人於千載之上。若親

矣之不可誣也。然則學者之求乎聖賢，固有在此而不在彼者乎？仲永之先侍郎公，實爲朱張二子所稱道。議論名節，見諸文章，仲永尙論先世，其亦有所聞也乎？然則仲永歸而求諸者，旣如此，今往而游觀之者，又如彼，子安得不快其游乎？

易南甫詩序

詩三百篇之後，楚辭出焉。西都之言賦者盛矣。自魏以降，作者代出，制作之體，愈變而愈新。因唐之詩賦，有聲律對偶之巧，推其前而別之曰古賦。古賦詩有樂歌，可以被之樂府。其後也，轉爲新聲，豪於才者，放爲歌行之肆，長於情者，變爲傷淫之極。則又推其前者而別之曰古樂府。時非一時，人非一人。古近之體，不一。今欲以一人之手，成一編之文，合備諸體，而皆合作，各臻其妙，不亦難乎？高安易君南甫，示予以賦。若詩一編，盡具詩賦諸體，不蹈流俗，有爲而作，辭不苟造。蓋聞南甫之居，則康樂之故地，謝公之所封，而嘗游者也。林泉之日長，山水之興足，有得於昔人之流風餘韻，是以能然也哉。今夫江河之行，湖海之浸，或爲驚濤巨浪之壯，或爲平波漫流之閑，一窪之盈，一曲之勝，其所寓不相似，而各有可觀者焉。以水之同出一源故也。善賦之君子，又以其非常之才，有餘之興，隨所遇而有作焉。何患乎衆體之不皆妙也。固哉。子昔之言詩乎？蘇子由言其兄子瞻平生無嗜好，以圖史爲苑囿，文章爲鼓吹，老亦棄去，顧獨好爲詩耳。嗟夫，子豈敢擬於古之人哉。會有耳目之疾，有園囿而無所游觀，有鼓吹而不能以自樂，而心思凋耗，亦不復能詩，徒使弟子誦昔賢今人之詩，以自娛焉。南甫之所以惠我者多矣。然南甫之意，豈徒然哉。子之少也，亦嘗執筆而學焉。聞諸同志曰：性其完也，情其通也，學其資也，才其能也，氣其充也，識其決也，則

將與造物者同爲變化不測於無窮焉。詩賦云乎哉。斯言也。南甫以爲有可採乎。

臨川晏氏家譜序

臨川逍遙峯福勝院主僧師吉。以所脩晏元獻公家譜相示。深歎其以爲委身於釋氏。而不忍忘先世之疏闊。因其族兄某。得其譜系而敘錄焉。按其譜自師吉上距於元獻八世。距尙書公六世。蓋元獻公九子。尙書則第八子之子。尙書六十三而歿。而尙書之子生三歲而孤。是以師吉之系。歷三百年而才八世云。爾宋之南渡。秦檜專政。誤國。胡公邦衡慷慨一疏。當時偉之。至今讀者猶憤發有生氣。豈知尙書之疏。尤深切著明。憂思治法。無不畢備。世臣之言固當然乎。而學者鮮得見之。然則國史有尙書之傳。今又幸於私記敘譜而見之也。君子之言其不可泯也如此乎。余昔待罪國史。嘗以職事求於先宋之故家遺記。得燕山竇公儼。賈公昌朝之後人。皆爲貴官於國朝。傳系可徵。而譜牒遺逸矣。最後得閩中陳丞相堯咨兄弟諸孫之留居鄭州者。子孫之分居東平。曰某。爲御史。來求先塋碑。而得其譜之略。故宋盛時。若呂申公。韓魏公。富鄭公。曾魯公。司馬溫公。桐木韓家。子孫南渡後。仕宦功業。猶可攷見。內附以來。邈乎無所聞於四方。聞曾氏有子孫在泉南。數十年前。北方曾氏有仕於南臺者。至泉南。以世嗣求拜其家廟者。慶曆從官莆田陳氏之裔孫旅爲余云。而今亦不可攷之矣。及余歸僑臨川。郡之大族。樂侍郎中後人尙多。而未嘗見其譜。王荆公子孫。四十年前。在金陵。嘗見一二人。今祠下亦有一二人耳。而晏氏之子孫。莫盛於尙書八世之後。乃有去爲釋氏者。凜然思其宗家。緝累其家。世行事歲月如此。賢者之傳。固當有見於後世矣。又聞王歧公子孫。有官撫州而留居者。其孫卒於外孫李氏家。又得桐木韓氏之譜。於其諸孫。

之留居臨川者。南澗公爲之序者也。故家之子孫。數世之後。雖隆替不可知。余於晏氏之譜。有不勝感歎者矣。思古人於既往。望喬木而遐思。故書此而歸之。前史官虞集書。

葉宋英自度曲譜序

詩三百篇。皆可被之弦歌。或曰。雅頌施之宗廟。朝廷關雎麟趾。爲房中之樂。則是矣。桑間濮上之音。將何所用之哉。噫。歌永言。聲依永。律和聲。蓋未有出乎六律五音七均。而可以成聲者。古者子生師出。皆吹律以占之。蓋其進反之間。疏數之節。細微之辨。君子審之。是故鄭衛之音。特其發於情。措諸辭。有不善爾。聲必依律。而後和。則無以異也。後世雅樂。黃鐘之寸。卒無定說。今之俗樂。視夫以夾鍾爲律本者。其聲之哀怨淫蕩。又當何如哉。近世士大夫。號稱能樂府者。皆依約舊譜。倣其平仄。綴緝成章。徒諧俚耳。則可。乃若文章之高者。又皆率意爲之。不可叶諸律。不顧也。太常樂工。知以管定譜。而撰詞實腔。又皆鄙俚。亦無足取。求如三百篇之皆可弦歌。其可得乎。臨川葉宋英。予少年時識之。觀其所自度曲。皆有傳授。音節諧婉。而其詞華。則有周邦彥姜夔之流風餘韻。心甚愛之。蓋未及與之講也。及忝在朝列。與聞制作之事。思得宋英其人。本雅以訓俗。而去世久矣。不可復得。老歸臨川之上。因其子。得見其遺書十數篇。皆有可觀者焉。俯仰疇昔。爲之增慨。序其故而歸之。

